

EL SANTO EVANGELIO SEGUN SAN LUCAS

Lucas uicuatía Teófilo pe

¹ Jeta vae umimbeu ma uicuatía reve opaete yandepite pe uyeyapo vae regua. ² Jocua uyeyapo vae iyipi güive uecha vae reta jucuarái umimbeu yandeve. Echa'ã jae reta umimbeu Tumpa iñee ñru vae reta pe. ³ Jáeramo icavi echa cheve che vi aicuatía vaerã ndeve, mburuvicha Teófilo, amimbeu vaerã ndeve quirái opaete uyeyapo. Echa'ã che aicuaa cavi opaete iyipi güive uyeyapo vae. ⁴ Aicuatía ã ndeve cua, ndicuaa vaerã añete co jocua ndiyemboe jese vae.

Juan oata vae regua

⁵ Herodes ico yave ivi Judea pegua reta juvicha guasurã, ico vi penti sacerdote Zacarías jee vae. Jae co sacerdote penti ati Abías jee vae pegua. Zacarías jembireco co jae Aarón iñemoñaa reta pegua jare jee co Elisabet. ⁶ Zacarías jare jembireco uyapo jupi vae jare jucuarái umbiyerovia Tumpa. Echa'ã jecuaeño uyapo yandeYa iporoyocui reta. Mbaeti quía ipuere umbijeco reta mbae re. ⁷ Érei mbaeti co Zacarías isambiai. Echa'ã Elisabet imembi mbae vae co. Jare Zacarías jare Elisabet ucuacuaa ete ma.

⁸ Penti ara penti ati Abías jee vae pegua sacerdote reta uparaviqui ñgüünoi Tumpa jo pe. Jáeramo Zacarías uyapo oĩ iparaviqui joco pe. ⁹ Jare jocua ara Zacarías iparaviqui co uique vaerã yandeYa jo japipe pe etei uapi vaerã mbae ipiche cavi vae. Echa'ã jecuaeño uyapo jucuarái sacerdote reta. ¹⁰ Jare jeta Israel pegua reta yati ma uyerure ñgüünoi Tumpa jo oca pe, Zacarías mbae ipiche cavi vae uapi oĩ rambueve. ¹¹ Jare uyecuaa Zacarías

pe penti ángel yandeYa pe uyeyocui vae. Ángel uyemboi oĩ mbae ipiche cavi vae imesa iyacata coti. ¹² Jare Zacarías uecha yave ángel, ipiacañi jare uquiye vi. ¹³ Ërei ángel jei chupe:

—Agüiye equiye, Zacarías. Tumpa uyandu ma ndiyerure, jare nembireco Elisabet imembita ndeve cuimbae. Jare nembijeeta Juan —jei—. ¹⁴ Jare nde ndiyeroviata co tuicha. Jare jeta vi uyeroviata jae oa vae regua —jei ángel Zacarías pe—. ¹⁵ Echa'ã yandeYa umbutuichacata co. Jae ndarau etei ucau. Jare tineeta Espiritu Santo pe ichi güi oa güive —jei chupe—. ¹⁶ Jare umbiyerovata yandeYa Tumpa coti jeta Israel pegua reta —jei—. ¹⁷ Jae oota yandeYa jenonde uauca vaerã tu reta pe isambiai reta jare Tumpa jei vae uyapo'ã vae reta uyeyapo vaerã iyaracuaa vae retarã jare jupi vae retarã. Jucuarãi uyapota, Israel pegua reta uãro vaerã yandeYa. Jae icota Elías icose vae rami jare güinoita mbaepuere Elías güinoise vae rami —jei ángel Zacarías pe.

¹⁸ Jayave Zacarías jei ángel pe:

—¿Quirãita pa aicuaa añetete ra cua nde ndere cheve vae? Echa'ã che acuacuaa ete ma jare chembireco ucuacuaa ete ma vi —jei.

¹⁹ Jayave ángel jei ye Zacarías pe:

—Che co jae Gabriel. Che ayeyocui Tumpa pe. Tumpa chembou chemiari vaerã ndeve jare amimbeu vaerã ndeve cua ñee icavi vae —jei chupe—. ²⁰ Mase, niñeeta'ã ndepita cua amimbeu ndeve vae uyeyapo regua. Echa'ã nderovia'ã che jae ndeve vae. Ërei che jae ndeve vae uyeyapota co ara ou uyeyapo vaerã yave —jei.

²¹ Jare Israel pegua reta uãro ñugüinoi Zacarías oẽ vaerã Tumpa jo güi, jare ipiacañi reta quirãi Zacarías upita ima Tumpa jo japipe pe. ²² Jare Zacarías oẽ yave, ipuere'ã omoẽ iñee chupe reta. Jáeramo jae reta uicuaa Zacarías

uecha mbae Tumpa jo pe oĩ rambueve. Echa'ã jae umupũa ipo chupe reta. Ërei ipuere'ã etei mbae jei chupe reta.

²³ Jare opa ma yave Zacarías iparaviqui Tumpa jo pe, oo ye jenta pe. ²⁴ Jare mbovi ara rupi Zacarías jembireco Elisabet ipurúa. Jayave Elisabet uñemi pandepo yasi jenta pe. Echa'ã jae jei:

²⁵ —Cuarãi yandeYa uyapo cheve. Ima ma chemara ñru vae reta güi chemembi'ã etei ramo. Ërei añave yandeYa chembori agüiye vaerã chemara chugüi reta —jei.

Jesús oata vae regua

²⁶ Jare Elisabet seis yasi ma ipurúa yave, Tumpa ombou ángel Gabriel tenta guasu Nazaret ìvi Galilea pegua pe ²⁷ María ipi. María co jae penti cuñatai güireco'ã etei cuimbae vae. Ërei jae jei ma umenda vaerã José ndive. José co jae penti David ññemoñaeta reta pegua. ²⁸ Jare ángel uique María oĩ vae pe jare jei chupe:

—Iyerovia. YandeYa ipiacavi ndeve. YandeYa oĩ nde ndive. YandeYa nemivendise ete ñru cuña reta güi —jei.

²⁹ María cua uyandu yave, ipiacañi. Echa'ã uicuaa'ã mbae ra uipota jei ángel jei chupe vae. ³⁰ Jayave ángel jei chupe:

—Agüiye equiye, María. Echa'ã Tumpa ipiacavi ndeve —jei—. ³¹ Mase, ndepuruata co jare nemembita. Jare nembijeeta nemembi Jesús —jei María pe—. ³² Jae güinoita mbaepuere tuicha vae, jare jeeta co Tumpa Tai. Jare yandeYa Tumpa uyapota Israel pegua reta juvicha guasurã itenondegua David rami —jei—. ³³ Jare jae icota Jacob ññemoñaeta reta juvicha guasurã jaeño mai pegua. Jare jae iporoyocua ndarau opa —jei ángel chupe.

³⁴ Jayave María jei ángel pe:

—¿Quirãita pa uyeyapo cua? Echa'ã ndei areco cuimbae —jei.

³⁵ Jayave ángel jei María pe:

—Espíritu Santo outa ndeve. Tumpa imbaepuere rupi cua uyeyapota ndeve. Jáeramo nemembi oata iyoa mbae reve jare jeeta co Tumpa Tai —jei—. ³⁶ Mase, nerentarã Elisabet ipurúa vi, yepe tẽi ucuacuaa ete ma. Seis yasi ma ipurúa oĩ, yepe tẽi ñru vae reta umbijee ‘Imembi mbae vae’ —jei—. ³⁷ Echa'ã Tumpa ipuere uyapo opaete —jei chupe.

³⁸ Jayave María jei ángel pe:

—Mase, che co jae yandeYa pe ayeyocui vae. Tome tuyeyapo cheve nde ndere cheve vae rami —jei.

Jayave ángel oo ye María oĩ vae güi.

María opou Elisabet pe

³⁹ Jayave mbovi ara rupi María oẽ oo voi jenta güi penti tenta guasu ivitu reta re Judea pegua pe. ⁴⁰ Jare oo uvãe Zacarías jenta pe, jare umbisaluda Elisabet. ⁴¹ Jare Elisabet uyandu yave María jei chupe vae, Elisabet imembi omi rai jie pe. Jare Elisabet tinee Espíritu Santo pe. ⁴² Jayave Elisabet ñneeãta reve jei:

—Tumpa nemivendise ete ñru cuña reta güi. Jare umivendiseta nemembi —jei—. ⁴³ Jare yepe tẽi nde co jae cheYa ichirã, ãrei nde ndeyu ndepou chepi. Chepiacañi cua re —jei—. ⁴⁴ Mase, nde nembipi chemingueta rupive, chemembi omi rai cherie pe uyerovia ramo —jei Elisabet María pe—. ⁴⁵ Nde nderovia yandeYa uyapota co jae jei ndeve uyapota vae. Jáeramo jae nemivendise ma —jei.

⁴⁶ Jayave María jei:

“Ambiadora yandeYa.

⁴⁷ Ayerovia Tumpa re.

Jae co chembiansa vae.

⁴⁸ Yepe tẽi che cheparavete, ãrei jae cheparareco.

Mase, añave güive opaete vae jeita Tumpa chemivendise co.

⁴⁹ Echa'ã Tumpa imbaepuere tuicha co.

Jae uyapo icavi vae cheve imbaepuere pe.

Jae co iyoa mbae vae jee vae.

⁵⁰ Jare Tumpa uiparareco opaete uipiü Tumpa vae reta.

⁵¹ Uicuaaca quirãi imbaepuere tuicha co.

Opa umiai uyembicate vae reta.

⁵² Jae uequi imbaepuere mburuvicha reta güi,

jare umbutuichaca ñemimichi vae reta.

⁵³ Umingapii iyembai vae reta tembú icavi vae pe.

Ërei umee'ã co mbae icocatu vae reta pe.

⁵⁴ Ombori Israel pegua uyeyocui chupe vae reta.

Echa'ã imandúa quirãi jei uipararecota co.

⁵⁵ Echa'ã jucuarãi jei yandetenondegua reta pe - jae reta co Abraham jare ñemoñaeta reta.

Echa'ã jei chupe reta uipararecota co jaeño mai pegua” — jei María.

⁵⁶ Jare María upita Elisabet ipi mbapi yasi pegua. Jayave ramo oo ye jenta pe.

Juan oa vae regua

⁵⁷ Jare ara ou uvãe yave Elisabet imembi vaerã, oa imembi cuimbae. ⁵⁸ Jare jerãcua Elisabet jentaigua reta jare jentarã reta pe quirãi yandeYa uiparareco Elisabet. Jare jae reta uyerovia Elisabet ndive.

⁵⁹ Jare sambiai ocho ara ma güinoi yave, jentarã reta yugüeru umicircuncidaca vaerã. Jare jae reta uipota oñono jese tu jee Zacarías. ⁶⁰ Ërei sambiai ichi jei chupe reta:

—Jucuarãi'ã co. Yambijeeta co Juan.

⁶¹ Ërei jae reta jei chupe:

—Mbaeti etei co nerentarã jocua tee güinoi vae.

⁶² Jayave jae reta iñãca omomi Zacarías pe upirandu vaerã chupe mbae nunga tee ra uipota oñono tai re.

⁶³ Jayave Zacarías uechaca chupe reta jae uipota mbae uicuatía jese vae. Jayave uicuatía cuarãi: “Jee co Juan.”

Jare opaete joco pe ñugüinoi vae reta ipiacañi. ⁶⁴ Jayave jupivoi Zacarías ipuere omoë ye iñee. Jare imiari chupe reta umbiadora reve Tumpa. ⁶⁵ Jare opaete Zacarías jentaigua reta ipiacañi cua re. Jare opaete cua uyeyapo vae jerãcua opaete ivitu Judea pegua reta rupi. ⁶⁶ Jare opaete uyandu vae reta ipia pe uyemingueta cua uyeyapo vae re jare jei reta iyupe:

—¿Mbae nunga sambiaí ra co aipo cua? Echa'ã yandeYa imbaepuere oí jae ndive.

Zacarías umimbeu Tumpa iñee

⁶⁷ Jayave Zacarías - jae co Juan tu - tinee Espíritu Santo pe jare umimbeu Tumpa iñee. Echa'ã jae jei:

⁶⁸ “Tuyembiaadora yandeYa Tumpa.

Yande co jae Israel pegua reta.

Echa'ã Tumpa ipiacavi yandevera ramo, yanderepi ma.

⁶⁹ Jae ombou yandevera jembicui David iñemoñaá reta pegua yanembiasa vaerã imbaepuere tuicha vae pe.

⁷⁰ Jucuarã Tumpa jei iyipi güive Tumpa iñee umimbeu vae reta rupi.

Jae reta uñeño tee Tumpa peguarã.

⁷¹ Tumpa yanembiasata yanderoaicho reta güi.

Jae yanembiasata opaete ñanemitarëi vae reta güi.

⁷²⁻⁷³ Tumpa uiparareco Abraham jare ñru yandetenondegua reta.

Echa'ã Tumpa etei uyemingueta Abraham ndive,

jare añave imandúa ma jocua jei uyapota vae re.

⁷⁴ Jáeramo umeeta yandevera yayeyocui vaerã chupe yaquiye mbae reve.

Echa'ã jae yanderepita yanderoaicho reta güi” —jei Zacarías—.

⁷⁵ “Tumpa ñaneño teeta iyupegarã jare yayapota jupi vae,

jare jae icota yande ndive cua ivi pe yaico rambueve.

⁷⁶ Jare ñru vae reta uyemingueta nderé yave, jeita:

‘Jae co penti Tumpa ñnee umimbeu vae.’

Echa'ã nde, cherai, ndeota yandeYa jenonde ndiyapícatu vaerã japerã.

⁷⁷ Nemimbeuta yandeYa imbae reta pe quirãi Tumpa umbiasata chupe reta imbaeyoa reta jare jucuarãi uyembiasacata.

⁷⁸ Cuarãi Tumpa uyapota, yandeparareco ramo.

Jare ipuruparareco jeco pegua ombouta yanembiasa vaerã, opa ara rupi ombou guarasi yanembori vaerã rami.

⁷⁹ Jae yanemborita guarasi jembipe yanembori rami.

Echa'ã guarasi umee yandeve tembipe agüiye vaerã yaico pítumimbi pe.

Jae yanemborita agüiye vaerã yaquiye mano güi.

Jae yanemborita yaico vaerã yandepiacatu reve” —jei Zacarías.

⁸⁰ Jare sambiai ucuacuaa, jare uñemiatangãtu Tumpa coti. Jare ico ñana rupi uyecuaa Israel pegua reta pe regua.

2

Jesús oa vae regua

(Mt 1.18-25)

¹ Juan ichi güi oa yave, romano reta juvicha guasu Augusto César jee vae oyocui opaete vae uyepapaca vaerã.

² Jaeramo opaete vae uyepapaca Cirenio ico ivi Siria pegua reta juvicha guasurã yave. ³ Jare opaete vae yugüiraa itenondegua jenta guasu pe uyepapaca vaerã.

⁴ Jare José vi oo Nazaret Galilea pegua güi tenta guasu Belén Judea pegua pe. Echa'ã jae co David ñnemoñaã reta pegua, jare David jenta guasu co jae Belén. ⁵ Jáeramo José oo Belén pe uyepapaca vaerã, jare güiraa jembireco María. Jare María ipurúa ma. ⁶ Jare Belén pe ñugüinoi

rambueve, ara ou uvãe María imembi oa vaerã. ⁷ Jare María imembiripi cuimbae oa. Jayave María oñoma penti ñomaa pe jare umbiyapacua penti maemimba icaruariru pe. Echa'ã mbaeti co José jare María jendarã tenta pe.

Ángel reta jare ovecha iyandarecoa reta

⁸ Jare jocua pĩtu amocue ovecha iyandarecoa reta uyan-dareco ñugüinoi iovecha reta re ñana rupi coiño tenta guasu Belén güi. ⁹ Jare uyecuaa chupe reta penti ángel yandeYa pe uyeyocui vae, jare jembipe jae reta ñugüinoi vae pe. Echa'ã yandeYa imbaepuere uyecuaa chupe reta. Jare jae reta uquiye ete. ¹⁰ Jayave ángel jei chupe reta:

—Agüiye pequiye. Mase, amimbeuta peve ñee icavi vae tuicha rupi piyerovia vaerã. Cua ñee opaete vae peguarã co —jei—. ¹¹ Echa'ã cua pĩtu oa upurumbiasa vae David jenta guasu pe. Jae co yandeYa Cristo, Tumpa ombou vae —jei ángel chupe reta—. ¹² Jare cuarãi picuaata: Pevãeta sambiaí uñeñoma oĩ penti ñomaa pe jare uyapacua oĩ penti maemimba icaruariru pe —jei.

¹³ Jare jupivoi uyecuaa jocua ángel ndive jeta ete ángel reta. Opaete vae umbiadora Tumpa. Echa'ã jei reta:

¹⁴ “Tuyembiaadoraca Tumpa ara pe oĩ vae, jare ivi pegua reta Tumpa ipiacavi chupe reta vae tipiacatu” —jei.

¹⁵ Jare ángel reta yugüiraa ye yave chugüi reta ara pe, ovecha iyandarecoa reta jei uyupe:

—Yaa Belén pe yaecha vaerã cua uyeyapo vae. Echa'ã yandeYa uicuaaca yandevé —jei reta.

¹⁶ Jayave javoi pegua yugüiraa joco pe, jare uvãe María jare José jare sambiaí. Jocua sambiaí uyapacua oĩ maemimba icaruariru pe. ¹⁷ Jare uecha ma yave, yugüiraa ye umimbeu ñru vae reta pe ángel jei chupe reta jocua sambiaí re vae. ¹⁸ Jare opaete uyandu vae reta

ipiacañi ovecha iyandarecoa reta umimbeu chupe reta vae re. ¹⁹ Ērei María imandúa opaete cua re jare ipia pe uyemingueta cavi jese. ²⁰ Jare ovecha iyandarecoa reta yugüiraa ye Belén güi. Umbiadora reta Tumpa jare umee yasurupai chupe opaete uyandu jare uecha vae re. Echa'ã jae reta uecha ma sambiai ángel jei chupe reta rami.

Güiraa reta Jesús Tumpa jo pe

²¹ Jare sambiai ocho ara ma güinoi yave, tu jare ichi umicircuncidaca jare umbijee Jesús. Echa'ã ángel umimbeu María pe jucuarãi umbijee vaerã ndei María ipurúa mbove.

²² Jare ara ou uvãe María oo vaerã yandeYa jo pe uyeyoeca vaerã yandeYa coti. Echa'ã jucuarãi uyecuatía oĩ Moisés iporoyocui pe cuña imembi vae uyapo vaerã. Jayave tu jare ichi güiraa Jesús tenta guasu Jerusalén pe yandeYa jo pe oñonoca tee vaerã Tumpa peguarã. ²³ Echa'ã yandeYa iporoyocui pe uyecuatía oĩ cuarãi: “Cuña imembiripi cuimbae oa yave, sambiai uñeñoño teeta yandeYa peguarã.” Jucuarãi uyecuatía oĩ. ²⁴ Jáeramo Jesús tu jare ichi uyucaca umee vaerã yandeYa pe mocui güira tórtola jee vae ani mocui picasu tairusu vae. Echa'ã jucuarãi jei uyapo vaerã mboroyocui yandeYa umee chupe reta vae pe.

²⁵ Jare jocua ara penti cuimbae Jerusalén pegua Simeón jee vae oĩ Tumpa jo pe. Simeón jecuaeño uyapo jupi vae jare umbiadora Tumpa. Jae uãro oĩ omborita Israel pegua reta vae ou vaerã. Jare jae tinee Espíritu Santo pe. ²⁶ Jare Espíritu Santo uicuaaca ma Simeón pe quirãi ndarau umano ndei uecha Cristo yandeYa ombouta vae mbove. ²⁷ Jare jocua ara Espíritu Santo uicuaaca ma Simeón pe oo vaerã uique Tumpa jo pe. Jare Jesús tu jare ichi güiraa Jesús uruique Tumpa jo pe uyapo vaerã

mboroyocui jei vae rupi. ²⁸ Jayave Simeón ovoï Jesús jare umbiadora Tumpa. Jae jei:

²⁹ “CheYa, jecuaeño ayeyocui ndeve.

Añave ndepuere nemaño cheré amano vaerã chepiacatu reve.

Echa'ã cuarãi nde ndere cheve uyeyapota co.

³⁰ Aecha ma upurumbiasa vae nde nembou vae.

³¹ Nde ndiparavo opaete vae peguarã.

³² Jae co penti tembipe rami.

Ime tembipe yave, yaecha cavi mbaembae.

Jae ramiño vi jae ndecuaaca cavita judío mbae vae reta pe.

Jare Israel pegua reta uyepiucata jae jeco pegua.

Echa'ã Israel pegua reta nembae reta co” —jei Simeón.

³³ Jare José jare Jesús ichi ipiacañi Simeón jei Jesús re vae re. ³⁴ Jare Simeón jei Tumpa tumivendise José jare María. Jayave jei María pe:

—Mase, Tumpa uiparavo ma cua nemembi. Jae uicuaacata Israel pegua reta pe quía co jae. Ërei jeta Israel pegua reta güirirota jare jeta vae güiroviata jese —jei—.

³⁵ Echa'ã uyecuaata opaete vae ipia pe oï vae. Jare nde etei ndepiatiti eteta jese —jei Simeón María pe.

³⁶ Jare ico vi penti cuña Ana jee vae. Jae co Fanuel tayi. Jocua Fanuel co jae penti ati Aser jee vae pegua. Ana co jae Tumpa iñee umimbeu vae. Ucuacuaa ete ma. Jaeño siete año ico ime ndive. ³⁷ Echa'ã jayave ime umano chugüi. Ana güinoi ma ochenta y cuatro año. Jecuaeño ico Tumpa jo pe jare uyeyocui Tumpa pe. Echa'ã uyecuacu tembíu güi jare uyerure Tumpa pe ara rupi jare pítu rupi. ³⁸ Jae ou uvãe José jare María jare Jesús ñugüinoi vae pe. Jayave jae vi umee yasurupai yandeYa pe, jare imiari Jesús re opaete Jerusalén pegua uãro ñugüinoi Cristo ou uepi vaerã vae reta pe.

Yugüiraa ye Nazaret pe

³⁹ Jare José jare María uyapo yandeYa jo pe opaete yandeYa iporoyocui jei uyapo vaerã vae. Jayave yugüiraa ye Galilea pe jae jenta guasu Nazaret pe. ⁴⁰ Jare sambiaí ucuacuaa jare jatangātu. Iyaracuaa catu vi. Jare Tumpa ipiacavi oĩ jae ndive.

Jesús Tumpa jo pe

⁴¹ Jare opa año Jesús tu jare ichi yugüiraa Jerusalén pe pascua ara pe. ⁴² Jare Jesús doce año ma güinoi yave, oo jae reta jupíe pascua peguarã, jae reta jecoño mai uyapo vae rami. ⁴³ Jare uasa ma yave pascua, Jesús tu jare ichi oẽ Jerusalén güi yugüeru ye vaerã jenta pe. Ërei Jesús upita Jerusalén pe tu jare ichi uicuaa mbae reve. ⁴⁴ Echa'ã jae reta jei tẽi Jesús ou co oĩ iguataĩru reta jupíe. Ërei caaru ma yave, ueca reta tẽi jentarã reta jare ĩru uicuaa vae reta ñugüinoi vae rupi. ⁴⁵ Ërei uvã'e'ã chupe. Jayave Jesús tu jare ichi yugüiraa ye Jerusalén pe ueca vaerã. ⁴⁶ Jare mbapi ara ma uasa yave, uvãe reta chupe Tumpa jo pe. Jesús uguapi oĩ mboroyocui re oporomboe vae reta ipite pe. Uyapisaca oĩ jese reta jare upirandu chupe reta mbaembae re. ⁴⁷ Jare opaete vae ipiacañi. Echa'ã Jesús uicuaa cavi opaete iporomboe jare ipuere umimbeu cavi chupe reta jae reta upirandu chupe mbae re yave. ⁴⁸ Jare Jesús tu jare ichi uecha yave, jae reta vi ipiacañi. Jayave ichi jei Jesús pe:

—Chemembi, ¿maera pa ndiyapo cuarãi oreve? Mase, nderu jare che ndueca tẽi opaete que rupi orepiatiti reve —jei.

⁴⁹ Jayave Jesús jei chupe reta:

—¿Maera pa chereca opaete que rupi? Icavi co apita vaerã cua pe ayapo vaerã cheRu iparaviqui. ¿Picuaa'ã pa cua? —jei chupe reta.

⁵⁰ Ĕrei jae reta uicuaa'ã mbae uipota jei jocua Jesús jei chupe reta vae. ⁵¹ Jayave Jesús ou ye Nazaret pe jae reta jupíe, jare jecuaeño uyapo jae reta jei vae. Jare Jesús ichi imandúa opaete uyeyapo vae re. ⁵² Jare Jesús jecuaeño ucuacuaa oo oĩ. Jare iyaracuaa catu. Jecuaeño umbiyerovia Tumpa jare ĩru vae reta vi.

3

Juan upurumbi bautiza vae umimbeu Tumpa iñee
(Mt 3.1-12; Mr 1.1-8; Jn 1.19-28)

¹⁻² Jare Tiberio César quince año ma

romano reta juvicha guasurã ico yave, Tumpa ombou iñee Juan pe. Juan co jae Zacarías tai, jare ico ñana pe. Jocua ara reta pe Poncio Pilato ico Judea pegua reta juvicha guasurã, jare Herodes ico Galilea pegua reta juvicha guasurã, jare Herodes tiví Felipe jee vae ico ivi Iturea pegua reta jare ivi Traconite pegua reta juvicha guasurã, jare Lisantias ico ivi Abilinia pegua reta juvicha guasurã. Jare Anás jare Caifás yugüireco Israel pegua reta isacerdote tenondegua retarã. ³ Jayave Juan uguata ico opaete iãca Jordán iyipi rupi. Jare umimbeu opaete vae pe ueya vaerã iyemingueta icavi mbae vae ipia pe oĩ vae jare uyembibautizaca vaerã, Tumpa umbiasa vaerã chupe reta imbaeyoa reta. ⁴ Isaías co jae penti Tumpa iñee aracae umimbeu vae. Jae uicuatía cuarãi:

“Jae iñeeãta reve jeita ñana rupi:

‘Piyapicatu yandeYa japerã.

Pemisimi tape’ —jeita—.

⁵ ‘Opaete jugua reta ñemitineeta ivi pe.

Jare opaete ivitu reta uyeyapota ñuu rami.

Jare tape ipãri vae reta ñemisimicata.

Jare tape quipe quipe vae reta ipecavita.

⁶ Jare opaete vae uicuaata quirãi Tumpa ipuere upurumbiasa.’ ”

Jucuarãi uicuatía Isaías.

⁷Jare jeta vae yugüeru Juan oĩ vae pe uyembibautizaca vaerã. Jayave Juan jei chupe reta:

—Pe reta co jae mboi reta rami. ¿Quía pa umimbeu peve piyero vaerã Tumpa coti agüiye vaerã Tumpa uiporaraca peve? —jei—. ⁸Piyapo icavi vae, jucuarãi picuaaca vaerã añetete peeya co piyemingueta icavi mbae vae pepia pe oĩ vae. Agüiye pere piyupe pepia pe: ‘Yan-detenondegua co jae Abraham.’ Echa'ã che jae peve cua: Tumpa ipuere uyapo cua ita reta güi Abraham inemoñaararã —jei Juan chupe reta—. ⁹Yamiñaanga penti temiti. Temiti ía icavi'ã yave, iya uyasía japo reve jare uapi. Jae ramiño vi piyapo'ã yave icavi vae, Tumpa uiporaracata peve —jei.

¹⁰Jayave joco pe ñugüinoi vae reta upirandu Juan pe:

—¿Mbae pa nduyapota?

¹¹Jayave Juan jei chupe reta:

—Ime yave quía mocui temimonde güinoi vae, tumee penti mbaeti temimonde güinoi vae pe. Jare ime yave quía jeta tembú güinoi vae, tumee mbaeti tembú güinoi vae pe —jei.

¹²Yugüeru vi Juan oĩ vae pe mburuvicha peguarã ocovara vae reta uyembibautizaca vaerã. Jae reta upirandu Juan pe:

—Oporomboe vae, ¿mbae pa nduyapota?

¹³Jayave Juan jei chupe reta:

—Agüiye ma pembiasa pecovara mburuvicha reta peocui vae güi.

¹⁴Sundaro reta vi upirandu Juan pe:

—¿Mbae pa nduyapota?

Jayave Juan jei chupe reta:

—Agüiye pemumburu ñru vae reta jare agüiye peapu ñru vae reta re. Jare agüiye jecuaeño pipota jeta peruvicha reta umbiepi peve vae güi.

¹⁵ Opaete vae uãro ñugüinoi Cristo ou vaerã, jare ipia pe uyemingueta quirãï aramoi Juan co jae Cristo. ¹⁶ Jáeramo Juan jei chupe reta:

—Che pumbibautiza i pe. Ërei outa ipuere ete chegüi vae. Jupi'ã co che ayora vaerã ipipasa ichã. Jae pumbibautizata Espiritu Santo pe jare tata pe —jei—. ¹⁷ Jae co trigo uipoo vae rami. Echa'ã trigo uipoo vae umbiveve trigo uequi vaerã iti. Jayave uñuvatu trigo jiru pe. Ërei uapi iti tata pe. Tata Cristo uiporuta vae opa mbae vae co —jei.

¹⁸ Jare Juan jeta jei chupe reta umimbeu vaerã chupe reta ñee icavi vae. ¹⁹ Jare mburuvicha guasu Herodes umenda tivi Felipe jembireco Herodías jee vae ndive jare uyapo jeta mbae icavi mbae vae. Jare Juan iñeengueta Herodes pe opaete icavi mbae vae uyapo vae re. ²⁰ Jayave Herodes uyapo ye icavi mbae vae. Echa'ã oñonoca Juan peresoriru pe.

Juan umbibautiza Jesús

(Mt 3.13-17; Mr 1.9-11)

²¹ Ërei ndei Juan uñeñonoca peresoriru pe mbove, penti ara Jesús ou Juan oï vae pe. Jare Juan ñru vae reta umbibautiza yave, umbibautiza vi Jesús. Jare Jesús uyerure Tumpa pe rambueve, ara uyepea. ²² Jare uyecuaa Espiritu Santo ugüeyi Jesús re picasu rami. Jayave uyendu ñee ara güi jei:

—Nde co jae cheRai nduau ete vae. Chembiyerovia ete —jei.

Jesús itenondegua reta

(Mt 1.1-17)

²³ Jare Jesús güinoi ma treinta año rupi. Ñru vae reta ipia pe uyemingueta tõi jae co José tai ete. José co jae Elí tai. ²⁴ Elí co jae Matat tai. Matat co jae Leví tai. Leví co jae Melqui tai. Melqui co jae Jana tai. Jana co jae José

tai. ²⁵ José co jae Matatías tai. Matatías co jae Amós tai. Amós co jae Nahum tai. Nahum co jae Esli tai. Esli co jae Nagai tai. ²⁶ Nagai co jae Maat tai. Maat co jae Matatías tai. Matatías co jae Semei tai. Semei co jae José tai. José co jae Judá tai. ²⁷ Judá co jae Joana tai. Joana co jae Resa tai. Resa co jae Zorobabel tai. Zorobabel co jae Salatiel tai. Salatiel co jae Neri tai. ²⁸ Neri co jae Melqui tai. Melqui co jae Adi tai. Adi co jae Cosam tai. Cosam co jae Elmodam tai. Elmodam co jae Er tai. ²⁹ Er co jae Josué tai. Josué co jae Eliezer tai. Eliezer co jae Jorim tai. Jorim co jae Matat tai. ³⁰ Matat co jae Leví tai. Leví co jae Simeón tai. Simeón co jae Judá tai. Judá co jae José tai. José co jae Jonán tai. Jonán co jae Eliaquim tai. ³¹ Eliaquim co jae Melea tai. Melea co jae Mainán tai. Mainán co jae Matata tai. Matata co jae Natán tai. ³² Natán co jae David tai. David co jae Isaí tai. Isaí co jae Obed tai. Obed co jae Booz tai. Booz co jae Salmón tai. Salmón co jae Naasón tai. ³³ Naasón co jae Aminadab tai. Aminadab co jae Aram tai. Aram co jae Esrom tai. Esrom co jae Fares tai. Fares co jae Judá tai. ³⁴ Judá co jae Jacob tai. Jacob co jae Isaac tai. Isaac co jae Abraham tai. Abraham co jae Taré tai. Taré co jae Nacor tai. ³⁵ Nacor co jae Serug tai. Serug co jae Ragau tai. Ragau co jae Peleg tai. Peleg co jae Heber tai. Heber co jae Sala tai. ³⁶ Sala co jae Cainán tai. Cainán co jae Arfaxad tai. Arfaxad co jae Sem tai. Sem co jae Noé tai. Noé co jae Lamec tai. ³⁷ Lamec co jae Matusalén tai. Matusalén co jae Enoc tai. Enoc co jae Jared tai. Jared co jae Mahalaleel tai. Mahalaleel co jae Cainán tai. ³⁸ Cainán co jae Enós tai. Enós co jae Set tai. Set co jae Adán tai. Adán co jae Tumpa tai.

4

Aña guasu umingueta Jesús uyavica vaerã tẽi chupe
(Mt 4.1-11; Mr 1.12-13)

¹ Jare Jesús ou ye Jordán güi. Jae tinee Espiritu Santo pe. Jayave Espiritu Santo güiraa Jesús ñana pe. ² Jare Jesús upita ñana pe cuarenta ara, jare aña guasu umingueta uyavica vaerã tẽi chupe. Jare jocua ara reta pe Jesús jou'ã mbae ave. Jáeramo jocua ara reta opa ma yave, iyembaí. ³ Jayave aña guasu jei Jesús pe:

—Nde co jae Tumpa Tai yave, ere cua ita pe uyeyapo vaerã mbiyaperã.

⁴ Ërei Jesús jei chupe:

—Tumpa iñee pe uyecuatía oĩ cuarãi: 'Icavi co ivi pegua reta jou vaerã mbiyape güinoi vaerã tecove. Ërei icavi ete co uyapisaca vaerã Tumpa iñee re jare uyapo vaerã jei vae güinoi vaerã tecove opa mbae vae.' Jucuarãi uyecuatía oĩ —jei.

⁵ Jayave aña guasu güiraa Jesús penti ivitu guasu ivate vae re jare uechaca chupe penti jeia pe opaete mburuvicha guasu reta iporoyocua ivi pe ñugüinoi vae reta.

⁶ Jayave aña guasu jei Jesús pe:

—Tamee ndeve mbaepuere ndiyeyapo vaerã opaete cua juvicha guasurã, opaete vae nembiadora vaerã. Echa'ã cua mbaepuere uñemee co cheve jare chepuere amee aipota amee chupe vae pe —jei—. ⁷ Nde ndiyeatca yave chembiadora vaerã, tamee ndeve nembraerã —jei.

⁸ Jayave Jesús jei chupe:

—Esiri chegüi, Satanás. Echa'ã Tumpa iñee pe uyecuatía oĩ cuarãi: 'Che co jae ndeYa Tumpa. Chembiadora. Jaeño cheve iyeyocui.' Jucuarãi uyecuatía oĩ —jei.

⁹ Jayave aña guasu güiraa Jesús Jerusalén pe jare umbuyupi Tumpa jo iyapite re. Jayave jei chupe:

—Nde co jae Tumpa Tai yave, ea cua güi. ¹⁰ Echa'ã Tumpa iñee pe uyecuatía oĩ cuarãi:

‘Tumpa oyocuita ángel reta uyandareco vaerã nderé.

¹¹ Ipo pe ndepisi ndeocota reta, agüiye vaerã ndepi uyere-rocua ita re.’

Jucuarãi uyecuatía oĩ —jei aña guasu chupe.

¹² Jayave Jesús jei chupe:

—Tumpa iñee pe uyecuatía oĩ cuarãi: ‘Che co jae ndeYa Tumpa. Agüiye mbae iyapo ndicuaa vaerã tuicha ra chepiaguasu.’ Jucuarãi uyecuatía oĩ —jei.

¹³ Jare aña guasu opa ma umingueta yave uyavica vaerã tẽi chupe, usiri chugüi michi pegua.

Jesús umbipi iparaviqui

(Mt 4.12-17; Mr 1.14-15)

¹⁴ Jayave Jesús ou ye Galilea pe. Jare güinoi mbaepuere Espíritu Santo umee chupe vae. Jare jerãcua jese opaete jocua ivi rupi. ¹⁵ Jare jae oporomboc judío reta itupao reta pe jare opaete vae umbiadora.

Jesús Nazaret pe

(Mt 13.53-58; Mr 6.1-6)

¹⁶ Jayave ou ye Nazaret pe - joco pe jae ucuacuaa. Jayave mbutuu ara pe uique judío reta itupao pe uyapoñoi rami, jare uyemboi Tumpa iñee umingueta vaerã. ¹⁷ Jare uñemee Jesús pe penti libro. Jocua libro pe oĩ Tumpa iñee aracae umimbeu vae Isaías uicuatía vae. Jayave Jesús uipea libro jare uvãe umingueta vaerã. Jayave umingueta cuarãi:

¹⁸ “YandeYa iEspíritu ime che ndive oĩ.

Jae cheparavo amimbeu vaerã ñee icavi vae iparavete vae reta pe.

Jae chembou ambipiacatu vaerã ipiatiti vae reta.

Chem bou vi amimbeu vaerã pereso reta pe ipuere ma uyeyora,

jare amimbeu vaerã jesa mbae vae reta pe umae vaerã.
Chembou vi ayora vaerã uiporara vae reta uiporaraca
chupe vae reta imbaepuere güi.

¹⁹ Chembou vi amimbeu vaerã yandeYa ipiacavita opaete
vae pe.”

Jucuarãi umingueta. ²⁰ Jayave Jesús uyuquenda ye libro
jare umee ye libro iyandarecoa pe. Jayave uguapi ye. Jare
opaete tupao pe ñugüinoi vae reta umae ngatu Jesús re.

²¹ Jayave Jesús jei chupe reta:

—Cua ara cua uyecuatía oĩ vae uyeyapo ma perovaque.

²² Jare opaete joco pe ñugüinoi vae reta uyemingueta
cavi jese. Echa'ã ipiacañi ñnee icavi ete vae re. Jae reta jei:

—¿Jae'ã yera cua José tai?

²³ Jayave Jesús jei chupe reta:

—Pereta co cheve jocua yamijaanga reve yae vae:
'Nde co jae penti upurupiano vae. Jáeramo ñnepiano.
Echa'ã jerãcua oreve quirãi mbaembae ndiyapo Caper-
naum pe. Jáeramo iyapo vi cua pe ndeivi pe' —pereta,
jei—. ²⁴ Añete che jae peve, ime yave quía Tumpa ñnee
umimbeu jentaigua reta pe vae, jae reta güirovia'ã —jei—

. ²⁵ Añete che jae peve, jeta cuña ime umano vae reta
yugüireco Israel pe Elías ico rambueve. Mbapi año jare
seis yasi oqui'ã jare caruai opaete que rupi —jei—. ²⁶ Ërei
Tumpa omondo'ã Elías penti cuña ime umano vae Israel
pegua pe. Jaeño omondo penti cuña ime umano vae tenta
guasu Sarepta Sidón pegua vae pe —jei Jesús chupe reta—

. ²⁷ Jae ramiño vi jeta ipire oculi vae reta yugüireco Israel
pe Tumpa ñnee aracae umimbeu vae Eliseo ico rambueve.
Ërei Tumpa omondo'ã Eliseo umbigüera vaerã penti ipire
oculi vae Israel pegua. Jaeño omondo umbigüera vaerã
Naamán, jare Naamán co jae Siria pegua —jei.

²⁸ Cua uyandu reta yave, opaete tupao pe ñugüinoi vae
reta pochi ete Jesús pe. ²⁹ Jayave jae reta upña jare güiraa

Jesús tenta guasu güi ivitu iyapite re omombo vaerã tēi ivi coti joco güi. Jocua tenta guasu oĩ ivitu guasu re. ³⁰ Ërei Jesús uasa jae reta ipite rupi jare oo chugüi reta.

Cuimbae aña oya jese vae

(Mr 1.21-28)

³¹ Jayave Jesús oo tenta guasu Capernaum Galilea pegua pe. Joco pe Jesús oporomboe opaete mbutuu ara pe. ³² Jare uyapisaca jese vae reta ipiacañi iporomboe re. Echa'ã omboe reta mbaepuere güinoi vae rami. ³³ Jare uique oo tupao pe cuimbae aña oya jese vae. Jae iñeeãta reve jei:

³⁴ —¿Maera pa ndeyu oremambeco, Jesús Nazaret pegua? ¿Ndeyu pa oremicañitei vaerã? Che nducuaa. Nde co jae Tumpa Tai —jei.

³⁵ Jayave Jesús uñeengata chupe.

—¿Nequii! ¡Esiri chugüi! —jei.

Jayave opaete vae jovaque aña uiti ivi re cuimbae jare usiri chugüi. Ueya caviño. ³⁶ Jare opaete uecha vae reta ipiacañi, jare upirandu uyupe:

—¿Mbae nunga ñee pa cua? Echa'ã mbaepuere pe oyocui aña reta usiri vaerã oya jese vae reta güi, jare jae reta uyapo oyocui vae —jei reta.

³⁷ Jare jerãcua jesequa opaete jocua ivi rupi.

Jesús umbigüera Simón jaicho

(Mt 8.14-15; Mr 1.29-31)

³⁸ Jare Jesús tupao güi oẽ ye yave, uique Simón jenta pe. Jare Simón jaicho tanta jacu oĩ. Īru joco pe ñugüinoi vae reta uyerure Jesús pe umbigüera vaerã. ³⁹ Jayave Jesús oo cuña oĩ vae pe, jare jei jacu upita vaerã chugüi. Jayave jacu upita chugüi. Jayave jupivoiño cuña upña jare umee mbae jou reta vaerã.

Jesús umbigüera imbaerasi vae reta

(Mt 8.16-17; Mr 1.32-34)

⁴⁰Jare guarasi uique ma yave, opaete jentarã imbaerasi vae güinoi vae reta güeru imbaerasi vae reta Jesús oĩ vae pe. Jare Jesús oñono ipo penti penti re jare umbigüera reta. ⁴¹Jare aña reta usiri oya jese vae reta güi. Usapicai reta jare jei:

—Nde co jae Tumpa Tai.

Ërei Jesús uñeengata chupe reta. Umaeño'ã aña reta re uyemingueta vaerã. Echa'ã jae reta uicuaa jae co Cristo, Tumpa ombou vae.

Jesús oo Galilea rupi umimbeu Tumpa iñee

(Mr 1.35-39)

⁴²Piareve pe Jesús oẽ tenta guasu güi oo quĩ ngatu vae pe. Jayave tenta guasu pegua reta yugüiraa ueca. Jare yugüiraa uvãe yave jae oĩ vae pe, uyerure tẽi chupe agüiye vaerã oo chugüi reta. ⁴³Ërei Jesús jei chupe reta:

—Icavi co aa vaerã ñru tenta guasu-rai reta pe amimbeu vaerã joco pe vi ñee icavi vae Tumpa iporoyocua regua. Echa'ã cuarã Tumpa chembou —jei.

⁴⁴Jare oo opaete ivi Galilea rupi, jare umimbeu Tumpa iñee judío reta itupaopao rupi.

5

Uipisi reta jeta ete pira

(Mt 4.18-22; Mr 1.16-20)

¹Jare penti ara Jesús uyemboi rambueve i guasu Gene-saret jee vae jembei pe, jeta vae yugüeru jae oĩ vae pe uyapisaca vaerã Tumpa iñee re. ²Jare Jesús uecha mocui chalana i jembei pe. Iya reta pira uipisi vae reta co. Cua iya reta ueya joco pe, pisa reta oyoe rambueve. ³Jayave Jesús uyupi penti chalana pe, jare uyerure Simón pe uruique vaerã chalana i pe. Echa'ã Simón imbae co jocua chalana.

Jayave Jesús uguapí chalana pe jare joco güi omboe joco pe ñugüinoi vae reta.

⁴Jare opa ma uyemingueta yave, Jesús jei Simón pe:

—Ecuá i tipí vae pe pemombo pepísa reta pipísi vaerã pira.

⁵Jayave Simón jei Jesús pe:

—CheYa, orecõe ma nduparaviqui tõi. Nduipísi'ã mbae ave. Ërei tamombo pisa reta nde ndere cheve ramo —jei.

⁶Jare jucuarãi uyapo reta ma yave, jeta ete pira reta uique pisa pe. Jare pisa uyembipi osoro. ⁷Jayave uyepueru reta ñru ñru chalana pe ñugüinoi vae reta pe yugüeru vaerã ombori. Jayave jae reta yugüeru jare umítinee reta mocui reve chalana. Jare mocui reve poi ete jare usacambu pota echa. ⁸Jare Simón Pedro cua uecha yave, uyeatica Jesús jovai jare jei chupe:

—Esiri chegüi, cheYa. Echa'ã che co jae penti cuimbae iyoa vae —jei.

⁹Echa'ã Pedro jare opaete jae ndive ñugüinoi vae reta ipiacañi jeta ete pira uipísi vae re. ¹⁰Jae ramiño vi Simón ñru reta Jacobo jare Juan jee vae ipiacañi jese. Jacobo jare Juan Zebedeo tai reta co. Jayave Jesús jei Simón pe:

—Agüiye equiye. Che nduyapota ñru vae reta nderu vaerã cheve cua ara güiive —jei.

¹¹Jayave jae reta güeru ichalana reta i jembei pe. Jayave ueya reta opaete, yugüiraa vaerã Jesús Jupíe.

Jesús umbigüera cuimbae ipire ocui vae

(Mt 8.1-4; Mr 1.40-45)

¹²Jare Jesús oo uvãe yave penti tenta guasu pe, joco pe oí penti cuimbae ipire ocui vae. Cuimbae uecha Jesús yave, uyeatica jae jovai jare uyerure chupe.

—CheYa —jei—, ndipota yave, ndepuere chembigüera.

¹³Jayave Jesús oñono ipo jese.

—Aipota. Ecuera —jei chupe.

Jare jupivoiño cuimbae ucuera imbaerasi güi. Ocui'ã ma ipire. ¹⁴ Jayave Jesús oyocui:

—Agüiye emimbeu quía pe. Ecu iyeechaca sacerdote pe, jare emee ofrenda Moisés peocui rami, tenta guasu pegua reta uicuaa vaerã ndecuera ma co —jei.

¹⁵ Ërei jeta vae uyandu Jesús uyapo vae regua. Jayave jeta vae uyembati jae oĩ vae pe uyapisaca vaerã jese jare jae umbigüera vaerã imbaerasi vae reta. ¹⁶ Ërei Jesús oo chugüi reta ñuu coti uyerure vaerã Tumpa pe.

*Jesús umbigüera cuimbae ipuere mbae omi vae
(Mt 9.1-8; Mr 2.1-12)*

¹⁷ Jare penti ara Jesús oporombocue oĩ, jare amocue fariseo reta jare mboroyocui re oporombocue vae reta uguapi ñugüinoi jocoropi. Jae reta yugüeru Jerusalén jare opaete tenta guasu Galilea jare Judea pegua reta güi. Jare Jesús güinoi Tumpa imbaepuere umbigüera vaerã imbaerasi vae reta. ¹⁸ Jayave amocue yugüeru vae reta güeru penti cuimbae imbaerasi vae jupa reve. Cua cuimbae ipuere mbae omi vae. Güeru vae reta uipota tẽi uruique imbaerasi vae o pe, oñono vaerã Jesús jovai.

¹⁹ Ërei ipuere'ã uruique Jesús oĩ vae pe, uyembiape'ã ye ñugüinoi reta ramo. Jáeramo uruyupi o iárambo jare uipea chupe Jesús jese catu. Joco pe umbigüeyi jocua cuimbae ipuere mbae omi vae jupa reve opaete vae ipite pe Jesús jovai. ²⁰ Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe:

—Nembaeyoa reta uyembai ma, cherivi.

²¹ Jayave mboroyocui re oporombocue vae reta jare fariseo reta ipia pe uyemingueta: “¿Quía pa co jae cuarã jei vaerã? Jei icavi mbae vae Tumpa coti. Tumpaño co ipuere umbiasa quía pe imbaeyoa reta.” ²² Ërei Jesús uicuaa jae reta ipiyemingueta, jare jei chupe reta:

—¿Maera pa pepia pe piyemingueta jucuarãi?
²³ Chepuere jae cua cuimbae pe: ‘Nembaeyoa reta uyembai ma.’ Jae ramiño vi chepuere jae chupe: ‘Epũa eguata.’ ¿Mbae nunga pa yavai jae vaerã? —jei Jesús chupe reta —. ²⁴ Ërei aipota picuaa vaerã cua: Che cuimbaerã ayeyapo vae chepuere ambiasa quía pe imbaeyoa reta cua ivi pe aĩ rambueve —jei.

Jayave jei cuimbae ipuere mbae omi vae pe:

—Che jae ndeve: Epũa evoi nderupa, jare ecua nerenta pe —jei.

²⁵ Jayave jupivoi cuimbae upũa, jare ovoĩ jupa, jare oẽ oo jenta coti opaete joco pe ñugüinoi vae reta jovaque. Jare oo rambueve, umbiadora Tumpa. ²⁶ Jae ramiño vi opaete joco pe ñugüinoi vae reta umbiadora Tumpa. Echa'ã opareve ipiacañi jare uquiye. Jei reta:

—Cua añave yaecha vae ñanemipiacañi.

Jesús ueni Leví

(Mt 9.9-13; Mr 2.13-17)

²⁷ Jayave Jesús oẽ jare uecha mburuvicha peguarã ocovara vae Leví jee vae uguapi õĩ mburuvicha peguarã ocovara ñugüinoi vae pe, jare jei chupe:

—Eyu cherupíe.

²⁸ Jayave Leví upũa, jare oo jae jupíe. Ueya opaete imbaembae joco pe.

²⁹ Jare Leví uyapo para guasu jae jenta pe Jesús peguarã. Jare joco pe jeta mburuvicha peguarã ocovara vae reta jare ñru vae reta ucaru vi ñugüinoi Jesús jare ñru reta ndive. ³⁰ Ërei mboroyocui re oporomboe vae reta jare fariseo reta iñeenguru Jesús jemimboe reta pe. Jei reta:

—¿Maera pa pecaru mburuvicha peguarã ocovara vae reta jare teco icavi mbae vae uyapo vae reta ndive?

³¹ Jayave Jesús jei chupe reta:

—Icove catu vae reta ueca'ã upurupiano vae. Imbaerasi vae retaño ueca —jei—. ³² Che ayu aeca vaerã iyoa vae reta ueya vaerã iyemingueta icavi mbae vae ipia pe oĩ vae. Ayu'ã aeca vaerã jupi vae reta —jei.

*Maera Jesús jemimboe reta uyecuacu'ã tembú güi
(Mt 9.14-17; Mr 2.18-22)*

³³ Jare amocue vae yugüeru Jesús oĩ vae pe jare jei chupe:

—Juan jemimboe reta jeta vese uyecuacu tembú güi uyerure reve Tumpa pe. Jae ramiño vi uyapo jucuarã fariseo reta jemimboe reta. Ërei nderemimboe reta ucaruñoi —jei reta.

³⁴ Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembú güi, umendata vae jae reta ndive oĩ rambueve —jei—. ³⁵ Ërei outa uvãe ara umendata vae uyereraaca vaerã chugüi reta. Jayave ramo uyecuacuta tembú güi —jei.

³⁶ Jayave imiari chupe reta umijaanga reve.

—Icavi'ã yamboya vaerã temimonde indechi vae maemboyaa ipiau vae pe. Echa'ã jucuarã yayapo yave, maemboyaa ipiau vae umiãta temimonde indechi vae, jare temimonde jeiete osoro —jei—. ³⁷ Jae ramiño vi icavi'ã yambiru vaerã vino ipiau vae vino jiru guacapi indechi vae pe. Echa'ã jucuarã yayapo yave, vino ipiau vae omondoro jiru, jare vino uyepiyere, jare jiru icavi'ã ma —jei—. ³⁸ Jáeramo yambiru vino ipiau vae jiru ipiau vae pe —jei—. ³⁹ Jare ime yave quía vino indechi vae jou vae, uipota'ã jupivoi jou vino ipiau vae. Echa'ã jae jei vino indechi vae icavi ete vino ipiau vae güi —jei.

6

Jesús jemimboe reta uipoo trigo mbutuu ara pe

(Mt 12.1-8; Mr 2.23-28)

¹ Mbutuu ara pe Jesús oo co rupi jemimboe reta ndive. Jare jemimboe reta uipoo trigo. Jayave uipoquitì uequi vaerã ipire, trigo jou vaerã. ² Jare amocue fariseo reta jei chupe reta:

—¿Maera pa piyapo piyapota'ã tēi mbutuu ara pe vae?

³ Jayave Jesús jei fariseo reta pe:

—¿Pemingueta'ã pa David uyapocue vae regua, jae jare jae ndive ñugüinoi vae reta iyembai yave? —jei—. ⁴ David uique Tumpa jo pe jare jou mbiyape Tumpa jo pe uñeñono tee vae reta, jare umee vi jae ndive ñugüinoi vae reta pe. Agüiyeta tēi co quía jou jocua mbiyape, jaeño sacerdote reta —jei.

⁵ Jayave Jesús jei chupe reta:

—Che cuimbaerã ayeyapo vae chepuere jae mbae icavi uyeyapo vaerã mbutuu ara pe.

Cuimbae ipo jovaicho tipa vae

(Mt 12.9-14; Mr 3.1-6)

⁶ Jare ñru mbutuu ara pe Jesús uique judío reta itu-pao pe jare oporomboe. Jare joco pe oñ penti cuimbae ipo iyacata tipa vae. ⁷ Jare mboroyocui re oporomboe vae reta jare fariseo reta umaie ngatu Jesús re, uecha vaerã umbigüerata ra quía mbutuu ara pe. Echa'ã uipota tēi umbijeco vaerã. ⁸ Èrei Jesús uicuaa jae reta ipiayemingueta, jare jei cuimbae ipo jovaicho tipa vae pe:

—Epüa eyu iyemboi cua reta jovai.

Jayave cuimbae upüa uyemboi joco pe ñugüinoi vae reta ipite pe. ⁹ Jayave Jesús jei chupe reta:

—Tapirandu peve cua: ¿Mbae pa jei mboroyocui? ¿Yayapota pa icavi vae ani icavi mbae vae mbutuu ara pe?

¿Icavi pa yapuruepi ani yapuruyuca vaerã mbutuu ara pe?
—jei.

¹⁰ Jayave umae opaete iyipi rupi ñugüinoi vae reta re,
jare jei cuimbae pe:

—Eupi ndepo.

Jayave cuimbae ipo uupi, jare ucuera voi.

¹¹ Jayave mboroyocui re oporomboe vae reta jare
fariseo reta pochi ete Jesús pe jare uyemboemboe mbae
ra uyapota Jesús pe.

Jesús uiparavo doce jemimondo retarã

(Mt 10.1-4; Mr 3.13-19)

¹² Jayave penti pĩtu Jesús oo ivitu guasu re uyerure
vaerã Tumpa pe, jare icõe joco pe uyerure Tumpa pe.

¹³ Jare cõe ma yave, ueni jemimboe reta. Jayave uipar-
avo doce umbijee temimondo reta vae: ¹⁴ Simón (Jesús
umbijee Pedro), jare Simón tiví Andrés jee vae, jare Jacobo
jare Juan, jare Felipe, Bartolomé, ¹⁵ Mateo, Tomás, Alfeo
taí Jacobo jee vae, Simón (jae co Zelote pe ueni vae),
¹⁶ Jacobo tiví Judas jee vae, jare Judas Iscariote (cua
cuimbae umee Jesús jovaicho reta pe).

Jesús omboe jeta vae

(Mt 4.23-25)

¹⁷ Jayave Jesús ugüeyi ye ivitu guasu güi ñuu pe jae
reta ndive. Jare joco pe ñugüinoi jeta Jesús jemimboe
reta jare jeta Judea pegua reta jare Jerusalén pegua reta
jare tenta guasu Tiro jare Sidón iyipi rupigua reta. Tiro
jare Sidón coiño co ñugüinoi i guasu güi. Opaete vae
yugüeru uyapisaca vaerã Jesús re, jare Jesús umbigüera
vaerã imbaerasi vae reta. ¹⁸ Jesús umbigüera vi aña oya
jese vae reta. ¹⁹ Jare opaete vae uipota uyaviqui Jesús.
Echa'ã jae güinoi mbaepuere umbigüera vaerã opaete
imbaerasi vae reta.

Uyerovia vae reta
(Mt 5.1-12)

²⁰ Jayave Jesús umaē jemimboē reta re jare jei:

—Tuyerovia iparavete vae reta. Echa'ã Tumpa umeeta chupe reta yugüireco vaerã iporoyocua pe —jei—.

²¹ Tuyerovia añave iyembai vae reta. Echa'ã Tumpa jeta umeeta chupe reta. Tuyerovia añave uyao vae reta. Echa'ã upucata reta —jei—. ²² Īru vae reta pemitarẽita jare

ndarau uipota yugüireco peĩrurã. Jae reta jeita icavi mbae vae peve jare uyeminguetata peãgüe pe. Cuarãi uyapota reta peve, pe reta perovia cheré ramo. Che co jae cuimbaerã uyeyapo vae. Ĕrei piyerovia —jei Jesús—.

²³ Jocua ara ou uvãe yave, piyerovia. Echa'ã Tumpa güinoi ara pe mbae icavi ete vae pembraerã. Echa'ã jucuarãi uyapota reta peve vae itenondegua reta uyapo cua nunga icavi mbae vae Tumpa iñee aracaē umimbeu vae reta pe

—jei—. ²⁴ Ĕrei icocatu vae reta uiporarata co. Echa'ã jae reta uyerovia ma jeta corepoti güinoi vae re —jei Jesús chupe reta—. ²⁵ Jare jeta güinoi vae reta uiporarata co.

Echa'ã iyembaita reta. Añave upuca reta. Ĕrei ipiatitita reta jare uyaota reta —jei—.

²⁶ Jare opaete vae jei icavi vae jese vae reta uiporarata co. Echa'ã jucuarãiño vi uyapo itenondegua reta upurumbitavi vae reta pe. Jocua upurumbitavi vae reta jei iyapu reve: 'Che co jae Tumpa iñee umimbeu vae' —jei Jesús—.

Peau perovaicho reta
(Mt 5.38-48; 7.12)

²⁷ Ĕrei che jae pe reta piyapisaca cheré vae pe cua: Peau perovaicho reta, jare piyapo icavi vae pemitarẽi vae reta pe —jei—.

²⁸ Īru vae reta uyepipeyu peré yave jare icavi mbae vae jei peve yave, piyerure Tumpa pe jae umivendise reta vaerã —jei—. ²⁹ Ime yave quía ocua nderovaique re

vae, erova ipuere vaerã ocua ye jovaicho re. Jare ime yave quía ndeasoya upĩro ndegüi vae, emaeño jese upĩro vaerã ndegüi ndecamisa vi —jei—. ³⁰ Ime yave quía uyerure ndeve mbae re vae, emee chupe. Jare ime yave quía nembambae upĩro ndegüi vae, agüiye inemiacatẽi chupe —jei—. ³¹ Piyapo ñru vae reta pe pipota ñru vae reta uyapo vaerã peve vae rami —jei chupe reta—.

³² Echa'ã peau yave perau vae retaño, jocua mbaeti co mbae icavi vae. Echa'ã iyoa vae reta uyapo vi jucuarãi —jei—. ³³ Jare piyapo yave icavi vae icavi vae uyapo peve vae reta peño, jocua mbaeti co mbae icavi vae. Echa'ã iyoa vae reta uyapo vi jucuarãi —jei—. ³⁴ Jare piporuca yave mbae ñru vae pe jae umee ye peve vaerãño, jocua mbaeti co mbae icavi vae. Echa'ã iyoa vae reta uiporuca mbaembae ñru vae pe jocua ñru vae umbijecovia ye chupe vaerã —jei—. ³⁵ Ërei peau perovaicho reta, jare piyapo icavi vae chupe reta. Piporuca mbae ñru vae pe jare agüiye peãro umbijecovia ye peve vaerã. Jucuarãi piyapo yave, Tumpa umeeta peve mbae icavi ete vae jare peapota tai retarã. Echa'ã Tumpa ipiacavi umee'ã yasurupai chupe vae reta pe jare icavi mbae vae uyapo vae reta pe —jei—. ³⁶ Piparareco ñru vae reta, peRu uiparareco rami —jei—.

Iñera ñru vae re
(Mt 7.1-5)

³⁷ Agüiye piñera ñru vae re, agüiye vaerã ñru vae iñera peré. Agüiye pembijeco ñru vae mbae re, agüiye vaerã ñru vae pembijeco mbae re. Pembiasa ñru vae pe, ñru vae umbiasa vaerã peve —jei—. ³⁸ Pemee mbaembae ñru vae reta pe, jare ñru vae reta umeeta mbaembae peve. Jae reta umeeta peve jeta ete ñru vae reta pe pemee vae güi. Echa'ã icavi vae piyapo yave ñru vae reta pe, ñru vae reta uyapota icavi vae peve. Ërei icavi mbae vae piyapo yave ñru vae reta pe, ñru vae reta uyapota icavi mbae vae peve —jei.

³⁹ Jayave Jesús jei chupe reta umijaanga reve:

—Penti jesa mbae vae ipuere'ã etei uechaca tape ñru jesa mbae vae pe. Jucuarãi uyapo yave, mocui reve uasavita ivicua pe —jei—. ⁴⁰ Penti uyemboe oĩ vae uicuaa ete'ã oporomboe vae uicuaa vae rami. Ërei opaete re uyemboe yave, uicuaata oporomboe vae uicuaa rami —jei—.

⁴¹ Agüiye emae ití michi vae neĩru jesa pe oĩ vae re, ime yave nenoí ití tuicha vae nderesa pe —jei—. ⁴² Ndarau ndepuere ndere neĩru pe: ‘Cherivi, taequi nderesa güi jocua ití michi vae.’ Echa'ã nde nenoí ití tuicha vae nderesa pe. Nde co jae upurumbitavi vae. Eequi rani ití tuicha vae nderesa güi. Jayave nemaes cavita ndepuere vaerã ndeequi ití michi vae neĩru jesa güi —jei—.

Ía icavi vae jare ía icavi mbae vae

(Mt 7.17-20; 12.33-35)

⁴³ Penti temiti icavi vae umee'ã ía icavi mbae vae. Jae ramiño vi penti temiti icavi mbae vae umee'ã ía icavi vae —jei—. ⁴⁴ Echa'ã yaicuaa penti temiti icavi co, ía icavi yave. Yaequi'ã íva penti yai jãti vae güi. Jae ramiño vi yaequi'ã uva penti yai jãti vae güi —jei—. ⁴⁵ Quía nunga jecocavi vae güinoí icavi vae ipia pe. Jáeramo jei icavi vae. Jae ramiño vi quía nunga jecopochi vae güinoí icavi mbae vae ipia pe. Jáeramo jei icavi mbae vae. Echa'ã penti penti uyemingueta ipia pe güinoí vae rupi —jei—.

Tenta iguapica

(Mt 7.24-27)

⁴⁶ ¿Maera pa pere cheve: ‘OreYa, oreYa’? Echa'ã piyapo'ã che jae peve piyapo vaerã vae —jei—. ⁴⁷ Ime yave quía ou cheve uyapisaca vaerã cheré vae, jae uyapo yave che jae chupe uyapo vaerã vae, tamijaanga peve mbae rami co jae —jei—. ⁴⁸ Jae co penti cuimbae jentarã uyapo vae rami. Oyoo quipe oñono vaerã tenta iguapicarã itape

re. Jare tenta uyeyapo ma yave, tuicha oqui jare jeta ete i usiri tenta iyipi rupi. Ërei tenta omi'ã etei. Echa'ã iyapoa oñono itape re —jei—. ⁴⁹ Ërei ime yave quía uyapisaca cheré vae, uyapo'ã yave che jae chupe uyapo vaerã vae, jae co ñru cuimbae jentarã uyapo vae rami. Ërei jae oyoo'ã oñono vaerã tenta iguapicarã itape re. Oñono jentarã ivi iaramboño. Jayave tuicha oqui jare jeta ete i usiri tenta iyipi rupi jare opa umbiyapara. Opa uyembai jocua tenta —jei.

7

Jesús umbigüera sundaro reta juvicha jembiocui
(Mt 8.5-13)

¹ Jare opa ma imiari yave uyapisaca jese vae reta pe, Jesús oo Capernaum pe. ² Jare jocua tenta guasu pe ico penti sundaro reta juvicha jembiocui. Cua cuimbae imbaerasi. Umano pota echa. Jare sundaro reta juvicha uau cua jembiocui. ³ Jare sundaro reta juvicha uyandu Jesús regua. Jáeramo omondo Jesús oĩ vae pe amocue judío reta itenondegua reta, jae reta uyerure vaerã Jesús pe oo vaerã umbigüera sundaro reta juvicha jembiocui. ⁴ Jare yugüeru uvãe yave Jesús oĩ vae pe, uyerure chupe cua re. Jei reta chupe:

—Cua mburuvicha ipiacavi co. Jáeramo icavi co nde ndiyapo vaerã cua chupe. ⁵ Echa'ã jae yanderau jare uyapo yandeve penti tupao —jei reta. ⁶⁻⁷ Jayave Jesús oo jae reta jupíe. Jare yugüiraa ma uvãe yave coiño mburuvicha jenta güi, mburuvicha ombou amocue ñru reta uñeovãiti vaerã Jesús ndive. Jae reta jei chupe:

—Mburuvicha jei: 'Agüiye iyemambeco, cheYa, ndeyu vaerã cherenta pe. Echa'ã mbae'ã co che. Jáeramo aa'ã noovãiti. Ndepuere ndere joco güiño cherembiocui ucuera vaerã, jare ucuerata co' —jei, jei reta chupe—.

⁸ ‘Echa'ã ime mburuvicha mbaepuere güinoi cheré vae reta. Jae ramiño vi che anoi mbaepuere sundaro reta re. Che jae penti sundaro pe: Ecuá, jare jae oo. Jae ramiño vi che jae ñru sundaro pe: Eyu, jare jae ou. Jae ramiño vi che jae cherembiocui pe: Iyapo cua, jare jae uyapo’ —jei, jei reta.

⁹ Jare Jesús cua uyandu yave, ipiacañi sundaro reta juvicha re. Jayave uyerova jare jei jeta vae yugüiraa jaicue vae pe:

—Che jae peve, avãe'ã cua nunga mburugüirovia tuicha vae Israel pegua reta ipite pe.

¹⁰ Jayave sundaro reta juvicha ombou vae reta yugüiraa ye sundaro reta juvicha jenta pe, jare uecha ucuera ma co uyeyocui vae imbaerasi ico vae.

Jesús umbijecove ye cuña ime umano vae imembi cuimbae

¹¹ Jayave piareve pe Jesús oo tenta guasu Naín pe. Jare jeta jemimboe reta jare ñru vae reta yugüiraa jae jupíe. ¹² Jare oo ma uvãe yave coiño tenta guasu jonque güi, umano vae güeru vae reta yugüeru tenta guasu güi. Umano vae penti cuimbae co jare ichi penti cuña ime umano vae co. Umano vae jocua cuña imembi jae vaeño co. Jare jeta tenta guasu pegua reta yugüeru jocua cuña jupíe. ¹³ Jare yandeYa uecha yave cuña, uiparareco jare jei chupe:

—Agüiye iyao.

¹⁴ Jayave Jesús oo uyaviqui umano vae jiru. Jare ovoi güeru vae reta uyemboi. Jayave Jesús jei tairusu vae pe:

—Che jae ndeve: Epña.

¹⁵ Jayave umano vae uguapi jare umbipi uyemingueta. Jayave Jesús umee ye ichi pe. ¹⁶ Jayave opaete vae uquiye. Umbiadora reta Tumpa. Jei reta:

—Penti Tumpa iñee umimbeu vae ipuere ete vae ou ma yandepite pe. Tumpa ombou yandev yanderau ramo. Echa'ã yande co jae imbae reta —jei reta.

¹⁷ Jare Jesús uyapo vae jerãcua opaete Judea rupi jare opaete Judea iyipi rupigua rupi.

*Juan ombou jemimboe reta Jesús oĩ vae pe
(Mt 11.2-19)*

¹⁸ Jare Juan jemimboe reta umimbeu Juan pe opaete cua regua. ¹⁹ Jayave Juan ueni mocui jemimboe reta jare ombou yandeYa oĩ vae pe jei vaerã chupe:

—¿Nde pa co jae Cristo outa vae? ani ¿nuãrota pa ñru vae ou vaerã?

²⁰ Jayave jocua cuimbae reta yugüeru uvãe Jesús oĩ vae pe jare jei chupe:

—Juan upurumbibautizase vae orembou ndeve. Jae jei: ‘¿Nde pa co jae Cristo outa vae? ani ¿nuãrota pa ñru vae ou vaerã?’ —jei, jei reta.

²¹ Jayave jocua ora pe etei Jesús umbigüera jeta imbaerasi vae reta jare umbisiri aña reta oya jese vae reta güi. Jae ramiño vi umbigüera jeta jesa mbae vae reta, jae reta umae vaerã. ²² Jayave Jesús jei Juan ombou chupe vae reta pe:

—Pecua ye pemimbeu Juan pe peecha jare piyandu vae. Jesa mbae vae reta umae ma. Ipuere mbae uguata vae reta uguata ma. Ipire ocui vae reta ucuera ma. Iyapisa mbae vae reta uyandu ma. Umano vae reta icove ye ma. Iparavete vae reta uyapisaca ñee icavi vae re —jei—. ²³ Jare Tumpa umivendiseta jecuae güirovia cheré vae reta —jei chupe reta.

²⁴ Jare yugüiraa ye yave Juan ombou vae reta, Jesús umbipi umingueta joco pe ñugüinoi vae reta Juan re. Jei chupe reta:

—¿Quía re pa co peo ñana pe pemae? Jae ipirãta mbae vae'ã co tacuarãsi omi ivitu uipeyu yave vae rami —jei—. ²⁵ ¿Quía re pa co peo pemae? Jae omonde'ã temimonde ipõra vae. Mase, temimonde ipõra vae omonde vae reta yugüireco mburuvicha guasu reta jenta pe jare icavi ete yugüireco —jei—. ²⁶ ¿Peo ra pemae vaerã penti Tumpa iñee umimbeu vae re? Añete che jae peve, Tumpa umee chupe uyapo vaerã jeta ete ñru Tumpa iñee umimbeu vae reta uyapo vae güi —jei—. ²⁷ Tumpa iñee pe uyecuatía oĩ jese cuarãi:

'Mase' —jei Tumpa—, 'che amondota chiñee güiraata vae nderenonde, uyapicatu vaerã nderaperã.'

Jucuarãi uyecuatía oĩ —jei chupe reta—. ²⁸ Che jae peve, Tumpa umee Juan upurumbibautizase vae pe uyapo vaerã jeta ete ñru Tumpa iñee umimbeu vae reta uyapo vae güi. Ërei taicuegua vae Tumpa iporoyocua pegua uyembutuichaca eteta Juan güi —jei—. ²⁹ Jare mburuvicha peguarã ocovara vae reta jare opaete uyapisaca Juan re vae reta uicuaaca Tumpa jupi co. Echa'ã Juan umbibautiza reta —jei—. ³⁰ Ërei fariseo reta jare mboroyocui re oporomboe vae reta uyapo'ã Tumpa jei uyapo vaerã vae. Echa'ã uyembibautizaca'ã Juan pe —jei.

³¹ Jayave Jesús jei chupe reta:

—Tamimbeu peve mbae ndive amboyovaque añave yugüireco vae reta. Tamimbeu peve mbae rami co jae reta —jei—. ³² Jae reta co sambiaí plaza pe uguapí ñugüinoi vae reta rami. Jae reta jei uyupe cuarãi: 'Nduyemimbi ma peve, ãrei pe reta pepirae'ã. Orepiatiti perovaque, ãrei pe reta piyao'ã.' Jucuarãi jei —jei—. ³³ Echa'ã Juan upurumbibautizase vae ou, jare jae uyecuacu tembú jare vino güi. Jáeramo pe reta pere aña oya co Juan re —jei—. ³⁴ Che cuimbaerã ayeyapo vae ayu, jare che ayecuacu'ã

tembíu jare vino güi. Jáeramo pe reta pere: ‘Mase, jae jou jeta tembíu jare vino. Jae co mburuvicha peguarã ocovara vae reta jare teco icavi mbae vae uyapo vae reta iamigo’ —pere, jei—. ³⁵ Ērei opaete iyaracuaa vae reta uicuaaca aracuaa icavi co —jei.

Jesús Simón jenta pe

³⁶ Jare penti fariseo uparea Jesús pe oo vaerã ucaru jae ndive. Jayave Jesús oo fariseo jenta pe jare uguapí ucaru vaerã. ³⁷ Jare penti cuña aguasa rupi ico vae jocua tenta guasu pegua uicuaa Jesús ucaru co oí fariseo jenta pe, jare güeru mbae ipiche cavi vae jiru ita alabastro jee vae pegua pe. ³⁸ Jayave cuña uyemboi Jesús icupe coti jare uyao. Jare umbipí umãqui Jesús ipi jesai pe. Jayave cuña umitini Jesús ipi ía pe jare uyurupite vi ipi. Jayave uipichi mbae ipiche cavi vae ipi re. ³⁹ Jare fariseo Jesús pe uparea vae cua uecha yave, jei iyupe ipia pe: “Cua cuimbae penti Tumpa iñee umimbeu vae yave, uicuaata tēi quía co cua cuña jare mbae nunga cuña co jae. Echa'ã iyoa vae co” —jei.

⁴⁰ Jayave Jesús jei fariseo pe:

—Simón, aipota mbae jae ndeve.

—Ere cheve, oporomboe vae —jei Jesús pe.

⁴¹ Jayave Jesús jei chupe:

—Mocui cuimbae ipía ĩru cuimbae pe. Penti cuimbae ipía chupe quinientos ara mbaraviqui jepi pegua, jare ĩru cuimbae ipía chupe cincuenta ara mbaraviqui jepi pegua —jei—. ⁴² Ērei mocui reve mbaeti güireco corepoti ipía umbiepi vaerã. Jayave upurumbipía vae opa umicañi mocui reve pe ipía —jei—. Emimbeu cheve, upurumbipía vae cua uyapo ramo, cua mocui vae güi ¿quía nunga pa uau eteta upurumbipía vae? —jei.

⁴³ Jayave Simón jei Jesús pe:

—Che chepia pe ayemingueta jocua cuimbae jeta ipía opa umicañi chupe vae.

Jayave Jesús jei chupe:

—Jaecavi ndere.

⁴⁴ Jayave Jesús uyerova cuña coti jare jei Simón pe:

—Mase, emae cua cuña re. Che aique nerenta pe yave, neme'eã cheve i ayoe vaerã chepi. Ërei jae umãqui ma chepi jesai pe jare umitini ía pe —jei—. ⁴⁵ Nde cheyurupite'ã. Ërei cua cuña aique güive uyurupite chepi —jei—. ⁴⁶ Nde niñono'ã aceite cheãca re. Ërei cua cuña uipichi mbae ipiche cavi vae chepi re —jei—. ⁴⁷ Jáeramo che jae ndeve, yepe tẽi jeta cua cuña imbaeyoa reta, ãrei ambiãsa chupe. Echa'ã jae cherau ete. Ërei ime yave quía michiño ïru vae umbiãsa chupe vae, jae michiño vi uau jocua ïru vae —jei.

⁴⁸ Jayave Jesús jei cuña pe:

—Ambiãsa ma ndeve nembraeyoa reta.

⁴⁹ Jayave Jesús ndive ucaru ñugüinoi vae reta jei iyupe ipia pe: “¿Quía ra co cua? ¿Quirãita ra ipuere umbiãsa quía pe imbaeyoa reta?”

⁵⁰ Ërei Jesús jei cuña pe:

—Ndiyembiasaca ma nderovia cheré ramo. Ecuã ndepiacatu reve —jei.

8

Cuña ombori Jesús vae reta

¹ Jare cua jaicue rupi Jesús oo opaete tenta guasu reta jare tenta guasu-rai reta rupi, jare umimbeu ñee icavi vae Tumpa iporoyocua regua. Jare jocua doce vae yugüiraa jae jupíe. ²⁻³ Jare jeta cuña reta yugüiraa vi jae jupíe jare ombori Jesús jare jemimboe reta. Mbaembae uata Jesús jare jemimboe reta pe yave, jocua cuña reta ogua chupe reta. Tenonde yave amocue jocua cuña reta imbaerasi jare

aña reta oya amocue vae re. Ërei Jesús umbigüera. Penti cuña jee co María Magdalena. Jesús umbisiri siete aña reta chugüi. Ìru jee co Juana. Jae co Chuza jembireco. Chuza co jae mburuvicha guasu Herodes jembiocui. Ìru jee co Susana.

Jesús umijaanga umaeti vae

(Mt 13.1-9; Mr 4.1-9)

⁴ Jare jeta vae yugüeru opaete tenta guasu reta güi uyembati Jesús oĩ vae pe. Jayave Jesús jei chupe reta umijaanga reve:

⁵ —Penti cuimbae oo umaeti vaerã. Umaeti yave, umiai temiti, jare amocue oa tape rupi. Jayave ìru vae reta upĩro temiti re jare güira reta jou vi —jei—. ⁶ Ìru temiti oa mboviño ivi itape iárambo oĩ vae pe. Ërei oẽ rupive, ipiru, jocua ivi ñãqui ngatu'ã ramo —jei—. ⁷ Ìru temiti oa ñanapite pe. Ñana ucuacuaa yave, opa uyuca temiti —jei—. ⁸ Ìru temiti oa ivicavi pe. Cua oẽ jare ucuacuaa jare jeta ete ía —jei.

Jare cua jei ma chupe reta yave, iñeeãta reve jei:

—Uipota uyandu vae tuyapisaca cua ñee re.

Maera Jesús oporomboe umijaanga reve

(Mt 13.10-17; Mr 4.10-12)

⁹ Jayave Jesús jemimboe reta upirandu Jesús pe:

—¿Mbae pa uipota jei cua nemijaanga reve ndere vae?

¹⁰ Jayave Jesús jei chupe reta:

—Amimbeu ma peve Tumpa iporoyocua regua. Cua uyecuaa'ã ìru vae reta pe. Jáeramo amboe ìru vae reta amijaanga reve. Cua ayapo agüiye vaerã uicuaa cavi, yepe tẽi uecha, jare agüiye vaerã uicuaa, yepe tẽi uyandu —jei—

Umaeti vae uyemijaanga jese vae

(Mt 13.18-23; Mr 4.13-20)

¹¹ Cua amijaanga reve che jae peve vae uipota jei cua: Temiti uyemijaanga Tumpa iñee re —jei—. ¹² Jocua temiti tape rupi oa vae uyemijaanga amocue Tumpa iñee uyandu vae re. Jayave ou aña guasu chupe reta jare umiacañi Tumpa iñee güi, agüiye vaerã güirovia Tumpa uyembiasaca vaerã —jei—. ¹³ Jae ramiño vi jocua temiti uñeñoti mboviño ivi itape íarambo oĩ vae pe vae uyemijaanga ñru vae reta Tumpa iñee uyandu vae re. Jae reta uyandu rupive, güirovia uyerovia reve. Ërei cua reta jocua temiti japo quipe'ã vae rami co. Echa'ã michi peguaño güirovia ñee. Ërei mbaesusere uyeyapo chupe yave, uipota'ã ma uyapisaca reta Tumpa iñee re —jei—. ¹⁴ Jae ramiño vi jocua temiti uñeñoti ñanapite pe vae uyemijaanga ñru vae reta Tumpa iñee uyandu vae re. Ërei umbipi uyemipia'ã ivi pe mbaembae uyeyapo vae re jare corepoti uipota güinoi vaerã vae re jare yerovia ivi pegua re. Jáeramo jae reta jocua temiti ia'ã vae rami co —jei—. ¹⁵ Ërei jocua temiti uñeñoti ivicavi pe vae uyemijaanga ñru vae reta Tumpa iñee uyandu vae re. Cua reta uyapisaca cavi Tumpa iñee re ipiacavi reve, jare uyapo Tumpa iñee jei uyapo vaerã vae. Jáeramo jae reta jocua temiti ía cavi vae rami co. Jae reta uyapo icavi vae ipiaguasu reve —jei Jesús—.

Uñeñomi vae uyeechacañotai co
(Mr 4.21-25)

¹⁶ Mechero yamiendi yave, ndarau ñañono yapepo uyembovapo oĩ vae igüi pe, ani güirapembi igüi pe. Ñañono co mechero jenda pe, o pe uique vae reta güinoi vaerã tembipe —jei—. ¹⁷ Ime yave mbae uñeñomi vae, uyeechacañotai co. Jae ramiño vi ime yave mbae uyeyasoi vae, uyecuaañotai co —jei—. ¹⁸ Pepia pe piyemingueta cavi piyandu vae re. Echa'ã güinoi vae pe uñemiruta,

jare mbaeti güinoi vae güi mbovi ete güinoi echa vae uyeequita —jei.

*Jesús ichi jare tivi reta
(Mt 12.46-50; Mr 3.31-35)*

¹⁹ Jayave Jesús ichi jare tivi reta yugüeru uvãe Jesús oĩ vae pe. Ërei ipuere'ã oya Jesús re jeta joco pe ñugüinoi vae reta jeco pegua. ²⁰ Jayave amocue vae jei Jesús pe:

—Ndesi jare nderivi reta oca pe ñugüinoi. Ndereca ñugüinoi —jei reta chupe.

²¹ Jayave Jesús jei chupe reta:

—Cua reta uyapisaca Tumpa iñee re jare uyapo jei vae. Cua nunga reta co jae chesi jare cherivi reta —jei.

*Jesús umiquĩ i guasu
(Mt 8.23-27; Mr 4.35-41)*

²² Jare penti ara Jesús uyupi chalana pe jemimboe reta ndive. Jayave Jesús jei chupe reta:

—Yaa i guasu jovaicho pe.

Jayave umbipi uasa i guasu. ²³ Ërei uasa ñugüinoi rambueve, Jesús oque oĩ. Jare ou ivitu tanta uyepayu, jare i uyembiapararoa uique chalana pe, jare umitinee seri ma. Jae reta ipia pe uyemingueta umanota co. ²⁴ Jayave omomba reta Jesús, jare jei chupe:

—¡Oporomboe vae, oporomboe vae! Ñamanota ma.

Jayave Jesús upña, jare uñeengata ivitu jare i guasu pe. Jare jupivoiño upita ivitu, jare opaete quĩ ngatu. ²⁵ Jayave Jesús jei chupe reta:

—¿Maera pa pepurugüirovia'ã?

Jare jae reta uquiye jare ipiacañi, jare jei uyupe:

—¿Mbae nunga cuimbae pa cua? Echa'ã jae oyocui ivitu jare i guasu, jare jae reta uyapo oyocui vae —jei reta.

*Cuimbae Gadara pegua aña reta oya jese vae
(Mt 8.28-34; Mr 5.1-20)*

²⁶ Jayave yugüiraa Galilea güi uvãe i guasu jovaicho pe, gadareno reta iivi pe. ²⁷ Jesús ugüeyi ma chalana güi yave, ou oovãiti penti cuimbae jocua tenta guasu pegua. İma ma añã reta oya jese. Nani ico. Ico'ã etei tenta rupi. Teögüerirurenda rupiño ma ico. ²⁸ Cua cuimbae uecha Jesús yave, usapıcai jare uyeatica Jesús jovai. Jayave iñeeãta reve jei:

—¿Maera pa ndeyu chemambeco, Jesús? Nde co jae Tumpa ara pe oĩ vae Tai. Ayerure ndeve agüiye iporaraca cheve —jei.

²⁹ Echa'ã Jesús oyocui ma añã usiri vaerã cuimbae güi. İma ma uyembiiya jese. Jare ĩru vae reta uipocua tẽi ipo jare ipi cadena pe. Ērei jae opa omondoo cadena reta. Jare jecuaeño oo ñana coti añã omondo ramo. ³⁰ Jare Jesús upirandu chupe:

—¿Mbae pa nderee?

—Cheree co jae jeta vae —jei.

Echa'ã jeta añã reta oya jese. ³¹ Jayave añã reta uyerure Jesús pe agüiye vaerã oyocui reta yugüiraa vaerã umanocue vae reta ipi. ³² Jare joco pe jeta cuchi reta ucaru ñugüinoi ivıtu guasu re. Jayave añã reta uyerure Jesús pe umaeño vaerã jese reta oya vaerã cuchi reta re. Jayave Jesús umaeño jese reta. ³³ Jayave añã reta usiri cuimbae güi, jare oya cuchi reta re. Jayave cuchi reta tanta osi ivia rupi oa i guasu pe, jare joco pe opa ipitupa reta.

³⁴ Jare cuchi iyandarecoa reta cua uecha yave, osi yugüiraa tenta guasu pe umimbeu joco pegua reta jare icoti'ã rupigua reta pe cua uyeyapo vae regua. ³⁵ Jayave uyandu vae reta yugüeru, uecha vaerã mbae uyeyapo vae. Jare yugüeru uvãe yave Jesús oĩ vae pe, uecha cuimbae añã reta oyase jese vae uguapi oĩ Jesús jovai. Uecha uyemonde ma jare iyaracuaaño ma oĩ. Jare opaete yugüeru vae reta uquiye. ³⁶ Jare jocua tenonde yave uecha vae reta

umimbeu ñru reta pe quirãï uyeyapo cuimbae añã reta oyase jese vae pe jae ucuera vaerã. ³⁷ Jayave opaete gadareno reta umiñera Jesús oo ye vaerã jae reta iivi güi. Echa'ã uquiye ete reta. Jayave Jesús uyupi ye chalana pe yugüiraa ye vaerã chugüi reta. ³⁸ Jare cuimbae añã reta oyase jese vae uyerure Jesús pe umaño vaerã jese oo vaerã jae jupíe. Ërei Jesús umaño'ã jese. Jei chupe:

³⁹ —Eua nerenta pe emimbeu ñru vae reta pe mbae icavi vae Tumpa uyapo ndeve vae.

Jayave cuimbae oo, jare umimbeu ñru vae reta pe opaete tenta guasu rupi mbae icavi vae Jesús uyapo chupe vae.

Jairo tayi jare cuña Jesús jemimonde uyaviqui vae
(Mt 9.18-26; Mr 5.21-43)

⁴⁰ Jare Jesús oo uvãe yave i guasu jovaicho pe, joco pe ñugüinoi vae reta umae jese uyerovia reve. Echa'ã uãro ñugüinoi. ⁴¹ Jayave ou penti cuimbae Jairo jee vae. Jae co judío reta itupao re uyandareco vae. Jae uyeatica Jesús jovai, jare uyerure chupe oo vaerã jae jenta pe. ⁴² Echa'ã jae güinoi pentiño tayi doce año rupi güinoi vae. Umano pota echa ma. Jayave Jesús oo jae jupíe. Jare jeta yugüiraa Jesús jupíe, jare oyopi reta. ⁴³ Jare jae reta ipite pe oo penti cuña doce año ma uiporara tugüiguasu vae. Cuña opaete ma icorepoti umee iyugüi upurupiano vae reta pe. Ërei penti ave ipuere'ã umbigüera. ⁴⁴ Jayave cuña oya Jesús re icupe coti, jare uyaviqui jemimonde jembei. Jare jupivoi jugüiguasu upita chugüi. ⁴⁵ Jayave Jesús jei:

—¿Quía pa cheremimonde uyaviqui?

Opaete vae jei uyaviqui'ã co jemimonde. Jare Pedro jei Jesús pe:

—Oporomboe vae, jeta ete ñugüinoi cua pe jare ndeopi reta co. ¿Maera pa ndere: ‘Quía pa cheremimonde uyaviqui?’ —jei.

⁴⁶ Ĕrei Jesús jei:

—Quía nunga vae uyaviqui co cheremimonde. Echa'ã aicuaa ambigüera ma co chembaepuere pe quía —jei.

⁴⁷ Jayave cuña uicuaa ipuere'ã ma uñemi Jesús güi. Jayave ou icoti uriri reve jare uyeatica Jesús jovai. Jayave umimbeu chupe opaete vae jovaque maera uyaviqui jemi-monde jare quirã jupivoi ucuera. ⁴⁸ Jayave Jesús jei chupe:

—Ndecuera ma, cherindi, nderovia cheré ramo. Ecuandepiacatu reve —jei.

⁴⁹ Jare Jesús uyemingüeta oĩ rambueve, penti vae ou uvãe tupao re uyandareco vae jenta güi.

—Umano ma nderayi —jei—. Agüiye ma emambeco oporomboe vae —jei.

⁵⁰ Ĕrei Jesús cua uyandu yave, jei tupao re uyandareco vae pe:

—Agüiye ndepiatiti. Epurugüiroviaño. Ucuerata co —jei.

⁵¹ Jare oo uvãe yave tenta pe, Jesús umaño'ã ĩru reta re uique vaerã jae ndive, jaño Pedro, Jacobo jare Juan, jare cuñatai tu jare ichi. ⁵² Jare opaete joco pe ñugüinoi vae reta uyao jare jãse ñugüinoi. Jayave Jesús jei chupe reta:

—Agüiye piyao. Umano'ã co. Oqueño co oĩ —jei.

⁵³ Ĕrei jae reta oyoyai. Echa'ã uicuaa reta umano co.

⁵⁴ Jayave Jesús uipisi cuñatai ipo pe.

—¡Cuñatai, epña! —jei.

⁵⁵ Jayave cuñatai icove ye, jare jupivoi upña. Jayave Jesús oyocui umingarü vae vaerã cuñatai. ⁵⁶ Jare cuñatai tu jare ichi ipiacañi. Ĕrei Jesús oyocui reta agüiye vaerã umimbeu quía pe ave mbae uyeyapo vae.

9

Jesús omondo jocua doce jemimboe reta
(Mt 10.5-15; Mr 6.7-13)

¹ Penti ara Jesús opa umbati jocua doce jemimboe reta, jare umee chupe reta mbaepuere umbisiri vaerã añã reta oya jese vae reta güi jare umbigüera vaerã imbaerasi vae reta. ² Jayave omondo reta umimbeu vaerã Tumpa iporoyocuia jare umbigüera vaerã imbaerasi vae reta.

³ Jare jei chupe reta:

—Agüiye mbae peraa. Agüiye peraa pepopoca. Agüiye peraa peurupucu, perembiurã jare corepoti. Jare agüiye peraa mocui camisa —jei—. ⁴ Peo pevãe yave penti tenta pe, joco pe peĩ jocua tenta guasu güi peo ye regua —jei—. ⁵ Jare ime yave penti tenta guasu pegua reta uipota'ã pepita vaerã joco pe vae, peo joco güi yave, pemitimo ivicuii pepi güi, uicuaa vaerã jae reta co teco güinoi —jei.

⁶ Jayave jae reta yugüiraa tenta guasu-rai reta rupi. Umimbeu reta ñru vae reta pe ñee icavi vae jare opaete uguata vae rupi umbigüera imbaerasi vae reta.

Juan imano

(Mt 14.1-12; Mr 6.14-29)

⁷ Jare mburuvicha guasu Herodes uyandu opaete Jesús uyapo vae regua. Jayave ipiacañi. Echa'ã amocue vae jei: —Juan icove ye ma ou umanocue vae reta ipite güi.

⁸ Jare ñru vae reta jei:

—Jae co Elías ou ye vae.

Jare ñru vae reta jei:

—Jae co penti Tumpa iñee aracae umimbeu vae icove ye ma ou umanocue vae reta ipite güi vae. ⁹ Ërei Herodes jei: —Añãcasiaca co Juan. Ërei ¿quía ra co cua? Echa'ã ayandu ma jeta jesequa —jei.

Jáeramo Herodes uipota uecha Jesús.

Jesús umingararu cinco mil cuimbae reta

(Mt 14.13-21; Mr 6.30-44; Jn 6.1-14)

¹⁰ Jare Jesús jemimondo reta yugüeru ye Jesús oĩ vae pe, jare umimbeu Jesús pe opaete uyapo vae regua. Jayave

Jesús güiraa reta quíi ngatu vae pe coiño tenta guasu Betsaida güi. ¹¹ Ērei jeta vae uicuaa yave, yugüiraa jaicue. Jare Jesús umbiresive cavi jare imiari chupe reta Tumpa iporoyocua re jare umbigüera imbaerasi vae reta.

¹² Caaru ma yave, jocua doce vae yugüeru Jesús oĩ vae pe jare jei chupe:

—Emondo cua jeta vae tenta tenta rupi, joco pe ucaru vaerã jare oque vaerã. Echa'ã mbaeti tenta cua rupi —jei reta.

¹³ Ērei Jesús jei chupe reta:

—Pe reta pemee tucaru.

—Jaeño ime nonoi pandepo mbiyape jare mocui pira — jei reta—. ¿Ndoota pa ndogua opaete cua reta jembaliurã?

¹⁴ Echa'ã cuimbae retaño uyepapa cinco mil rupi.

Jayave Jesús jei jemimboe reta pe:

—Tuyembatĩmbatĩ cincuenta rupi tuguapĩ.

¹⁵ Jayave jucuarãi uyapo reta. Jei reta opaete joco pe ñugüinoi vae reta pe uguapĩ vaerã. ¹⁶ Jayave Jesús uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisãa mbiyape jare pira, jare umee jemimboe reta pe, jae reta umee vaerã opaete joco pe uguapĩ ñugüinoi vae reta pe. ¹⁷ Opareve ucaru, jare iyangapiĩ reta. Jayave Jesús jemimboe reta umbatĩ tembíu uñepisãacue jembire vae, jare umitinee doce canasta.

Pedro jei Jesús co jae Cristo, Tumpa ombou vae

(Mt 16.13-20; Mr 8.27-30)

¹⁸ Penti ara Jesús oo jeta vae ipite güi uyerure vaerã Tumpa pe. Jare jemimboe reta joco pe ñugüinoi jae ndive. Jayave Jesús upirandu chupe reta:

—¿Quía pa co che ĩru vae reta pe? —jei.

¹⁹ Jae reta jei chupe:

—Amocue vae jei nde co jae Juan upurumbibautizase vae, jare ñru vae reta jei nde co jae Elías, jare ñru vae reta jei nde co jae penti Tumpa iñee aracae umimbeu vae icove ye ma ou umanocue vae reta ipite güi vae —jei reta.

²⁰ Jayave Jesús upirandu chupe reta:

—Jare ¿quía pa co che peve? —jei.

Jayave Pedro jei chupe:

—Nde co jae Cristo, Tumpa ombou vae —jei.

Jesús umimbeu umanota co

(Mt 16.20-28; Mr 8.30-9.1)

²¹ Jayave Jesús oyocui ete reta agüiye vaerã umimbeu quía pe. ²² Jayave Jesús jei chupe reta:

—Che cuimbaerã ayeyapo vae aiporara eteta. Jare judío reta itenondegua reta jare sacerdote reta itenondegua reta jare mboroyocui re oporomboe vae reta ndarau uipota aico vaerã juvicha guasurã, jare cheyucacata. Ërei mbapí ara rupi aicove yeta ayu umanocue vae reta ipite güi —jei.

²³ Jayave Jesús jei opaete vae pe:

—Ime yave quía uipota oo cherupíe vae, tiñacañi iyugüi, tovoi icurusu opa ara, jare too cherupíe —jei—. ²⁴ Uipota uñuvatu jecove vae ndarau ipuere. Ërei jocua umeeta jecove chereco pegua vae uñuvatuta co —jei—. ²⁵ ¿Mbae ra uminganata quía, umingana yave opaete ivi pegua, ãrei ipuere'ã yave uñuvatu jecove? —jei—. ²⁶ Ime yave quía imara cheré jare chiñee re vae, che cuimbaerã ayeyapo vae chemarata vi jese, ayu ye yave ayembutuichaca vaerã chembaepuere reve, cheRu imbaepuere reve, jare ángel uñeñono tee Tumpa peguarã vae reta imbaepuere reve —jei—. ²⁷ Ërei añete che jae peve, ndei amocue cua pe ñugüinoi vae umano mbove, uechata reta Tumpa iporoyocua —jei Jesús.

Jesús uyemiambie
(Mt 17.1-8; Mr 9.2-8)

²⁸ Jare ocho ara rupi cua jei rendave pe, Jesús güiraa Pedro, Juan jare Jacobo ñru vae reta ipite güi, jare uyupi penti ivitu guasu re uyerure vaerã Tumpa pe. ²⁹ Jare Jesús uyerure Tumpa pe rambueve, jova uyemiambie jare jemimonde tĩ asi jare uvera. ³⁰ Jare mocui cuimbae uyemingueta ñugüinoi Jesús ndive. Jae reta co Moisés jare Elías. ³¹ Mocui reve uyecuaa tembipe ipõra ete vae re jare uyemingueta reta Jesús imano re, quirãi umanota co Jerusalén pe. ³² Ërei Pedro jare jae ndive ñugüinoi vae jopei jare oque. Ërei usareco ye, jare uecha Jesús ipõra ete, jare uecha vi jocua mocui cuimbae Jesús ndive ñugüinoi vae reta. ³³ Jare Moisés jare Elías yugüiraa yeta ma yave, Pedro jei Jesús pe:

—Oporomboe vae, icavi co ñaã vaerã cua pe. Turuyapo mbapi guarasãa ñanaroqui pegua, penti nembraerã, penti Moisés peguarã jare penti Elías peguarã —jei.

Echa'ã Pedro uicuaa'ã mbae jei vae.

³⁴ Jare Pedro cua jei rambueve, ou amapĩtu umiguarasãa reta. Jare jae reta uquiye amapĩtu umiguarasãa yave. ³⁵ Jayave uyendu ñee amapĩtu güi jei:

—Cua co jae cheRai aau ete vae. Piyapisaca jese —jei.

³⁶ Jare ñee opa ma yave, jae reta uecha'ã quía joco pe, jaeño Jesús. Jare jocua ara reta pe jae reta umimbeu'ã quía pe ave mbaembae uecha vae.

Jesús umbigüera cunumi añã oya jese vae
(Mt 17.14-21; Mr 9.14-29)

³⁷ Jare piareve pe ivitu guasu güi ugüeyi reta yave, jeta vae yugüeru uñeovãiti jae reta ndive. ³⁸ Jayave penti cuimbae yati vae reta ipite pe oĩ vae jei Jesús pe:

—Oporomboe vae, ayerure ndeve netae vaerã cherai re. Jae co cherai jae vaeño. ³⁹ Aramoño penti aña oya jese jare umbisapicai. Jayave umbiriri ete jare cunumi iyuru tiriyai. Jayave uyembipere. Jecuaeño uyapo jucuarã chupe —jei—. ⁴⁰ Ayerure tẽi ma nderemimboe reta pe umbisiri vaerã aña chugüi, ãrei ipuere'ã reta —jei.

⁴¹ Jayave Jesús jei joco pe ñugüinoi vae reta pe:

—Yavai ete pe reta cua ivi pe pico vae pepurugüirovia vaerã. ¿Quirã regua ra apitata pe reta ndive? ¿Quirã regua ra arupiata peve? —jei.

Jayave jei cunumi tu pe:

—Eru nderai cua pe.

⁴² Jare cunumi ou rambueve, aña uipiaca jare umbiriri ete. Jayave Jesús uñeengata aña pe. Jayave umbigüera cunumi jare umee ye tu pe. ⁴³ Jare opaete joco pe ñugüinoi vae reta ipiacañi Tumpa imbaepuere tuicha vae re. Ërei ipiacañi rambueve opaete Jesús uyapo vae re, Jesús jei jemimboe reta pe:

Jesús umimbeu ye umanota co

(Mt 17.22-23; Mr 9.30-32)

⁴⁴ —Piyapisaca cavi cua jae peve vae re. Echa'ã che cuimbaerã ayeyapo vae penti vae chemeeta cherovaicho reta pe —jei.

⁴⁵ Ërei jae reta uicuaa cavi'ã mbae Jesús jei chupe reta vae. Yavai chupe reta uicuaa vaerã, jare uipiu reta upirandu vaerã chupe jese.

Tenondegua vae

(Mt 18.1-5; Mr 9.33-37)

⁴⁶ Jayave jae reta umbipi uyemingueta quía ra tenondegua ñru reta güi vae. ⁴⁷ Jare Jesús uicuaa chugüi reta ipiyemingueta. Jayave ueni penti sambiai jare oñono iyipi pe. ⁴⁸ Jayave jei jemimboe reta pe:

—Ime yave quía uyapo icavi vae cua nunga sambiai pe cheree pe vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe. Echa'ã pepite pe oĩ vae uñemímichi vae icota tenondeguarã —jei.

Oyovaicho'ã yande ndive vae yanembori co
(Mr 9.38-40)

⁴⁹ Jayave Juan jei Jesús pe:

—Oporomboe vae, nduecha penti cuimbae nderee pe umbisiri aña reta oya jese vae reta güi, jare ndoe chupe agüiye ma uyapo vaerã. Echa'ã jae ñaneĩru'ã co —jei.

⁵⁰ —Agüiye pere chupe jucuarãi —jei Jesús chupe—. Echa'ã oyovaicho'ã yande ndive vae yanembori co —jei.

Jesús uñeengata Jacobo jare Juan pe

⁵¹ Jare outa ma uvãe Jesús oo ye vaerã ara pe. Jáeramo iquirẽi ete oo Jerusalén pe. ⁵² Jayave omondo amocue jemimboe reta jenonde. Jae reta yugüiraa penti tenta guasu-rai ivi Samaria pegua pe uyapicatu vaerã Jesús peguarã. ⁵³ Ërei joco pegua reta uipota'ã Jesús upita vaerã joco pe. Echa'ã uicuaa reta jae oo Jerusalén coti. ⁵⁴ Jare Jesús jemimboe reta Jacobo jare Juan cua uicuaa yave, jei reta Jesús pe:

—OreYa, ¿ndipota pa ore ndoyocui tata ou vaerã ara güi opa vaerã uapi cua tenta guasu-rai pegua reta Elías uyapo rami?

⁵⁵ Ërei Jesús uyerova icoti jare uñeengata chupe reta. Jei chupe reta:

—Agüiye pere jucuarãi. ⁵⁶ Echa'ã che cuimbaerã ayeyapo vae ayu apurumbiasa vaerã. Ayu'ã apurumicañitei vaerã —jei.

Jayave yugüiraa ñru tenta guasu-rai coti.

Uipota oo Jesús jupíe vae

(Mt 8.19-22)

⁵⁷ Jare tape rupi uguata reta rambueve, penti cuimbae jei Jesús pe:

—Taa nderupíe opaete que rupi ndeo vae rupi.

⁵⁸ Jayave Jesús jei chupe:

—Aguara reta güinoi icua reta, jare güira reta güinoi jaiti reta. Ërei che cuimbaerã ayeyapo vae mbaeti cherenta —jei.

⁵⁹ Jare Jesús jei ñru cuimbae pe:

—Eyu cherupíe.

Ërei cuimbae jei:

—Emaño rani cheré aa vaerã aico cheru re umano regua.

⁶⁰ Jayave Jesús jei chupe:

—Tecove opa mbae vae güinoi mbae vae reta toñoti umano vae reta. Ërei nde ecua emimbeu Tumpa iporoyocuia —jei.

⁶¹ Jayave ñru cuimbae jei Jesús pe:

—Taa nderupíe, cheYa. Ërei emañño rani cheré aa vaerã cherenta pe amimbeu vaerã chupe reta jáema co aa —jei.

⁶² Ërei Jesús jei chupe:

—Tamijaanga umbiara vae. Umbiara vae umae yave jaicue coti, ndarau simi oo. Jae ramiño vi che amimbaraviqui yave quía, uyapo cavi'ã yave iparaviqui, ndarau icavi ico vaerã Tumpa iporoyocuia pe —jei.

10

Jesús omondo setenta vae reta

¹ Cua jaicue rupi yandeYa uiparavo ñru setenta cuimbae reta jare omondo jenonde mocui mocui rupi opaete tenta guasu reta jae oota joco pe vae pe. ² Jare jei chupe reta:

—Jeta ete co yaaviro vaerã. Ërei mbovi ete co umbaeviro vae reta. Jáeramo pe reta piyerure yandeYa pe omondo vaerã uparaviqui vae reta umbaeviro reta vaerã —jei—. ³ Pecua. Mase, pomondo icavi mbae vae uyapo vae reta ipite rupi. Pe reta ovecha-rai reta rami co. Jae reta yaguapita reta rami co —jei Jesús chupe reta—. ⁴ Agüiye peraa corepoti, jare urupucu, jare pepipasa. Jare agüiye pemiariño quía perovãiti yave tape rupi —jei—. ⁵ Jare pique yave penti tenta pe, pere rani: ‘Tipiacatu cua tenta pegua reta’ —pere, jei—. ⁶ Jare ime yave quía jocua tenta pe mbiacatu uipota vae, jae ipiacatuta co. Uipota'ã yave, ndarau ipiacatu —jei—. ⁷ Jare pepita jocua tenta pe etei. Peu ipotave umee peu vaerã vae. Echa'ã icavi co ñru vae reta umbiepi vaerã uparaviqui vae pe. Agüiye coti cotiño pepita —jei—. ⁸ Jare penti tenta guasu pe peo pevãe yave, joco pegua reta pembiresive cavi yave, peu ipotave umee peu vaerã vae —jei chupe reta—. ⁹ Pembigüera imbaerasi vae joco pe ñugüinoi vae reta. Jare pere chupe reta: ‘Tumpa iporoyocua coiño ma peve’ —pere, jei—. ¹⁰ Ërei peo yave penti tenta guasu pe, joco pegua reta uipota'ã yave pepita vaerã joco pe, peguata calle rupi jare pere joco pegua reta pe: ¹¹ ‘Numitimo orepi güi ivicuii, cua tenta guasu pegua reta picuaa vaerã pe reta co teco penoi. Ërei turumimbeu peve cua: Tumpa iporoyocua coiño ma peve’ —pere, jei—. ¹² Ërei che jae peve, Tumpa uãa yave ivi pegua reta, jocua tenta guasu pegua reta tanta uiporarata Sodoma pegua reta güi —jei—.

Tenta guasu pegua uiporarata vae reta

(Mt 11.20-24)

¹³ Corazín pegua reta uiporarata co. Betsaida pegua reta uiporarata co. Echa'ã jeta miacañi reta ayapo ipite pe chembaepuere pe. Jucuarãi mona ayapo yave Tiro jare Sidón pe, joco pegua reta ueyata tēi aracae ma

iyemingueta icavi mbae vae ipia pe oĩ vae. Omondeta tẽi temimonde jaimbe vae jare oñonota tẽi tanimbu iñãca re uicuaaca vaerã ipiatiti co —jei—. ¹⁴ Ërei Tumpa upuruãa yave, Corazín jare Betsaida pegua reta tanta uiporarata Tiro jare Sidón pegua reta güi —jei—. ¹⁵ Jare Capernaum pegua reta ipia pe uyemingueta tẽi icavi co yugüireco vaerã Tumpa ndive. Ërei Tumpa omondota reta yugüireco vaerã cañitei pe —jei—. ¹⁶ Uyapisaca peré vae uyapisaca co cheré. Ërei pererĩro vae chererĩro co. Jare chererĩro vae güirĩro chembou vae —jei.

Setenta vae reta yugüeru ye

¹⁷ Jare jocua setenta vae reta yugüeru ye yave Jesús oĩ vae pe, uyerovia jare jei Jesús pe:

—OreYa, nderee re nonoi mbaepuere añã reta re.

¹⁸ Jayave Jesús jei chupe reta:

—Che aecha Satanás oa ara güi ama uvera vae rami.

¹⁹ Mase, amee ma peve mbaepuere pepuere vaerã pepĩro mboi re jare chumicarape re, jare penoi vaerã mbaepuere tovaicho re, yepe tẽi jae güinoi vi mbaepuere. Ipuereta'ã mbae uyapo peve —jei—. ²⁰ Ërei agüiye piyerovia mbaepuere añã reta re penoi vae re. Ërei piyerovia peree uyecuatía ma oĩ ara pe vae re —jei.

Jesús uyerovia

(Mt 11.25-27; 13.16-17)

²¹ Jocua ora pe etei Jesús uyerovia jare jei:

—Amee yasurupai ndeve, cheRu, quirãi nde nemaño'ã cua ivi pegua iyaracuaa vae reta re uicuaa vaerã cua mbaembae, ãrei ndicuaaca sambiaĩ rami vae reta pe. Icavi co, cheRu. Echa'ã icavi co ndeve ndiyapo vaerã jucuarãi. Nde co jae ara pegua reta jare ivi pegua reta iYa —jei.

²² Jayave jei vi:

—CheRu umee ma cheve opaete. Mbaeti quía uicuaa cavi cheregua, jaeño cheRu. Jae ramiño vi mbaeti quía uicuaa cavi cheRu regua, jaeño che jare che aicuaaca chupe vae reta —jei.

²³ Jayave uyerova umae jemimboe reta re jare jei chupe retaño:

—Tumpa pemivendise ma. Echa'ã umaeño peré peecha vaerã jeta mbaembae —jei—. ²⁴ Che jae peve, jeta Tumpa iñee aracae umimbeu vae reta jare mburuvicha guasu reta uipota tēi uecha pe reta peecha ma vae, ērei uecha'ã. Jae ramiño vi jae reta uipota tēi uyandu pe reta piyandu ma vae, ērei uyandu'ã —jei.

Samaria pegua ipiacavi vae

²⁵ Penti ara penti mboroyocui re oporomboc vae uyemboi Jesús jovai jare jei chupe:

—Oporomboc vae, ¿mbae pa ayapota anoi vaerã tecove opa mbae vae?

Uipota tēi uyavica Jesús pe.

²⁶ Jayave Jesús jei chupe:

—¿Mbae pa uyecuatía oĩ mboroyocui pe? ¿Mbae pa nemingueta joco pe? —jei.

²⁷ Jayave jei Jesús pe:

—Uyecuatía oĩ cuarãi: 'Eau ndeYa Tumpa opaete ndepia reve, jare opaete nderecove reve, jare opaete nepirãta reve jare opaete ndepiyemingueta reve. Jae ramiño vi eau nderapicha nde ndiyerau rami.' Jucuarãi uyecuatía oĩ —jei.

²⁸ Jayave Jesús jei chupe:

—Icavi co ndere. Cuarãi iyapo jare nenoita tecove opa mbae vae —jei.

²⁹ Mboroyocui re oporomboc vae uipota uicuaaca jupi co jae. Jáeramo upirandu Jesús pe:

—¿Quía pa co jae cherapicha?

³⁰ Jayave Jesús jei chupe:

—Penti cuimbae oo Jerusalén güi tenta guasu Jericó coti. Jare aramoíño imonda vae reta uipisi. Jae reta omboi jemimonde chugüi jare umbipere. Uyuca rai rai ueya reta tape rupi —jei—. ³¹ Jare aramoíño ou penti sacerdote jocua tape rupi. Jare uecha yave cuimbae ipere vae, uipota'ã etei oya jese. Mbiri rupiño uasa chugüi —jei—. ³² Jae ramiño vi ou penti levita jocua tape rupi. Jare uecha yave cuimbae ipere vae, uipota'ã etei oya jese. Mbiri rupiño vi uasa chugüi —jei—. ³³ Ërei penti Samaria pegua ou jocua tape rupi, jare ou uvãe cuimbae ipere vae oĩ vae pe. Jare Samaria pegua uecha yave, uiparareco —jei—. ³⁴ Jayave oya jese jare uequi moa uipiano vaerã chugüi ipere vae jare umbiyasoí ipere. Jayave uupi imburica re jare güiraa penti tenta pe, jare joco pe uyandareco jese —jei—. ³⁵ Jare piareve pe Samaria pegua oota ma joco güi yave, uequi corepoti mocui ara mbaraviqui jepi pegua jare umee tenta iya pe. Jei chupe: 'Iyandareco mi jese. Jare jeta ete cua güi ndiyemingasta yave, ambiepita ndeve ayu ye yave' —jei, jei—.

³⁶ Añave tapirandu ndeve: ¿Quía nunga pa co jae jocua imonda vae reta uipisi vae japicha añetete vae? Echa'ã mbapi cuimbae uasa jocoropi —jei.

³⁷ Jare mboroyocui re oporomboe vae jei Jesús pe:

—Jocua uiparareco vae.

Jayave Jesús jei chupe:

—Ecuá iyapo jae uyapo vae rami.

Jesús opou Marta jare María ipi

³⁸ Jesús jare jemimboe reta jecuae yugüiraa Jerusalén coti. Jayave yugüiraa uvãe penti tenta guasu-rai pe. Joco pe penti cuña Marta jee vae umbiresive cavi jenta pe Jesús. ³⁹ Jare Marta ipiqui co jee María. Jare María uguapi yandeYa iyipi pe uyapisaca vaerã jese. ⁴⁰ Ërei

Marta uyemipia'ã tembiurã uyapo oĩ vae re. Jayave ou Jesús oĩ vae pe jare jei chupe:

—CheYa, chepiquii chembori'ã. Jáeramo cheño ayapo aĩ tembiurã. ¿Icavi ra ndeve uyapo vaerã cuarãi? Iyocui chembori vaerã —jei.

⁴¹Jayave yandeYa jei chupe:

—Marta, Marta, ndiyemipia'ã jeta mbaembae re. ⁴²Ërei yaipota'ã jeta mbaembae. Cua María uiparavo icavi vae ndegüi. Ndarau quía ipuere uequi chugüi —jei.

11

Jesús oporomboe yerure re

(Mt 6.9-15; 7.7-11)

¹Jare penti ara Jesús uyerure oĩ Tumpa pe. Jare opa ma yave, penti jemimboe jei chupe:

—CheYa, oremboe nduyerure vaerã Tumpa pe Juan vi omboe jemimboe reta rami.

²Jayave Jesús jei chupe reta:

—Piyerure Tumpa pe yave, pere cuarãi:

‘OreRu ara pe neĩ vae, tuyembiadoraca nderee.

Tou ndeporoyocua.

Tuyeyapo nde ndere vae cua ivi pe ara pe uyeyapo oĩ rami.

³Emee oreve opa ara orerembiurã.

⁴Embiosa oreve orembaeyoa reta, ore numbiasa ipotave iyoa orecoti vae pe rami.

Jare agüiye emaeño aña guasu re uyapoca vaerã oreve mbaeyoa.

Orerepi aña guasu güi’ —pere, jei.

⁵Jayave jei vi chupe reta:

—Yamijaanga penti cuimbae jare iamigo. Cuimbae oo yave iamigo jenta pe piare mbite rupi uyerure vaerã chupe mbae re, aramoi jeita chupe: ‘Cheamigo, iporuca cheve mbapi mbiyape. ⁶Echa'ã penti cheamigo ou uvãe chepi,

jare mbaeti mbae anoi amee jou vaerã.' Aramoi jucuarãita jei —jei—. ⁷ Jare aramoi iamigo ombouta chupe iñee japipe güi: 'Agüiye chemambeco. Echa'ã uyeyuquenda ma oĩ cheronque, jare che jare opaete chesambiai reta nduyapacua ma noĩ ndoque vaerã. Chepuere'ã ma apüa amee vaerã ndeve.' Aramoi jucuarãita jei —jei—. ⁸ Che jae peve, yepe tẽi uipota'ã upüa, jocua cuimbae co jae iamigo ramo, ãrei jocua cuimbae jecuaeño ueni oĩ yave, upüata co umee vaerã chupe opaete uipota vae —jei—. ⁹ Jare che jae peve, piyerure Tumpa pe mbae re, jare Tumpa umeeta peve. Peeca, jare pevãeta. Pembopu onque, jare uyepeata peve —jei—. ¹⁰ Echa'ã uyerure yave quía Tumpa pe mbae re, Tumpa umeeta chupe. Jare ueca yave quía mbae, uvãeta. Jare ombopu yave quía onque, uyepeata chupe —jei—. ¹¹ Nde neni yave penti nderai, nderai uyerure yave ndeve mbiyape re, ndarau nemee chupe penti ita mbiyape ipepica pe. Jae ramiño vi nderai uyerure yave ndeve pira re, ndarau nemee chupe penti mboi pira ipepica pe —jei—. ¹² Jae ramiño vi nderai uyerure yave ndeve ururupía re, ndarau nemee chupe penti chumicarape ururupía ipepica pe —jei—. ¹³ Yepe tẽi pe reta jecuaeño piyapo icavi mbae vae, ãrei pemee co mbaembae icavi vae pesambiai reta pe. Jáeramo peRu ara pe oĩ vae iquirẽi ete umee Espiritu Santo uyerure chupe jese vae reta pe —jei.

Jei reta icavi mbae vae Espiritu Santo coti

(Mt 12.22-30; Mr 3.20-27)

¹⁴ Pentu ara Jesús umbisiri ãña pentu cuimbae iupa vae güi. Jare ãña usiri ma chugüi yave, cuimbae uyemingueta. Jare jeta vae joco pe ñugüinoi vae ipiacañi. ¹⁵ Ërei amocue vae jei:

—Ñña guasu Beelzebú imbaepuere pe umbisiri ãña reta oya jese vae reta güi.

¹⁶ Jare ñru vae reta uipota uicuaa mbae ra Jesús ipuere uyapo. Jáeramo jei reta Jesús pe uyeyapo vaerã mbae ara re jae reta uicuaa vaerã quía co jae. ¹⁷ Ërei Jesús uicuaa ipiayemingueta, jare jei chupe reta:

—Penti tenta guasu pegua reta oyovaicho uyupii yave, opata co jocua tenta guasu. Jae ramiño vi penti tenta pegua reta oyovaicho uyupii yave, opata co jocua tenta —jei—. ¹⁸ Jae ramiño vi Satanás pochí iyupe yave, opata co iporoyocua. Echa'ã pe reta pere che ambisiri aña reta oya jese vae reta güi aña guasu Beelzebú imbaepuere pe —jei Jesús chupe reta—. ¹⁹ Ërei che ambisiri yave aña reta oya jese vae reta güi Beelzebú imbaepuere pe, ¿quía imbaepuere pe ra umbisiri aña reta oya jese vae reta güi perentarã reta? Pepuere pepirandu chupe reta jese —jei—. ²⁰ Ërei che ambisiri aña reta oya jese vae reta güi Tumpa imbaepuere pe. Jáeramo pepuere picuaa ou ma co uvãe peve Tumpa iporoyocua —jei—.

²¹ Penti cuimbae ipirãta vae mboca güinoi vae uyan-dareco yave jenta re, ipuere'ã quía upĩro chugüi imbaem-bae —jei—. ²² Ërei ou yave ñru cuimbae ipirãta ete chugüi vae uñerãro vaerã jae ndive, umiamirita co jare upĩrota chugüi imboca güirovia catu tẽi uyerepi vaerã pipe vae. Jae ramiño vi upĩrota chugüi imbaembae umbiyao vaerã umee iĩru reta pe —jei—.

²³ Ime yave quía uipota'ã ico cheñrurã vae, oyovaicho co che ndive. Jae ramiño vi ime yave quía chembori'ã vae, uyapo co icavi mbae vae checoti —jei chupe reta—.

Aña usiri jare ou ye vae

(Mt 12.43-45)

²⁴ Penti aña usiri ma yave oya jese vae güi, uguata ñana rupi ueca quiape ico vaerã. Ërei ipuere'ã yave uvãe quiape ico vaerã, jei iyupe: ‘Taa ye jocua chero ayu chugüi vae pe’

—jei, jei—. ²⁵ Echa'ã yandepuere yamijaanga penti o jocua cuimbae aña usiri ma chugüi vae re. Aña ou ye uvãe yave jocua o pe, uecha o iya utupeï ma jare opa oñono cavi —jei—. ²⁶ Jayave oo ye aña güeru siete aña icavi mbae ete chugüi vae reta jocua o pe. Jayave ocho reve uique o pe, joco pe yugüireco vaerã. Tenonde yave, penti aña oya jese yave, jocua cuimbae uiporara. Ërei taicue rupi ocho ma aña reta oya jese. Jáeramo tanta uiporara —jei.

Tumpa umivendiseta vae reta

²⁷ Jare Jesús cua mbaembae re imiari yave, penti cuña joco pe ñugüinoi vae reta ipite pe oï vae ñneeãta reve jei:

—Tumpa tumivendise ndesi. Echa'ã nde ndea co chugüi jare jae nemicambu —jei.

²⁸ Ërei Jesús jei:

—Añete co. Ërei Tumpa umivendiseta opaete uyapisaca ñnee re vae reta, uyapo yave jae jei vae —jei.

Uipota reta uecha miacañi

(Mt 12.38-42; Mr 8.12)

²⁹ Jare jeta vae yugüeru Jesús oï vae pe. Jayave Jesús jei chupe reta:

—Añave yugüireco vae reta icavi mbae vae uyapo vae reta co. Jae reta uipota ayapo vaerã mbae aicuaaca vaerã chupe reta quía co che. Ërei jaeño uyeyapota mbae Jonás pe uyeyapo vae rami, jae reta uicuaa vaerã quía co che —jei—. ³⁰ Echa'ã Jonás pe uyeyapo vae uicuaaca Nínive pegua reta pe Jonás jei chupe reta vae añete vae co. Jae ramiño vi uyeyapota cheve vae uicuaacata añave yugüireco vae reta pe quía co che. Che co jae cuimbaerã uyeyapo vae —jei—. ³¹ Tumpa upuruãa yave, jocua cuña mburuvicha guasu ico sur coti vae upũata umbijeco vaerã añave yugüireco vae reta. Echa'ã jae ou mbiri ete güi uyapisaca vaerã Salomón iyaracuaa catu vae re. Ërei che

chearacuaa catu ete Salomón güi —jei—. ³² Tumpa upuruãa yave, Nínive pegua reta upüata umbijeco vaerã añave yugüireco vae reta. Echa'ã jae reta ueya iyemingueta icavi mbae vae ipia pe oĩ vae, Jonás umimbeu chupe reta yave Tumpa iñee. Ërei chembaepuere tuicha ete co Jonás imbaepuere güi —jei—.

Mechero yamiendi yave

(Mt 5.14-16; 6.22-23)

³³ Mechero yamiendi yave, ndarau ñañomi. Ndarau ñañono yapepo uyembovapo oĩ vae igüi pe. Ñañono co mechero jenda pe, o pe uique vae reta güinoi vaerã tembipe —jei—. ³⁴ Tembipe uique yanderete pe yanderesa rupi. Icavi yave nderesa, nderete tineeta tembipe pe. Ërei icavi'ã yave nderesa, nderete tineeta pĩtumimbi pe —jei—. ³⁵ Jáeramo iñemoa ngatu agüiye vaerã nderete tineeta pĩtumimbi pe. Echa'ã tineeta tẽi tembipe pe —jei—. ³⁶ Nderete tineeta yave tembipe pe, ndarau ico joco pe pĩtumimbi. Opaete tineeta tembipe pe, penti tembipe tuicha vae nembiesape vae rami —jei—.

Jesús umbijeco fariseo reta jare boroyocui re oporomboe vae reta

(Mt 23.1-36; Mr 12.28-40; Lc 20.45-47)

³⁷ Jare jucuarãi imiari ma yave Jesús, penti fariseo uparea chupe ucaru vaerã jae ndive. Jayave Jesús oo fariseo jenta pe jare uguapi ucaru vaerã. ³⁸ Jare fariseo cua uecha yave, ipiacañi jese. Echa'ã Jesús uyepoe'ã ndei ucaru mbove. ³⁹ Jayave yandeYa jei:

—Pe reta co jae fariseo reta. Pe reta co jae taza jare plato icupe rupiño uyeyoe vae rami. Ërei pepia iquia co. Echa'ã pipota ñru vae reta imbaembae jare piyapo icavi mbae vae —jei—. ⁴⁰ Pe reta co jae iyaracuaa mbae vae reta. Echa'ã Tumpa uyapo opaete yandepuere yaecha vae.

Ërei uyapo vi opaete yandepuere mbae yaecha vae —jei—. ⁴¹ Pemeë pequirëi reve mbaembae iparavete vae reta pe. Cua piyapo yave, picuaacata ïru vae reta pe iquia mbae co pepia —jei—.

⁴² Pe reta co jae fariseo reta. Piporarata co. Echa'ã pemee Tumpa pe diezmo temiti reta penoi vae güi. Ërei piyapo'ã jupi piyapo vaerã vae, jare peau'ã Tumpa. Icavi co pemee vaerã Tumpa pe jocua nunga diezmo. Ërei piyapota tëi jupi co piyapo vaerã vae, jare peauta tëi Tumpa —jei—. ⁴³ Pe reta co jae fariseo reta. Piporarata co. Echa'ã pipota peguapi tenda tenondegua vae reta pe tupao pe, jare pipota ïru vae reta pe piyembisaludaca vaerã calle reta rupi —jei—. ⁴⁴ Pe reta co jae mboroyocui re oporomboe vae reta jare fariseo reta. Piporarata co. Echa'ã pepurumbitaviñoi. Pe reta co jae teõgüeriru reta quía uecha'ã vae rami. Yepe tëi ïru vae reta upïro jese reta, uicuaa'ã joco pe ñugüinoi vae —jei.

⁴⁵ Jayave penti mboroyocui re oporomboe vae jei Jesús pe:

—Cua añave ndere vae rupi ndere vi icavi mbae vae oreve.

⁴⁶ Jayave Jesús jei:

—Pe reta co jae mboroyocui re oporomboe vae reta. Pe reta vi piporarata co. Echa'ã pe reta pere ïru vae reta pe uyapo vaerã yavai uyapo vaerã vae. Yamijaanga penti tivita. Pe reta pere ïru vae reta pe ovoi vaerã penti tivita poi ete vae. Ërei pe reta pembori'ã etei ovoi vaerã. Pe reta piyaviqui'ã etei tivita —jei—. ⁴⁷ Piporarata co. Echa'ã pe reta piyapo Tumpa iñee aracae umimbeu vae reta iteõgüeriru reta. Jare petenondegua reta uyuca reta —jei—. ⁴⁸ Jucuarãi picuaaca petenondegua reta uyapo vae icaviño co peve. Echa'ã jae reta uyuca reta, jare pe reta piyapo iteõgüeriru reta —jei chupe reta—. ⁴⁹ Jucuarãiño vi Tumpa iyaracuaa catu vae jei: 'Amondota peve chiñee

umimbeu vae reta jare chereimimondo reta, jare pe reta piyucata amocue vae jare piyapota icavi mbae vae ĩru reta pe' —jei, jei—. ⁵⁰ Jare pe reta añave pico vae penoita teco opaete Tumpa ĩnee umimbeu vae reta ivi uyeyapo güiive uyeyucaca vae imano re —jei—. ⁵¹ Tenonde voi Abel uyeyucaca, jare taicue rupi Zacarías uyeyucaca. Echa'ã Zacarías umano maemimba uyeyucacue uñemeearenda jare Tumpa jo ipãu pe. Añete che jae peve, cua reta jare opaete ĩru vae reta imano re pe reta añave pico vae piyembijecota —jei—.

⁵² Pe reta co jae mboroyocui re oporombocue vae reta. Piporarata co. Echa'ã pemboe'ã ĩru vae reta uicuaa vaerã Tumpa. Pe reta etei picuaa'ã Tumpa. ĩru vae reta uipota tēi uicuaa Tumpa, ērei pe reta piyopia agüiye vaerã uicuaa —jei—.

⁵³ Jare jucuarãi jei ma yave chupe reta, mboroyocui re oporombocue vae reta jare fariseo reta pochi ete chupe, jare umbipi upirandu chupe jeta mbaembae re. ⁵⁴ Jecuaeño jae reta uyapısaca cavi jese. Echa'ã uipota tēi uyandu jei mbae ipuere umbijeco jese vae.

12

Piñemoa ngatu fariseo reta güi

¹ Jare jeta ete uyembati Jesús oĩ vae pe, jare uñemiañamiana. Jayave Jesús jei jemimboe reta pe rani:

—Piñemoa ngatu fariseo reta güi. Echa'ã jae reta upurumbitavi vae reta co. Jare tavi ipuere uñemai levadura rami —jei—. ² Ime yave mbae uyeyasoı vae, uyeechacañotai co. Jae ramiño vi ime yave mbae uñeñomi vae, uyecuaañotai co —jei—. ³ Jáeramo pĩtumimbi pe pere vae uyenduta tembipe pe, jare perenta japıpe pe pere viari vae jerãcuata opaete vae uyandu vaerã —jei—.

Pequiye Tumpa güi
(Mt 10.26-31)

⁴ Jare che jae peve, cherivi reta, agüiye pequiye upuruyuca vae reta güi. Echa'ã upuruyuca yave, mbaeti ye mbae icavi mbae vae ipuere uyapo peve —jei—. ⁵ Ërei tamimbeu peve quía güi pequiye vaerã. Icavi co pequiye vaerã Tumpa güi. Echa'ã jae güinoi mbaepuere upuruyuca vaerã jare oporomondo vaerã cañitei pe. Añete che jae peve, pequiye chugüi —jei—.

⁶ Picuaa co quirãi umaemee vae reta umee pandepo güira-rai mbovi ete corepoti re. Ërei Tumpa ñacañi'ã penti yepe güira-rai güi —jei—. ⁷ Tumpa uicuaa mbovi pea penoi peãca re vae. Jáeramo agüiye pequiye. Echa'ã Tumpa perau ete jeta güira-rai reta güi —jei—.

Ïru vae reta jovaque uyecuaaca vae
(Mt 10.32-33; 12.32; 10.19-20)

⁸ Jae ramiño vi che jae peve cua: Ime yave quía ïru vae reta jovaque jei yave: 'Che co jae Jesús jemimboe', che cuimbaerã ayeyapo vae jaeta ángel Tumpa pe uyeyocui vae reta jovaque: 'Cua co jae cheremimboe' —jaeta, jei Jesús—. ⁹ Ërei ime yave quía ïru vae reta jovaque checuacu vae, che vi aicuacuta ángel Tumpa pe uyeyocui vae reta jovaque —jei—.

¹⁰ Jare ime yave quía jei icavi mbae vae che cuimbaerã ayeyapo vae coti vae, Tumpa umbiasata chupe. Ërei ime yave quía jei icavi mbae vae Espíritu Santo coti vae, Tumpa ndarau etei umbiasa chupe —jei Jesús chupe reta —.

¹¹ Jare ïru vae reta pereraa yave pemee vaerã tupao reta pe jare mburuvicha reta pe jare ïru vae reta mbaepuere güinoi vae pe, agüiye piyemipia'ã mbae pereta chupe reta vae re —jei—. ¹² Echa'ã Espíritu Santo uicuaacata peve jocua ora pe etei mbae pere vaerã —jei.

Cuimbae icocatu vae iyaracuaa mbae vae

¹³ Jayave penti cuimbae jeta vae ipite pe oĩ vae jei Jesús pe:

—Oporombœ vae, ere cheriquei pe umbiyao vaerã cheve oreru ueya vae.

¹⁴ Jayave Jesús jei chupe:

—Cuimbae, che chepuere'ã co ayapicatu jocua nunga. Ndarau ambiyao peve nderu ueya vae —jei.

¹⁵ Jayave Jesús jei opaete vae pe:

—Piñemoa ngatu agüiye vaerã pipota ñru vae reta imbaembae. Echa'ã ndarau yaico cavi jeta mbaembae ñanoi vae ramoño —jei.

¹⁶ Jayave jei chupe reta umijaanga reve:

—Penti cuimbae icocatu vae iavati yagüiye cavi. ¹⁷ Jare cuimbae jei iyupe ipia pe: '¿Mbae ra ayapota? Mbaeti ma cheavati jendarã' —jei, jei—. ¹⁸ Jayave jei iyupe ipia pe: 'Aicuaa ma. Ambaita cheavatío reta jare ambutuicha eteta cheavatío reta, jare joco pe añuvatuta opaete cheavati jare opaete uyeaviro vae' —jei, jei—. ¹⁹ Jayave che jaeta cherecove pe cuarãi: 'Cherecove, jeta ete ma mbaeviro niñuvatu. Uepitita jeta año pegua. Eputuu, ecaru, ecau jare iyerovia.' Cuarãi jaeta —jei, jei—. ²⁰ Ërei Tumpa jei jocua cuimbae pe: 'Nde co jae iyaracuaa mbae vae. Echa'ã cua pĩtu aequita nderecove ndegüi. Jare jayave ¿quia ra güinoita opaete jocua mbaembae niñuvatu ndiyupeguarã vae?' —jei, jei.

²¹ Jayave Jesús jei chupe reta:

—Ime yave quía jeta mbaembae uñuvatu iyupeguarã vae, ërei icocatu'ã yave Tumpa coti, uyeyapota chupe jocua cuimbae icocatu vae pe uyeyapo rami —jei.

Agüiye piyemipia'ã mbaembae re

(Mt 6.25-34)

²² Jayave Jesús jei jemimboe reta pe:

—Jáeramo che jae peve, agüiye piyemipia'ã perembiurã vae re. Jae ramiño vi agüiye piyemipia'ã peremimonderã vae re —jei—. ²³ Ndarau pepuere pico cavi jecuaeño piyemipia'ã yave perembiurã vae re, jare peremimonderã vae re —jei—. ²⁴ Pemae güira reta re. Echa'ã jae reta umaeti'ã jare umbaeviro'ã vi. Mbaeti vi güinoi avatío uñuvatu vaerã iavati. Ërei Tumpa umingarü reta. Jare Tumpa perau ete güira reta güi —jei—. ²⁵ Aramoi piyemipia'ã pipota tēi pepucu ramo. Ërei ndarau etei pepuere piyembicuacuaa pepucu ete vaerã —jei Jesús chupe reta—. ²⁶ Mbaeti etei mbae pepuere piyapo cua re. Ërei cua yavai'ã co Tumpa pe. Jáeramo agüiye piyemipia'ã ñru mbaembae re —jei—. ²⁷ Pemae mbaepoti reta re, quirãi ucuacuaa reta. Uparaviqui'ã reta. Umaepova'ã reta vi. Ërei che jae peve, mbaepoti reta ipõra ete Salomón jemimonde ipõra vae güi. ²⁸ Tumpa omopõra ñana, yepe tēi penti ara ñana oĩ co pe jare piareve pe ocai. Jáeramo Tumpa umeeta co peve peremimonderã. Michi ete co pepurugüirovia —jei—. ²⁹ Agüiye piyemipia'ã perembiurã vae re, jare agüiye piyemipia'ã ñru mbaembae re —jei—. ³⁰ Echa'ã opaete ivi pegua reta uyemipia'ã cua mbaembae re. Ërei peRu uicuaa icavi co penoi vaerã cua mbaembae —jei—. ³¹ Ërei icavi co pipota ete vaerã Tumpa iporoyocua, jare Tumpa umeeta peve opaete cua mbaembae —jei—.

Mbaembae ara pegua
(Mt 6.19-21)

³² Agüiye pequiye, yepe tēi pe reta mbovi ete co. Echa'ã Tumpa umeeta co pe reta pico vaerã iporoyocua pe —jei—. ³³ Pemee corepoti re pembaembae, jare pemee corepoti uata chupe vae reta pe. Cuarãi piyapo yave, penoita mbaembae ara pegua. Jae co peurupucu ara pe penoita vae rami. Jocua nunga urupucu ndarau etei indechi jare

jocua mbaembae icavi vae peurupucu ara pegua pe penoi vae ndarau ucañi. Echa'ã imonda vae ndarau oya jese jare cupii ndarau urucumegua —jei—. ³⁴ Echa'ã piñuvatu yave mbaembae icavi vae piyupeguarã ivi pe, jecuaeño pepia pe piyeminguetata ivi pegua re. Ërei piñuvatu yave mbaembae icavi vae piyupeguarã ara pe, jecuaeño pepia pe piyeminguetata ara pegua re —jei—.

Uyeyocui vae jecuaeño uãro vae

³⁵⁻³⁶ Yamijaanga peré uyeyocui vae reta. Uyeyocui vae reta ipatrón oo umenda vaerã yave, uyeyocui vae reta uãro ñugüinoi ipatrón ou ye regua. Uãro reta jare jecuaeño jendi imechero reta. Jare ipatrón ou ye uvãe yave ombopu onque, jupivoi jembiocui reta uipea onque ipatrón ipuere vaerã uique jenta pe —jei—. ³⁷ Uyeyocui vae reta jecuaeño uãro ñugüinoi yave ipatrón ou ye uvãe yave, uyeroviata reta. Añete che jae peve, ipatrón uyembicuata toalla pe, jare jeita jembiocui reta pe uguapi vaerã mesa pe, jare ipatrón etei umingaruta jembiocui reta —jei Jesús—. ³⁸ Aramoi ipatrón ou yeta uvãe pítu ma yave ani piare mbite rupi. Ërei jae uecha yave jembiocui reta uãro ñugüinoi, jae reta uyeroviata co —jei—. ³⁹ Aipota picuaa vaerã cua: Penti tenta iya uicuaa yave mbae ora pe outa uvãe imonda vae oñomi vaerã imbaembae, uñemicuatĩrota tẽi jare ndarau tẽi umaeño imonda vae re güiraa vaerã imbaembae chugüi —jei—. ⁴⁰ Jae ramiño vi pe reta peãro, agüiye vaerã che cuimbaerã ayeyapo vae ayu ye avãe piyandareco'ã peĩ yave —jei chupe reta.

Uyeyocui vae uyapo'ã ipatrón jei vae

(Mt 24.45-51)

⁴¹ Jayave Pedro jei Jesús pe:

—CheYa, cua ndere ma nemijaanga reve. ¿Oreve peguarãño pa co cua? ani ¿opaete vae peguarã pa? —jei.

⁴² Jayave yandeYa jei:

—Penti uyeyocui vae iyaracuaa vae uyapo ipatrón jei chupe uyapo vaerã vae. Jare ipatrón umee chupe ico vaerã ñru jembiocui reta juvicharã, jare umee vaerã chupe reta jembieurã opa ara —jei—. ⁴³ Ipatrón ou ye uvãe yave jenta pe, uecha yave jocua jembiocui uyapo oĩ iparaviqui, jocua jembiocui uyeroviata co —jei chupe reta—. ⁴⁴ Añete che jae peve, ipatrón umeeta chupe uyandareco vaerã opaete imbaembae re —jei Jesús—. ⁴⁵ Ërei aramoi uyeyocui vae jei iyupe ipia pe: ‘Chepatrón ndarau ou ye imambae.’ Jare umbipi uinupa ñru uyeyocui vae reta - cuimbae reta jare cuñatai reta - jare ucaru jare ucau jare usavipo —jei—. ⁴⁶ Jayave penti ara ipatrón ou yeta uvãe jembiocui uyandareco'ã oĩ yave. Jocua ora pe etei ipatrón uipocouta. Jayave ipatrón uiporaraca eteta chupe jare omondota ico vaerã ipatrón iporoyocui uyapo mbae vae reta ndive —jei—. ⁴⁷ Ipatrón uiporaraca eteta. Echa'ã uyeyocui vae uicuaa tẽi ipatrón iporoyocui, ãrei uyapo'ã —jei chupe reta—. ⁴⁸ Ërei ime yave uyeyocui vae uicuaa'ã ipatrón iporoyocui vae, yepe tẽi uiporarata co uyapo'ã ipatrón iporoyocui ramo, ãrei ipatrón ndarau uiporaraca ete chupe. Echa'ã ipatrón uicuaaca yave jembiocui pe iporoyocui, icavi co jembiocui uyapo vaerã uicuaa vae rupi —jei—.

Ayu uyembiyao vaerã uyugüi ivi pegua reta

(Mt 10.34-36)

⁴⁹ Che ayu cua ivi pe tata ambiyepota vaerã, jare chequirẽi ete opa cheparaviqui ayapo —jei—. ⁵⁰ Che aiporara eteta co jare yavai eteta cheve opa uyeyapo regua —jei—. ⁵¹ ¿Pepia pe piyemingueta pa che ayu amee vaerã mbiacatu ivi pegua reta pe? Che jae peve, jucuarãi'ã co. Che ayu uyembiyao vaerã uyugüi ivi pegua reta — jei chupe reta—. ⁵² Echa'ã añave güive yugüireco yave

pandepo penti tenta pe, uyembiyaota co uyugüi reta. Mbapi oyovaichota mocui ndive, jare mocui oyovaichota mbapi ndive —jei—. ⁵³ Tu oyovaichota tai ndive, jare tai oyovaichota tu ndive. Ichi oyovaichota imembi cuña ndive, jare imembi cuña oyovaichota ichi ndive. Imesi oyovaichota imembi-tati ndive, jare imembi-tati oyovai-chota imesi ndive —jei.

Picuaa'ã etei mbae añave uyeyapo oĩ vae

(Mt 16.1-4; Mr 8.11-13)

⁵⁴ Jare Jesús jei yati vae reta pe:

—Peecha yave amapĩtu uyeyapo oĩ guarasi uique vae coti, jupivoi pere: ‘Oquita co.’ Jare jucuarĩ uyeyapo —jei—. ⁵⁵ Jae ramiño vi tanta ivitu yave, pere: ‘Aracuta co.’ Jare jucuarĩ uyeyapo —jei—. ⁵⁶ Pe reta co jae upurumbitavi vae reta. Echa'ã ara jare ivi re pemae yave, picuaa mbae uyeyapota vae. Ërei picuaa'ã etei mbae añave uyeyapo oĩ vae —jei chupe reta—.

Iyeyapicatu nderovaicho ndive

(Mt 5.25-26)

⁵⁷ ¿Maera pa peatẽi picuaa mbae jupi piyapo vaerã vae? —jei—. ⁵⁸ Ndeo yave uipota uñeapo nderé mbae re vae ndive mburuvicha pe, tape rupi peo ram-bueve iyeyapicatu jae ndive, agüiye vaerã jae uñeapo nderé mburuvicha pe. Echa'ã mburuvicha nemondota peresorĩru iyandarecoa pe, jare peresorĩru iyandarecoa neñonota peresorĩru pe —jei—. ⁵⁹ Che jae ndeve, ndarau etei neẽ peresorĩru güi ndei opaete ndepía nembiepi mbove —jei.

¹ Jare amocue joco pe ñugüinoi vae reta umimbeu Jesús pe quirãi Pilato uyucaca amocue Galilea pegua reta, jae reta maemimba uyeyucacue reta umee Tumpa pe ñugüinoi rambueve. ² Jayave Jesús jei chupe reta:

—Aramoi pe reta pepia pe piyemingueta jucuarãi uyeyapo jocua Galilea pegua reta pe, jae reta iyoa ete opaete ñru Galilea pegua reta güi ramo. ³ Che jae peve, jucuarãi'ã co. Jare peeya'ã yave piyemingueta icavi mbae vae pepia pe oĩ vae, pe reta pecañiteita vi —jei—. ⁴ Jare jocua torre Siloé pe oĩse vae usururu jocua dieciocho vae re jare uyuca reta. Aramoi pe reta pepia pe piyemingueta jocua dieciocho vae iyoa ete opaete ñru Jerusalén pegua reta güi —jei—. ⁵ Che jae peve, jucuarãi'ã co. Jare peeya'ã yave piyemingueta icavi mbae vae pepia pe oĩ vae, pe reta pecañiteita vi —jei—.

Iva ía mbae vae

⁶ Jayave Jesús jei chupe reta umijaanga reve:

—Penti cuimbae güinoi ico pe penti iva. Oo tẽi ueca iva ía. Uvãe'ã chupe —jei—. ⁷ Jayave jei ico pe uparaviqui chupe vae pe: ‘Mase, mbapi año ma ayu tẽi aeca cua iva ía jare avãe'ã chupe. Iyasia. Ñañotita tẽi ñru temiti jendacue pe’ —jei, jei—.

⁸ Jayave co pe uparaviqui vae jei co iya pe: ‘Patrón, emaeño tupita ye penti año pegua. Tayoo rani iyipi rupi jare tañono vacarepoti iyipi rupi’ —jei, jei—. ⁹ ‘Jayave ía yave, icavita co. Ërei ia'ã yave, ndepuereta ndiyasiaca’ —jei, jei—.

Jesús umbigüera cuña mbutuu ara pe

¹⁰ Jare Jesús oporombocue oĩ penti judío reta itupao pe mbutuu ara pe. ¹¹ Jare uecha joco pe penti cuña dieciocho año ma imbaerasi vae. Jecuaeño ipe ete. Ipuere'ã etei uyemboi cavi. ¹² Jare Jesús uecha ma yave, jei chupe:

—Eyu checoti, cuña. Ndecuera ma co nembraerasi güi —jei.

¹³ Jayave Jesús oñono ipo cuña iñãca re. Jare jupivoi cuña ipuere uyemboi cavi jare umbipi umbiadora Tumpa.

¹⁴ Jayave tupao re uyandareco vae pochí cua re. Echa'ã Jesús umbigüera cuña mbutuu ara pe. Jáeramo tupao re uyandareco vae jei joco pe ñugüinoi vae reta pe:

—Icavi co yaparaviqui vaerã seis ara. Peyu jocua seis ara pecuera vaerã. Agüiye peyu pecuera vaerã mbutuu ara pe —jei.

¹⁵ Ërei yandeYa jei chupe:

—Pe reta co jae upurumbitavi vae reta. Pe reta piyora pegüeye jare pemburica jenda güi mbutuu ara pe peraa vaerã pemiü —jei—. ¹⁶ Mase, cua cuña Abraham iñemoñaá reta pegua co. Ërei Satanás dieciocho año ma umimbaerasi. ¿Icavi'ã pa che ambigüera vaerã cua mbaerasi güi mbutuu ara pe? —jei.

¹⁷ Jare cua Jesús jei ma yave, opaete Jesús jovaicho reta imara. Echa'ã opaete joco pe ñugüinoi vae reta uyerovia opaete icavi ete vae Jesús uyapo vae re.

Mostaza jáicue

(Mt 13.31-32; Mr 4.30-32)

¹⁸ Jayave Jesús jei:

—¿Mbae ra ipuere uyemijaanga Tumpa iporoyocua re? ¿Mbae ra amijaangata jese? ¹⁹ Yandepuere yamijaanga jese penti mostaza jáicue —jei—. Uñeñoti yave, ucuacuaa jare uyeyapo ivira tuicha vae. Jare güira reta yugüeru uyapo jaitirã jese —jei.

Levadura

(Mt 13.33)

²⁰ Jayave jei chupe reta:

—¿Mbae ra amijaangata Tumpa iporoyocua re?

²¹ Yandepuere yamijaanga jese levadura —jei—. Cuña

umbiyea levadura jeta catu harina ndive, levadura uñemiai vaerã opaete masa rupi —jei.

Onque ipi-rai vae

(Mt 7.13-14, 21-23)

²² Jare Jesús uguata opaete tenta guasu reta jare tenta guasu-rai reta rupi, jare oporomboe joco pe. Jare jecuaeño oo Jerusalén coti. ²³ Jayave penti vae upirandu Jesús pe:

—CheYa, ¿ime pa mbovi catu uyembiasacata vae?

Jayave Jesús jei joco pe ñugüinoi vae reta pe:

²⁴ —Piñemimirãta pique vaerã onque ipi-rai vae rupi. Echa'ã che jae peve, jeta vae uipota tẽita uique, ãrei ndarau ipuere —jei—. ²⁵ Echa'ã tenta iya uyequenda ma yave onque, pe reta pepitata oca pe. Jayave pemboputa tẽi onque jare pereta tẽi: 'OreYa, ipea onque oreve.' Ërei jae jeita peve: 'Che pucuaa'ã' —jeita, jei—. ²⁶ Jayave pereta: 'Nducaru nderovaque, jare nde ndeporomboe ore calle reta rupi' —pereta, jei—. ²⁷ Ërei jae jeita peve: 'Che jae peve, che pucuaa'ã. Pe reta co jae icavi mbae vae uyapo vae reta. Pesiri chegüi' —jeita peve, jei—. ²⁸ Jayave piyaota jare perãi pembiquiririuta. Echa'ã peechata Abraham jare Isaac jare Jacob jare opaete Tumpa iñee aracae umimbeu vae reta Tumpa iporoyocuia pe ñugüinoi. Ërei pe reta oca pe pẽita —jei—. ²⁹ Yugüeruta reta opaete que rupi rupi güi, jare uguapita reta Tumpa iporoyocuia pe —jei—. ³⁰ Ërei pemandúa cua re: Amocue añave uñemimichi vae uyembitenondecata co, jare amocue añave uyembutuicha vae uyembitaicuecata co —jei.

Jesús ipiatiti Jerusalén pegua reta re

(Mt 23.37-39)

³¹ Jocua ara yugüeru Jesús oĩ vae pe amocue fariseo reta. Jae reta jei Jesús pe:

—Ecuá cua güi. Echa'ã Herodes uipota ndeyucaca.

³² Jayave Jesús jei chupe reta:

—Herodes co jae penti aguara rami. Pecua ipi jare pemimbeu chupe quirái jecuae ambisirita añã reta oya jese vae reta güi jare ambigüerata imbaerasi vae reta añave jare curiye. Jare cõeramo opata co cheparaviqui — jei—. ³³ Añete co, icavi co jecuaeño aa Jerusalén coti añave jare curiye jare cõeramo. Echa'ã Jerusalén peño judío reta uyuca Tumpa iñee umimbeu vae reta —jei—.

³⁴ Jerusalén pegua reta, pe reta piyuca Tumpa iñee aracae umimbeu vae reta. Pe reta piyapi ita pe piyuca Tumpa ombou peve vae reta. Jeta vese ma chequirëi tõi pumbati, uru umbati imembi reta ipepo igüi pe rami, ërei pe reta pipota'ã —jei—. ³⁵ Mase, Tumpa usirita ma pegüi. Che jae peve, ndarau ma cherecha pere regua: 'Tuyembidoraca yandeYa jee re ou vae' —jei.

14

Cuimbae opaete jete iruru vae

¹ Jare penti mbutuu ara pe Jesús oo uique penti fariseo reta itenondegua jenta pe ucaru vaerã jae ndive. Jare fariseo reta umae ñugüinoi Jesús re. ² Jare Jesús uecha joco pe penti cuimbae opaete jete iruru vae. ³ Jayave Jesús upirandu mboroyocui re oporombocoe vae reta jare fariseo reta pe:

—¿Jei pa mboroyocui yandepuere yambigüera vaerã quía mbutuu ara pe?

⁴ Ërei jae reta quíño. Jayave Jesús oñono ipo cuimbae imbaerasi vae re jare umbigüera. Jayave jei chupe oo vaerã. ⁵ Jayave Jesús jei joco pe ñugüinoi vae reta pe:

—Pemburica ani pegüeye uasavi yave penti ivicua pe mbutuu ara pe, jupivoi peo penoẽ joco güi —jei.

⁶ Jare joco pe ñugüinoi vae reta ipuere'ã mbae jei Jesús pe cua regua.

Agüiye eguapí tenda tenondegua vae pe

⁷ Jayave Jesús uecha quirái opaete tenta iya uparea chupe vae reta uiparavo tenda icavi vae. Jayave jei chupe reta umijaanga reve:

⁸ —Penti cuimbae uparea ndeve yave menda vae pe, agüiye eguapí tenda tenondegua vae pe. Echa'ã aramoi tenta iya uparea vi ñru uipiu ete ndegüi vae pe —jei—. ⁹ Jayave tenta iya güeruta jocua ñru vae ndeguapí vae pe jare jeita ndeve: 'Emee cua cuimbae pe nerenda.' Jayave nde nemarata co ndeo ndeguapí tenda taicuegua vae pe —jei—. ¹⁰ Ërei tenta iya uparea ndeve yave, ecua eguapí tenda taicuegua vae pe. Echa'ã ou yave tenta iya, aramoi jeita ndeve: 'Cheamigo, ecua eguapí penti tenda tenondegua vae pe.' Jucuarái ndiyepiucata opaete yugüeru ucaru vaerã vae reta jovaque —jei—. ¹¹ Echa'ã ime yave quía uyembutuicha vae, uñemimichicata co. Jare ime yave quía uñemimichi vae, uyembutuichacata co —jei.

¹² Jayave Jesús jei tenta iya pe:

—Ndipota yave ndepurumingu, agüiye eparea neamigo reta jare nerentarã reta jare nerentaigua icocatu vae reta pe. Echa'ã chupe reta ndeparea yave, jae reta upareata ndeve nde ndeparea chupe reta ramo —jei—.

¹³ Ërei ndipota yave ndepurumingu, eparea iparavete vae reta jare ipo chutu vae reta jare icõcho vae reta jare jesa mbae vae reta pe —jei—. ¹⁴ Jucuarái ndiyapo yave, Tumpa nemivendiseta. Echa'ã jae reta ndarau ipuere nemingu. Ërei Tumpa umbijecoviata ndeve jupi vae reta icove ye yave yugüeru umanocue vae reta ipite güi —jei.

*Cuimbae jeta vae pe uparea ucaru vaerã vae
(Mt 22.1-10)*

¹⁵ Jare penti jae ndive uguapi oĩ mesa pe vae cua uyandu yave, jei Jesús pe:

—Tumpa iporoyocua pe ucaruta vae uyemivendiseta co.

¹⁶ Jayave Jesús jei chupe:

—Penti cuimbae uyapoca jeta tembíu jare uparea jeta vae pe ucaru vaerã. ¹⁷ Tembíu oyĩ ma yave, omondo jembicui jei vaerã uparea chupe vae reta pe: ‘Peyu. Echa'ã opaete uñeño ma mesa pe’ —jei, jei—. ¹⁸ Ërei penti penti jei uyeyocui vae pe ipuere'ã oo ucaru vaerã. Penti vae jei chupe: ‘Agua ma checorã jare icavi co aa vaerã amae jese. Jáeramo chepuere'ã aa. Ere ndepatrón pe chembiasa vaerã’ —jei, jei—. ¹⁹ Jare ĩru vae jei chupe: ‘Agua ma diez güeye. Aata amboporova reta. Jáeramo chepuere'ã aa. Ere ndepatrón pe chembiasa vaerã’ —jei, jei—. ²⁰ Jare ĩru vae jei chupe: ‘Amenda ramo ete. Jáeramo chepuere'ã aa’ —jei, jei—. ²¹ Jayave uyeyocui vae ou ye ipatrón pe jare umimbeu chupe opaete cua regua. Jayave ipatrón pochi reve jei jembicui pe: ‘Ecu voi opaete calle rupi jare eru cua pe iparavete vae reta jare ipo chutu vae reta jare icõcho vae reta jare jesa mbae vae reta’ —jei, jei—. ²² Uyapo ma yave jucuarãĩ, uyeyocui vae jei ipatrón pe: ‘Patrón, ayapo ma ndeporoyocui, jare imeño ĩru vae reta jendarã’ —jei, jei—. ²³ Jayave ipatrón jei jembicui pe: ‘Ecu ye opaete tape rupi jare ere nevãe chupe vae reta pe yugüeru vaerã, tinee vaerã cherenta’ —jei, jei—. ²⁴ ‘Echa'ã che jae peve, mbaeti penti ave jocua tenonde voi apareta chupe vae ucaruta cherenta pe’ —jei, jei.

Yavai co oĩ oo vaerã Cristo jupíe

(Mt 10.37-38)

²⁵ Jare jeta vae uyembati Jesús oĩ vae pe. Jayave Jesús umae jese reta jare jei chupe reta:

²⁶ —Ime yave quía uipota oo cherupíe vae, cherau ete'ã yave tu jare ichi jare jembireco jare isambiai reta jare jentarã reta güi, jare uyerau ete yave chegüi, ndarau ipuere ico cheremimboerã —jei—. ²⁷ Jare ime yave quía ovoí'ã icurusu oo vaerã cherupíe vae, ndarau ipuere ico cheremimboerã —jei—. ²⁸ Penti cuimbae iquirëi yave uyapo torre, uguapita rani uipapa vaerã mbovi ra jepita, uicuaa vaerã icorepoti uepitita ra opa uyapo vaerã —jei chupe reta—. ²⁹ Echa'ã uyapo'ã yave jucuarã, aramoi oñonota torre iguapicarã, ãrei ndarau uepiti icorepoti opa uyapo vaerã. Jáeramo opaete uecha vae reta oyoyaita jocua cuimbae —jei—. ³⁰ Echa'ã jeita reta: 'Jocua cuimbae umbipi tã uyapo torre, ãrei ipuere'ã opa uyapo' —jeita, jei—. ³¹ Jae ramiño vi penti mburuvicha guasu iquirëi yave oo uñerãro ñru mburuvicha guasu ndive, uguapita rani ipia pe uyemingueta cavi vaerã jese, uicuaa vaerã jocua diez mil isundaro reta ipuereta ra umiamiri jocua veinte mil sundaro reta jovaicho güinoi vae —jei—. ³² Echa'ã ipia pe uyemingueta yave isundaro reta ndarau umiamiri jovaicho isundaro reta, mbiri jovaicho güi oñ rambueve, omondota amocue vae reta uyerure vaerã chupe agüiye vaerã uñerãro jae ndive —jei—. ³³ Jae ramiño vi ime yave quía pepite pe opaete imbaembae ueya'ã vae, ndarau ipuere ico cheremimboerã —jei chupe reta—.

*Yuqui jembochi mbae vae
(Mt 5.13; Mr 9.50)*

³⁴ Yuqui icavi co yau vaerã. ãrei jembochi'ã ma yave, ¿quirãita ra jembochi ye? —jei—. ³⁵ Icavi'ã ma mbaerã. Icavi'ã yepe ivi peguarã. Yamomboño. Uipota uyandu vae tuyapisaca cua re —jei.

15

Ovecha ucañi vae
(Mt 18.10-14)

¹ Jayave uyembati Jesús oĩ vae pe jeta mburuvicha peguarã ocovara vae reta jare teco icavi mbae vae uyapo vae reta. ² Jayave fariseo reta jare mboroyocui re oporombœ vae reta iñeenguru jese. Jae reta jei:

—Cua cuimbae uñemiĩru teco icavi mbae vae uyapo vae reta ndive, jare ucaru jae reta ndive.

³ Jayave Jesús jei chupe reta umijaanga reve:

⁴ —Penti cuimbae güinoi yave cien ovecha, umicañi yave penti, ueya ĩru noventa y nueve ñana pe jare oo ueca ucañi vae uvãe chupe regua —jei—. ⁵ Jare uvãe ma chupe yave, ovoi güeru ye iyatii re uyerovia reve —jei—. ⁶ Jare ou ye uvãe yave jenta pe, umbati opaete iamigo reta jare jentaigua reta, jare jei chupe reta: ‘Piyerovia che ndive. Avãe ye ma cheovecha ucañi vae’ —jei, jei—. ⁷ Che jae peve, jae ramiño vi ara pegua reta uyerovia eteta iyoa vae ueya yave iyemingueta icavi mbae vae ipia pe oĩ vae. Jucuarãita'ã uyerovia noventa y nueve ‘jupi co che’ jei vae reta re. Echa'ã jae reta jei tẽi: ‘Mbaeti anoi yemingueta icavi mbae vae chepia pe’ —jei reta, jei—.

Corepoti ucañi vae

⁸ Jae ramiño vi penti cuña güinoi yave diez corepoti, umicañi yave penti, umiendi mechero jare utupei opaete tenta rupi. Ueca cavi uvãe chupe regua —jei—. ⁹ Jare uvãe ma chupe yave, umbati opaete iamiga reta jare jentaigua reta, jare jei chupe reta: ‘Piyerovia che ndive. Avãe ye ma corepoti amicañi vae’ —jei, jei—. ¹⁰ Che jae peve, jae ramiño vi ángel Tumpa pe uyeyocui vae reta uyerovia ete iyoa vae ueya yave iyemingueta icavi mbae vae ipia pe oĩ vae —jei.

Tai ucañi vae

¹¹ Jayave Jesús jei chupe reta:

—Penti cuimbae güinoi mocui tai. ¹² Jare tai taicuegua vae jei tu pe: ‘Cheru, emee cheve añave voi mbaembae nde nemanoma yave anoita vae’ —jei, jei—. Jayave tu umbiyao imbaembae umee tai reta pe —jei—. ¹³ Jayave mbovi ararupi tai taicuegua vae umbati umee opaete imbaembae jare oo mbiri ambie ivi pe. Joco pe uyapo jeta pareajare jucarai opa umingasta iyugui opaete icorepoti —jei—. ¹⁴ Jare opa icorepoti umingasta yave, ou caruai tuicha vae jocua ivi pe, jare cuimbae mbaeti ma mbae güinoi jou vaerã —jei—. ¹⁵ Jayave oo uyerure penti patrón pe umee vaerã chupe mbaraviqui. Jayave jocua patrón omondo jenta pe umingaru vaerã cuchi reta —jei—. ¹⁶ Jare cuimbae uipota tẽi uyemingapii ivope cuchi reta jou vae pipe. Jare mbaeti quia umee chupe jou vaerã —jei—. ¹⁷ Jare cuimbae uicuaa ma quirai uyapo iyaracuaa mbae vae uyapo vae rami. Jayave jei iyupe ipia pe: ‘Cheru umimbaraviqui vae reta jeta güinoi jou vaerã. Ërei che amanota ma ai yembai pipe’ —jei, jei—. ¹⁸ Taa ye cua güi cheru pe jare tae chupe: ‘Cheru, cheyoa ma Tumpa coti jare ndecoti vi. ¹⁹ Jupi'ã ma aico vaerã nderairã. Emee cheve mbaraviqui ñru nemimbaraviqui vae reta pe nemee rami’ —jaeta, jei, jei—. ²⁰ Jayave ñatima ye tu jenta coti.

Ërei mbiri catu oi rambueve, tu uecha jare uiparareco. Jayave tu osi oovaiti tai, jare uicuãva jare uyurupite —jei—. ²¹ Jayave tai jei tu pe: ‘Cheru, cheyoa ma Tumpa coti jare ndecoti vi. Jupi'ã ma aico vaerã nderairã’ —jei, jei—. ²² Ërei tu jei jembiocui reta pe: ‘Peru voi temimonde icavi vae pemondeca chupe. Jae ramiño vi piñono moãcaregua ipoãca re jare mbiapasa ipi re’ —jei, jei—. ²³ ‘Jare peru cua pe vaca tairusu vae aminguirã vae piyuca. Yacaru jare yayerovia’ —jei, jei—. ²⁴ ‘Echa'ã tenonde yave cua cherai

penti umanocue vae rami co cheve, ãrei añave icove ye ma cheve. Tenonde yave ucañi chegüi, ãrei añave avãe ye ma chupe' —jei, jei—. Jare umbipi reta uyembiyerovia —jei—.

²⁵ Jare tai tenondegua vae uparaviqui oĩ co pe. Jare ou ye oĩ yave coiño ma tenta güi, uyandu uyemimbi ñugüinoi tenta pe —jei—. ²⁶ Jayave ueni penti tu jembiocui jare upirandu chupe mbae ra co jocua uyandu vae —jei—.

²⁷ Jayave uyeyocui vae jei chupe: 'Nderivi ou ye ma, jare nderu uyucaca vaca tairusu vae umingüira vae, tai ou ye icavi uvãe ramo' —jei, jei—. ²⁸ Jayave tai tenondegua vae pochi jare uique'ã tenta pe. Jayave tu oẽ tenta güi jare jei tai pe uique vaerã —jei—.

²⁹ Jayave tai tenondegua vae jei tu pe: 'Mase, jeta año ma ayeyocui ndeve. Jecuaeño ayapo ndeporoyocui. ãrei neme'e'ã etei cheve capurarai yepe, aparea vaerã cheamigo reta pe nducaru vaerã' —jei, jei—.

³⁰ 'Jare cua nderai ico cuña aguasa rupi ico vae reta ndive jare jucuarãi umingasta opaete nde neme'e chupe vae. ãrei jae ou ye uvãe rupive, ndiyucaca chupe vaca tairusu vae nemingüira vae' —jei, jei—.

³¹ Jayave tu jei tai tenondegua vae pe: 'Cherai, jecuaeño nde ndico che ndive, jare opaete chembae nembae co' —jei, jei—. ³² 'Icavi co yayerovia vaerã. Echa'ã tenonde yave cua nderivi penti umanocue vae rami co cheve, ãrei añave icove ye ma cheve. Tenonde yave ucañi chegüi, ãrei añave avãe ye ma chupe' —jei, jei.

16

Uyeyocui vae ipatrón imbaembae opa umingasta vae

¹ Jare Jesús jei jemimboe reta pe: —Ico penti patrón icocatu vae jare ime güireco jembiocui. Jerãcua patrón pe quirãi jembiocui opa umingasta imbaembae —jei—.

² Jayave jocua patrón ueni jembiocui jare jei chupe: '¿Mbae pa co cua nererãcua cheve vae? Emimbeu cheve

mbae ndiyapo opaete chembaembae ndive vae. Echa'ã nomoêta co' —jei, jei—. ³ Jayave uyeyocui vae jei iyupe ipia pe: '¿Mbae ra ayapota? Echa'ã chepatrón chemoêta. Chepuere'ã ayoo ivi corepoti amingana vaerã. Chepuere'ã vi ayerure ñru vae reta pe mbaembae re. Echa'ã chemarata co' —jei, jei—. ⁴ 'Aicuaa ma mbae ayapota vae. Cuarã ayapo yave, chepatrón chemoê ma yave, ñru vae reta uyandarecota cheré' —jei, jei—. ⁵ Jayave omondo umimbeu vaerã opaete ipatrón pe mbae re ipia vae reta yugüeru vaerã ipi. Jayave upirandu tenonde ou vae pe: '¿Mbovi pa ndepía chepatrón pe?' —jei, jei—. ⁶ 'Cien lata aceite' —jei, jei—. Jayave uyeyocui vae jei chupe: 'Co oñ ndetupapire. Eguapi voi jare icuatía cincuenta lata' —jei, jei—. ⁷ Jayave upirandu ñru vae pe: '¿Mbovi pa ndepía chepatrón pe?' —jei, jei—. 'Cien arroba trigo' —jei, jei—. Jayave uyeyocui vae jei chupe: 'Co oñ ndetupapire. Icuatía ochenta arroba' —jei, jei—. ⁸ Jare patrón icocatu vae jei jembiocui jupi mbae vae uyapo vae pe: 'Icavi ete ndiyapo ndiyupe. Ndearacuaa co' —jei, jei—. Echa'ã cua ivi pegua reta iyaracuaa ete corepoti re Tumpa pe uyeyocui vae reta güi —jei—.

⁹ Che pumbiaracuaa piporu vaerã pecorepoti pembali vaerã ñru vae reta. Jayave jae reta uyeyapota peamigo retarã. Echa'ã pemano yave, opata peeya pecorepoti. Ërei ara pe peamigo reta pembaliresiveta jare joco pe picota jaeño mai pegua —jei Jesús chupe reta—. ¹⁰ Ime yave quía yandepuere yarovia catu mbae michi vae re vae, yandepuere vi yarovia catu mbae tuicha vae re. Jae ramiño vi ime yave quía upurumbítavi mbae michi vae re vae, upurumbítavita vi mbae tuicha vae re —jei—. ¹¹ Jáeramo Tumpa ipuere'ã yave pererovia catu corepoti re, ndarau vi pererovia catu mbaembae icavi vae ara pegua re —jei—. ¹² Jare ime yave quía yandepuere'ã yarovia catu ñru

vae icorepoti re vae, ndarau ñamee chupe corepoti güinoi vaerã iyupeguarã —jei—.

¹³ Penti uyeyocui vae uipota yave uyeyocui mocui patrón pe, umitarẽita penti patrón jare uauta ñru vae, ani uparaviqui cavita penti patrón pe jare güirĩrota ñru vae. Pepuere'ã piyeyocui Tumpa pe corepoti peau reve —jei—.

¹⁴ Jare fariseo reta cua uyandu yave, oyoyai Jesús. Echa'ã jae reta uipota ete corepoti. ¹⁵ Jayave Jesús jei chupe reta:

—Pe reta piyembujupi ñru vae reta jovaque. Ërei Tumpa uicuaa pepia pe oĩ vae. Jare yepe tẽi ñru vae reta pepiu, ãrei Tumpa uicuaa piyapo vae icavi mbae co —jei—.

Mboroyocui jare Tumpa iporoyocua

¹⁶ Ndei Juan ou mbove, Tumpa umimbeu yandeve yayapo vaerã mboroyocui jare Tumpa ñnee aracae umimbeu vae reta jei vae. Ërei Juan umbipi umimbeu ñee icavi vae Tumpa iporoyocua regua, jare opaete vae uipota uique Tumpa iporoyocua pe —jei—. ¹⁷ Ara jare ivi opata. Ërei yandepuere'ã etei yambai mboroyocui —jei—.

Omombo jembireco vae

(Mt 19.1-10; Mr 10.1-12)

¹⁸ Ime yave quía omombo jembireco vae, güireco yave ñru vae jembirecorã, uyuvanga menda re. Jare ime yave quía uyemombo ma vae güireco vae, jae vi uyuvanga menda re —jei—.

Cuimbae icocatu vae jare Lázaro

¹⁹ Ico penti cuimbae icocatu vae. Jecuaeño uyemonde icavi ete jare opa ara rupi uyapoca tembú icavi vae —jei—. ²⁰ Jare ico vi ñru cuimbae Lázaro jee vae. Jae co iparavete vae. Lázaro ituyu yepai ico. Opa ara rupi uguapi cuimbae icocatu vae jonque jovai —jei—. ²¹ Lázaro uipota jou tembú usururucue cuimbae icocatu vae imesa güi oa

SAN LUCAS 16:22 78 SAN LUCAS 16:31

vae. Jare yimba reta yugüeru uere Lázaro ituyu —jei— .
22 Jare penti ara jocua cuimbae iparavete vae umano, jare ángel reta güiraa ara pe Abraham oĩ vae pe. Jae ramiño vi cuimbae icocatu vae umano jare uñeñotica —jei—. 23 Jare cañitei pe cuimbae icocatuse vae uiporara ete oĩ. Jayave jovaiva jare uecha Abraham mbiri oĩ chugüi. Uecha vi Lázaro Abraham ndive —jei—. 24 Jayave iñeeãta reve jei: ‘Cheru Abraham, cheparareco. Embou Lázaro oñono vaerã ipoãca i pe umãqui vaerã checũ. Echa'ã aiporara ete aĩ cua tata pe’ —jei, jei—. 25 Ërei Abraham jei chupe: ‘Cherai, nemandúa quirãi nde ndico ivi pe yave, nde nenoise mbaembae icavi vae. Jae ramiño vi Lázaro ico ivi pe yave, mbaembae icavi mbae vae uyeyapo chupe. Ërei añave jae ipiacatu oĩ jare nde ndiporara neĩ —jei, jei—. 26 ‘Jae ramiño vi ime oĩ mbae ñanepãu pe yandepuere'ã yaasa vae. Jáeramo nduipota yave ndoo pepi, ndarau orepuere. Jae ramiño vi pipota yave peyu orepi, ndarau pepuere’ —jei, jei—. 27 Jayave cuimbae icocatuse vae jei Abraham pe: ‘Cua jeco pegua ayerure ndeve, cheru, nemondo vaerã Lázaro cheru jenta pe’ —jei, jei—. 28 ‘Echa'ã che ime anoi pandepo cherivi reta. Emondo umimbeu vaerã chupe reta, agüiye vaerã jae reta vi yugüeru cua jasi catu noĩ vae pe’ —jei, jei—. 29 Jayave Abraham jei chupe: ‘Ime güinoi Moisés iporoyocui jare Tumpa iñee aracae umimbeu vae reta uicuatía vae. Tumingueta reta jocua’ —jei, jei—. 30 Jayave cuimbae icocatuse vae jei Abraham pe: ‘Ndarau umingueta reta, cheru Abraham. Ërei uyecuaa yave chupe reta umanocue vae, ueyata reta iyemingueta icavi mbae vae ipia pe oĩ vae’ —jei, jei—. 31 Jayave Abraham jei chupe: ‘Uipota'ã yave uyapisaca Moisés iporoyocui jare Tumpa iñee aracae umimbeu vae reta uicuatía vae re, ndarau uyapo Tumpa jei uyapo vaerã vae yepe tẽi quía icove ye oo chupe reta

umanocue vae reta ipite güi' —jei, jei.

17

Mbaeyoa uyapoca vae

(Mt 18.6-7, 21-22; Mr 9.42)

¹ Jayave Jesús jei jemimboe reta pe: —Jecuaeño yugüirecota upurumbiavai vae reta. Ërei upurumbiavai vae reta uiporarata co —jei—. ² Icavita tēi co ĩru vae reta uñapiti vaerã iyayu re penti ita tuicha vae umbaesopipe vae, jare omombo vaerã ĩ guasu pe, agüiye vaerã uyapoca tēi mbaeyoa penti cheré güirovia vae pe —jei—. ³ Piñemoa ngatu. Nderivi uyapo yave icavi mbae vae ndeve, embiaracuaa. Jare jae ipiatiti yave jeco re, embiasachupe —jei—. ⁴ Jare uyapo yave icavi mbae vae ndeve siete vese penti ara pe, jare jei yave ndeve siete vese jocua ara pe: 'Ndarau ma ayavi ndecoti', embiasachupe —jei.

Mburugüirovia re

⁵ Jayave yandeYa jemimondo reta jei chupe: —Emimbeu oreve quirã orepurugüirovia ipuere uñemĩru.

⁶ Jayave yandeYa jei chupe reta:

—Aramoi pepurugüirovia michi ete penti mostaza jāicue michi-rai vae rami. Ërei jocua nunga mburugüirovia penoi yave, pepuereta pere cua ivira sicómoro jee vae pe: 'Ecuacua güiepita ĩ guasu pe', jare ivira uyapota pere vae —jei—.

Uyeyocui vae uyapo vae

⁷ Aramoi penti uyeyocui vae oo co pe umbiara vaerã ani umĩngaru vaerã maemimba reta. Iparaviqui opa ma uyapo yave, ou ye ipatrón jenta pe. Ërei ipatrón jei'ã etei chupe: 'Eyu eguapi cua mesa pe ecaru.' Jucuarã'iã jei chupe —jei—. ⁸ Echa'ã ipatrón jei chupe: 'Ecuarani emboyĩ mbae jau vaerã. Jayave javoi pegua eru cheve

cherembiurã. Jare che opa ma acaru yave, ndepuereta ndecaru' —jei, jei—. ⁹Jare ipatrón umee'ã etei yasurupai jembiocui pe jembiocui uyapo jei vae ramo —jei—. ¹⁰Jae ramiño vi pe reta piyapo ma yave opaete Tumpa jei peve piyapo vaerã vae, pere piyupe: 'Ayapo'ã mbae ayembu-tuichaca vaerã cheYa pe. Echa'ã jaeño ayapo jupi ayapo vaerã vae.' Jucuarãi pere —jei.

Diez cuimbae ipire ocui vae reta

¹¹Jare Jesús ooñoi Jerusalén coti. Jayave oo uvãe Samaria jare Galilea ipãu pe. ¹²Jare oo penti tenta guasurai pe uvãe, jare joco pe yugüeru Jesús coti diez cuimbae ipire ocui vae reta. Ërei jae reta upita mbiri catu Jesús güi. ¹³Jayave jae reta iñeeãta reve jei Jesús pe:

—Jesús, oporomboe vae, oreparareco.

¹⁴Jare Jesús uecha reta yave, jei chupe reta:

—Pecua sacerdote reta pe, jae reta umae vaerã peré — jei.

Jare yugüiraa rambueve, aramoíño ocui'ã ma ipire. ¹⁵Jare penti cuimbae ou ye ñru cuimbae reta ipite güi jare iñeeãta reve jei:

—Tumpa tuyembia doraca.

Echa'ã uicuaa ucuera ma co imbaerasi güi. ¹⁶Jayave uyeatica Jesús jovai jare umee yasurupai chupe. Jae co Samaria pegua. ¹⁷Jayave Jesús jei:

—Ambigüera diez cuimbae reta. Ërei nueve yugüeru'ã ye —jei—. ¹⁸Cua pentiño ou ye umbiadora vaerã Tumpa. Jare cua judio'ã co —jei.

¹⁹Jayave jei cuimbae pe:

—Epña iyemboi jare ecua nerenta pe. Ndecuera ma, nderovia cheré ramo —jei.

*Tumpa iporoyocua outa co
(Mt 24.23-28, 36-41)*

²⁰ Jare fariseo reta upirandu Jesús pe quirãï yave ra uyecuaata Tumpa iporoyocuaia. Jayave Jesús jei chupe reta:

—Tumpa iporoyocuaia ndarau uyecuaa pe reta pesareco jese vae rupi —jei—. ²¹ Jae ramiño vi ndarau quía jei: ‘Mase, co oĩ’, ani: ‘Mase, pee oĩ.’ Echa'ã Tumpa iporoyocuaia ime ma pepite pe oĩ —jei.

²² Jayave Jesús jei jemimboe reta pe:

—Outa ara reta pipota vaerã tẽi cherecha - che cuimbaerã ayeyapo vae - penti ara yepe, ãrei ndarau cherecha —jei—. ²³ Jayave ñru vae reta jeita peve: ‘Mase, co oĩ’, ani: ‘Mase, pee oĩ.’ Ërei agüiye pecua jae reta ndive —jei—. ²⁴ Tamijaanga ama uvera vae. Ama uvera vae uyecuaa opaete ara re. Jae ramiño vi che cuimbaerã ayeyapo vae ayecuaata opaete vae pe ayu ye yave —jei—. ²⁵ Ërei aiporara eteta rani jare añave yugüireco vae reta ndarau uipota aico vaerã juvicha guasurã —jei—. ²⁶ Picuaa co quirãï ivi pegua reta uyapo icavi mbae vae Noé ico rambueve. Jae ramiño vi uyapota reta icavi mbae vae che cuimbaerã ayeyapo vae ayu ye yave —jei—. ²⁷ Echa'ã Noé ico rambueve, ivi pegua reta ucaruñoi jare ucauñoi yugüireco, jecuaeño cuimbae reta umenda cuñatai reta ndive jare tu reta umee tayi reta cuimbae reta pe umenda jae ndive vaerã. Ërei penti ara Noé uique jocua chalana guasu pe. Jayave ou iporu guasu jare opa uyuca reta —jei—. ²⁸ Jae ramiño vi Lot ico rambueve, Sodoma pegua reta ucaruñoi jare ucauñoi jare jecuaeño oqua mbaembae jare umee mbaembae, jare jecuaeño umaeti jare uyapo jenta retarã —jei—. ²⁹ Ërei jocua ara Lot oẽ Sodoma güi yave, Tumpa ombou tata jare azufre jare opa uyuca Sodoma pegua reta —jei—. ³⁰ Jucuarãita vi uyeyapo che cuimbaerã ayeyapo vae ayecuaa yave —jei—.

³¹ Jocua ara ime yave penti cuimbae o cupe re oĩ vae, o cupe güi ugüeyi yave, agüiye tuique jo pe güiraa vaerã

imbaembae. Jae ramiño vi ime yave penti cuimbae co pe oĩ vae, agüiye tou ye jenta pe —jei Jesús chupe reta—. ³² Pemandúa Lot jembireco pe uyeyapo vae re —jei—. ³³ Uipota uñuvatu jecove vae ndarau ipuere uñuvatu. Ërei jocua umeeta jecove vae uñuvatuta co —jei—. ³⁴ Che jae peve, jocua pĩtu mocui vae uyapacuata ñugüinoi jupa pe. Tumpa güiraacata penti vae jare ñru vae upitata jupa pe —jei—. ³⁵ Jae ramiño vi mocui cuña umbaesota ñugüinoi. Tumpa güiraacata penti cuña jare ñru cuña upitata —jei—. ³⁶ Jae ramiño vi mocui cuimbae ñugüinoita co pe. Tumpa güiraacata penti cuimbae jare ñru cuimbae upitata co pe —jei.

³⁷ Jayave Jesús jemimboe reta upirandu chupe:

—OreYa, ¿quiape pa uyeyapota cua?

Jayave Jesús jei chupe reta:

—Umano vae jetecue oĩ vae pe uyematita uruvi reta.

18

Cuña ime umano vae jare mburuvicha upuruãa vae

¹ Jare penti ara Jesús imiari ye jemimboe reta pe umijaanga reve. Uipota uicuaaca chupe reta quirãi icavi co jecuaeño uyerure vaerã Tumpa pe jare agüiye vaerã icueri chugüi. ² Jáeramo jei chupe reta:

—Ico penti tenta guasu pe penti mburuvicha upuruãa vae. Uquiye'ã Tumpa güi jare güirĩro ñru vae reta —jei—. ³ Jae ramiño vi ico jocua tenta guasu pe penti cuña ime umano vae. Penti ara cuña ime umano vae oo mburuvicha upuruãa vae pe jare jei chupe: 'Cherepi cheroaicho güi' —jei, jei—. ⁴ Mburuvicha upuruãa vae uyapo'ã mbae uepi vaerã cuña. Ërei mbovi ara rupi jei iyupe ipia pe: 'Yepe tẽi aquiye'ã Tumpa güi jare arĩro ñru vae reta, ⁵ ãrei cua cuña ime umano vae chemambeco ramo, aepita co. Echa'ã

aepi'ã yave, jecuaeño outa chepi jare ndarau umaeño aputuu' —jei, jei.

⁶ Jayave yandeYa jei:

—Jucuarã co jei jocua mburuvicha upuruãa vae jupi mbae vae uyapo vae. ⁷ Ërei Tumpa jupi co. Jáeramo uepita co uiparavo vae ara rupi jare pĩtu rupi uyerure chupe vae reta, yepe tẽi aramoi ndarau uepi voi —jei—. ⁸ Che jae peve, immbae Tumpa uepita reta. Ërei che cuimbaerã ayeyapo vae ayu ye yave ivi pe, ¿imeta ra ñugüinoi upurugüirovia vae reta? —jei.

Fariseo jare mburuvicha peguarã ocovara vae

⁹ Jare Jesús oĩ vae pe ñugüinoi amocue uyembujupi ipiayemingueta pe vae. Jae reta güirõro ñru vae reta. Jare Jesús jei chupe reta umijaanga reve:

¹⁰ —Mocui cuimbae yugüiraa Tumpa jo pe uyerure vaerã Tumpa pe. Penti co fariseo jare ñru vae mburuvicha peguarã ocovara vae co —jei—. ¹¹ Fariseo uyemboi jare uyerure iyupe ipia pe cuarãi: ‘Tumpa, amee yasurupai ndeve. Echa'ã che aico'ã ñru cuimbae reta yugüireco rami. Che apurumbitavi'ã apĩro vaerã quía güi imbaembae. Ayapo'ã jupi mbae vae. Ayuvanga'ã menda re. Ayapo'ã vi jocua mburuvicha peguarã ocovara vae uyapo rami' —jei, jei—. ¹² ‘Che ayecuacu tembú güi mocui vese semana pe, jare amee ndeve diezmo opaete anoi vae güi' —jei, jei—. ¹³ Jare mburuvicha peguarã ocovara vae uyemboi oĩ mbiri catu fariseo güi, jare uipota'ã jovaiva. Jaeño oca iyee ipitía re jare jei: ‘Tumpa, cheparareco. Echa'ã che cheyoa vae co' —jei, jei—. ¹⁴ Che jae peve, Tumpa umbiasa mburuvicha peguarã ocovara vae pe imbaeyoa reta, jare jae oo ye jenta pe. Ërei umbiasa'ã fariseo pe imbaeyoa reta. Echa'ã ime yave quía uyembutuicha vae,

uñemimichicata co. Jare ime yave quía uñemimichi vae, uyembutuichacata co —jei.

*Jesús uyerure Tumpa pe sambiai reta re
(Mt 19.13-15; Mr 10.13-16)*

¹⁵ Jare amocue vae güeru Jesús oĩ vae pe sambiai reta, Jesús oñono vaerã ipo jese reta. Ërei Jesús jemimboe reta uecha reta yave, uñeengata güeru vae reta pe. ¹⁶ Ërei Jesús ueni sambiai reta jare jei:

—Pemaño sambiai reta re yugüeru vaerã checoti. Agüiye piyopia. Echa'ã cua nunga uyeyocui Tumpa pe iporoyocua pe —jei—. ¹⁷ Añete che jae peve, pipota'ã yave Tumpa pe piyeyocui vaerã penti sambiai uipota rami, ndarau pico Tumpa iporoyocua pe —jei.

*Mburuvicha icocatu vae
(Mt 19.16-30; Mr 10.17-31)*

¹⁸ Jare penti mburuvicha jei Jesús pe:

—Oporomboe vae, nde ndepiacavi co. ¿Mbae pa ayapota anoi vaerã tecove opa mbae vae? —jei.

¹⁹ Jayave Jesús jei chupe:

—¿Maera pa ndere cheve chepiacavi vae co? Mbaeti quía ipiacavi, jaeño co Tumpa —jei—. ²⁰ Nde ndicuaa co mboroyocui reta: 'Agüiye iyuvanga menda re. Agüiye epuruyuca. Agüiye nemonda. Agüiye ndapu ñru vae re. Ipiu nderu jare ndesi' —jei Jesús chupe.

²¹ —Ayavi'ã penti ave cua mboroyocui reta chemichi güive —jei.

²² Jare Jesús cua uyandu yave, jei chupe:

—Ime mbae uata ndiyapo vaerã. Emee opaete mbaembae nenoĩ vae corepoti re, jare emee ndecorepoti iparavete vae reta pe, jare ndicocatuta ara pe. Jayave eyu cherupíe —jei.

²³ Ërei mburuvicha cua uyandu yave, tuicha ipiatiti. Echa'ã icocatu ete co.

²⁴ Jare Jesús uecha yave mburuvicha ipiatiti upita, jei:

—Yavai ete co icocatu vae reta uique vaerã Tumpa iporoyocuia pe. ²⁵ Yavai ete icocatu vae uique vaerã Tumpa iporoyocuia pe, maemimba camello jee vae yuu jesacua rupi uasa vaerã güi —jei.

²⁶ Jayave cua uyandu vae reta jei:

—Jucuarã yave, ¿quía pa ipuere uyembiasaca?

²⁷ Jayave Jesús jei chupe reta:

—Ivi pegua reta ipuere'ã uyembiasa. Ërei Tumpa ipuere umbiasa reta —jei.

²⁸ Jayave Pedro jei Jesús pe:

—Mase, ore opaete mbaembae ndueya, ndoyu vaerã nderupíe.

²⁹ —Añete che jae peve —jei Jesús—, ime yave quía ueya jenta, ani tu, ani ichi, ani tiquei reta, ani tivi reta, ani jembireco, ani isambiai reta Tumpa iporoyocuia jeco pegua vae, ³⁰ jeta ete jecoviata co chupe ivi pe ico rambueve, jare taicue rupi Tumpa umeeta chupe tecove opa mbae vae —jei.

Jesús umimbeu ye umanota co

(Mt 20.17-19; Mr 10.32-34)

³¹ Jayave Jesús ueni jocua doce jemimboe reta, jare jei chupe reta:

—Mase, yaa co ñaĩ Jerusalén pe, jare opaete Tumpa iñee aracae umimbeu vae reta uicuatiacue cuimbaerã uyeyapo vae regua uyeyapota co cheve —jei—. ³² Echa'ã ñru vae reta chemeeta judío mbae vae reta pe. Jare jae reta cheyoyaita, uyapota icavi mbae vae cheve, jare undivita cheré —jei—.

³³ Jayave chenupata chicote pe jare cheyucata. Ërei mbapi ara rupi aicove yeta ayu umanocue vae reta ipite güi —jei.

³⁴ Ĕrei Jesús jemimboe reta uicuaa'ã mbae ra uipota jei cua Jesús jei chupe reta vae. Yavai ete chupe reta uicuaa vaerã mbae jei vae.

Cuimbae jesa mbae vae

(Mt 20.29-34; Mr 10.46-52)

³⁵ Jare Jesús coiño ma ou Jericó güi yave, penti cuimbae jesa mbae vae uguapi uyerure oĩ mbae re tape jembei pe. ³⁶ Jae uyandu jeta vae uasa ñugüinoi jocoropi, jare upirandu mbae ra uyeyapo oĩ. ³⁷ Jayave uasa vae reta umimbeu chupe Jesús Nazaret pegua uasa oĩ. ³⁸ Jayave jesa mbae vae iñeeãta reve jei:

—Cheparareco, Jesús. Nde co jae David iñemoñaeta reta pegua —jei.

³⁹ Jeta joco pe ñugüinoi vae reta uñeengata chupe. Uipota tēi umiquĩi. Ĕrei jesa mbae vae jeiete iñeeãta reve jei:

—Nde co jae David iñemoñaeta reta pegua. Cheparareco —jei.

⁴⁰ Jayave Jesús uyemboi, jare jei joco pe ñugüinoi vae reta pe güeru vaerã jesa mbae vae. Jare jesa mbae vae ou yave Jesús oĩ vae pe, Jesús upirandu chupe:

⁴¹ —¿Mbae pa ndipota ayapo vaerã ndeve?

—Tamae, cheYa —jei.

⁴² Jayave Jesús jei chupe:

—Emae. Ndecuera ma, nderovia cheré ramo —jei.

⁴³ Jare jupivoi ipuere umae, jare oo Jesús jaicue umbiadora reve Tumpa. Jare opaete joco pe ñugüinoi vae reta vi cua uecha yave, umbiadora Tumpa.

19

Jesús jare Zaqueo

¹ Jare Jesús uique Jericó pe jare oo ye joco güi. ² Jare ico joco pe penti cuimbae Zaqueo jee vae. Jae co mburuvicha

peguarã ocovara vae reta itenondegua jare jae co icocatu vae. ³ Jare Zaqueo uipota tẽi uecha Jesús. Ërei ipuere'ã uecha. Echa'ã jeta vae ñugüinoi Jesús uasa vae rupi, jare Zaqueo ipucu'ã co. ⁴ Jáeramo Zaqueo osi oo penti ivira sicómoro jee vae tape jembei pe oĩ vae pe, jare uyupi jese uecha vaerã Jesús. Echa'ã Jesús uasata oĩ jcoropi. ⁵ Jare Jesús oo uvãe yave ivira oĩ vae pe, jovaiva umae jare uecha Zaqueo. Jayave jei chupe:

—Egüeyi, Zaqueo. Echa'ã añave aipota apou ndepi —jei.

⁶ Jayave Zaqueo ugüeyi voi, jare güiraa Jesús jenta pe uyerovia reve. ⁷ Jare opaete ñru vae reta cua uecha yave, ñneenguru reve jei reta:

—Jae oo opou penti cuimbae iyoa vae pe.

⁸ Ërei Zaqueo uyemboi yandeYa jovai jare jei chupe:

—Mase, cheYa, ameeta chembaembae mbite rupi iparavete vae reta pe. Jare ime yave quía güi apĩro mbae chugüi vae, irundi ye ambijecoviata chupe —jei.

⁹ Jayave Jesús jei chupe:

—Cua ara yembiasa ou cua tenta pegua reta pe. Echa'ã nde vi co jae Abraham ñnemoñaeta reta pegua —jei—.

¹⁰ Echa'ã che cuimbaerã ayeyapo vae ayu aeca vaerã jare ambiasa vaerã ucañi Tumpa güi vae reta —jei.

Diez corepoti jare uyeyocui vae reta

(Mt 25.14-30)

¹¹ Jare Jesús ndive ñugüinoi vae reta cua uyandu ma yave, Jesús imiari ye chupe reta umijaanga reve. Echa'ã oo ma uvãe coiño Jerusalén güi, jare jae ndive ñugüinoi vae reta ipia pe uyemingueta tẽi imambae ete co uyecuaata Tumpa iporoyocua. ¹² Jáeramo Jesús jei chupe reta:

—Penti mburuvicha oota iivi güi ambie iivi mbiri oĩ vae pe uyeyapo vaerã iivi pegua reta juvicha guasurã. Jare taicue rupi ou yeta —jei—. ¹³ Jare ndei oo mbove, ueni diez jembiocui reta jare umee penti penti pe corepoti jepi ete

vae, jare jei chupe reta: ‘Piporu cua corepoti ayu ye regua’ —jei, jei—. ¹⁴ Ĕrei mburuvicha jentaigua reta umitarēi mburuvicha, jare mburuvicha oo ma yave ambie ivi pe, jae reta omondo jei vaerā: ‘Nduipota’ā jocua cuimbae ico vaerā oreruvicha guasurā’ —jei reta, jei—.

¹⁵ Ĕrei mburuvicha uyeyapo jentaigua reta juvicha guasurā. Jayave ou ye uvāe iivi pe jare ueni jembiocui corepoti umee chupe vae reta uyembati vaerā, jae uicuaa vaerā mbovi ra penti penti umingana —jei—. ¹⁶ Penti jembiocui jei chupe: ‘Patrón, amimbaraviqui corepoti neme cheve vae, jare añave anoi diez corepoti’ —jei, jei—. ¹⁷ Jayave ipatrón jei jocua jembiocui pe: ‘Icavi ndiyapo. Nde co jae cherembiocui icavi vae. Cua amee ndeve vae mboviño. Ĕrei nemimbaraviqui cavi. Jáeramo che toroño diez tenta guasu pegua reta juvicharā’ —jei, jei—. ¹⁸ Jayave ĩru jembiocui jei chupe: ‘Patrón, amimbaraviqui corepoti neme cheve vae, jare añave anoi pandepo corepoti’ —jei, jei—. ¹⁹ Jayave ipatrón jei jocua jembiocui pe: ‘Icavi ndiyapo. Che toroño pandepo tenta guasu pegua reta juvicharā’ —jei, jei—. ²⁰ Jayave ĩru jembiocui jei chupe: ‘Mase, patrón, co oĩ corepoti neme cheve vae. Ayapicua añuvatu ndeve’ —jei, jei—. ²¹ ‘Echa’ā aquiye ndegüi ndepiapochi ramo. Nde nepĩro mbaembae ĩru vae reta güi jare ndeaviro ĩru vae reta oñoti vae’ —jei, jei—. ²² Jayave ipatrón jei jocua jembiocui pe: ‘Nde ndere vae rupi etei che nuãata co. Nde co jae cherembiocui icavi mbae vae. Ndicuaa chepiapochi co jare quirāi apĩro mbaembae ĩru vae reta güi jare quirāi aaviro ĩru vae reta oñoti vae’ —jei, jei—. ²³ ‘¿Maera pa nderaa’ā checorepoti banco pe? Echa’ā jucuarāi ndiyapo yave, ayu ye yave nemeeta tēi co cheve corepoti amee ndeve vae jare mbovi ye banco pegua reta umĩruta tēi jae ndive vae’ —jei, jei—

. ²⁴ Jayave ipatrón jei ñru jembiocui joco pe ñugüinoi vae reta pe: ‘Pepĩro chugüi jocua corepoti jare pemee jocua diez corepoti güinoi vae pe’ —jei, jei—. ²⁵ Ërei jae reta jei ipatrón pe: ‘Patrón, jae güinoi ma diez corepoti.’ ²⁶ ‘Añete co’ —jei ipatrón chupe reta, jei—. ‘Ërei che jae peve, güinoi vae pe uñemĩruta, jare mbaeti güinoi vae güi mbovi ete güinoi vae uyeequita’ —jei, jei—. ²⁷ ‘Ërei peru cua pe jocua cherovaicho reta. Jae reta uipota'ã che aico vaerã juvicha guasurã. Piyuca cherovaque’ —jei, jei.

Jesús oo Jerusalén pe

(Mt 21.1-11; Mr 11.1-11; Jn 12.12-19)

²⁸ Jare Jesús cua jei ma chupe reta yave, uguata ye ñru vae reta jenonde oo Jerusalén coti. ²⁹ Jare yugüiraa uvãe coiño tenta guasu-rai reta Betfagé jare Betania güi. Joco pe oĩ ivitu guasu Olivos. Jayave Jesús oyocui mocui jemimboe reta.

³⁰ —Pecua pea tenta guasu-rai yanderovai oĩ vae pe —jei chupe reta—. Peo pevãe rupive, pevãeta penti mburica tairusu vae uñeñapĩti oĩ. Ndei ave etei quía opo jese. Piyora jare peru —jei—. ³¹ Jare ime yave quía jei peve vae: ‘¿Maera pa piyora?’ pere chupe cuarãi: ‘YandeYa uipota uiporu’ —pere, jei.

³² Jayave Jesús omondo vae reta yugüiraa, jare uvãe mburica tairusu vae Jesús umimbeu chupe reta rami. ³³ Jare oyora ñugüinoi yave, mburica iya reta upirandu chupe reta:

—¿Maera pa piyora peĩ mburica?

³⁴ —YandeYa uipota uiporu —jei reta.

³⁵ Jayave güeru reta mburica tairusu vae Jesús oĩ vae pe. Jayave Jesús jemimboe reta oñono iyasoya mburica icupe re, jare Jesús opo jese. ³⁶ Jare Jesús oo rambueve Jerusalén

coti, joco pe ñugüinoi vae reta uipiso iyasoya tape rupi mburica jenonde.

³⁷ Jare umbipi reta ugüeyi ivitu guasu Olivos güi. Coiño ma yugüeru Jerusalén güi. Jayave opaete Jesús jemimboe reta umbipi uyerovia. Umbiadora reta Tumpa iñeeãta reve opaete miacañi uecha Jesús uyapo vae reta re. ³⁸ Jare jei reta:

—Tuyembiaadoraca yandeRuvicha Guasurã yandeYa jee re ou vae. Mbiacatu toĩ ara pe. Ara pegua reta tumbiadora Tumpa —jei reta.

³⁹ Jare amocue fariseo reta jeta vae ipite pe ñugüinoi vae jei Jesús pe:

—Oporomboe vae, iñeengata nderemimboe reta pe.

⁴⁰ Ërei Jesús jei chupe reta:

—Che jae peve, cua reta quĩ yave, jupivoiño ita reta uyeminguetata iñeeãta reve —jei.

⁴¹ Jare Jesús coiño ma Jerusalén güi ou uvãe yave, umae Jerusalén re jare umbipi uyao. ⁴² Jare jei:

—Ndicuaa'ã quirã ra ndepuere neno mbiacatu. Cua ara reta pe ndicuaata tẽi co. Ërei añave ndarau ndicuaa —jei—. ⁴³ Outa ma uvãe nderovaicho reta nequẽse vaerã jare ndarau umaẽño ndepite pe yugüireco vae reta re oẽ vaerã ndegüi —jei—. ⁴⁴ Jare jae reta opata nembusururu jare uyucata opaete ndepite pe yugüireco vae reta. Ndarau ueya reta penti ita ñru ita iárambo, ndicuaa'ã Tumpa umeeta tẽi mbiacatu ndeve ramo —jei.

Jesús Tumpa jo pe uyapo vae

(Mt 21.12-17; Mr 11.15-19; Jn 2.13-22)

⁴⁵ Jayave Jesús uique Tumpa jo pe, jare umbipi omoẽ joco güi umaemee vae reta jare mbae ogua vae reta. ⁴⁶ Jare jei chupe reta:

—Tumpa iñee pe uyecuatía oĩ cuarãi: ‘Chero co jae piyerure cheve pipe vae.’ Jucuarãi uyecuatía oĩ. Ërei pe reta piyapo ma imonda vae reta iñemia rami —jei.

⁴⁷ Jayave Jesús oporomboe Tumpa jo pe opa ara rupi. Ërei sacerdote reta itenondegua reta jare mboroyocui re oporomboe vae reta jare tenta guasu pegua reta itenondegua reta ueca quirãi ipuere uyucaca vaerã Jesús. ⁴⁸ Ërei uicuaa'ã reta quirãita ra uyucaca. Echa'ã opaete tenta guasu pegua reta uipota ete uyapisaca Jesús re.

20

Jesús imbaepuere

(Mt 21.23-27; Mr 11.27-33)

¹ Jare penti ara Jesús oporomboe oĩ Tumpa jo pe, jare umimbeu joco pe ñugüinoi vae reta pe ñee icavi vae. Jayave yugüeru vi joco pe sacerdote reta itenondegua reta jare mboroyocui re oporomboe vae reta jare tenta guasu pegua reta itenondegua reta. ² Jayave jae reta jei Jesús pe:

—Emimbeu oreve, ¿mbae nunga mbaepuere pa neni cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

³ Jayave Jesús jei chupe reta:

—Che vi tapirandu peve mbae re. Yaecha pepuere pemimbeu cheve —jei—. ⁴ ¿Quía pa ombou Juan upurumbibautiza vaerã? ¿Tumpa pa ombou? ani ¿ivi pegua reta pa ombou? —jei.

⁵ Jayave jae reta jei uyupe:

—Yae yave: ‘Tumpa co ombou’, jae jeita yandev: ‘Jucuarãi yave, ¿maera pa perovia'ã?’ ⁶ Ërei yae yave: ‘Ivi pegua reta co ombou’, opaete tenta guasu pegua reta yandeapita ita pe yandeyuca. Echa'ã jae reta güirovia Juan co jae penti Tumpa iñee umimbeu vae —jei reta.

⁷ Jáeramo jei reta Jesús pe:

—Nduicuaa'ã quía ra ombou Juan.

⁸ Jayave Jesús jei chupe reta:

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei.

Co iporúa icavi mbae vae reta

(Mt 21.33-44; Mr 12.1-11)

⁹ Jayave Jesús umbipi imiari joco pe ñugüinoi vae reta pe umijaanga reve.

—Penti cuimbae oñoti jeta uva ico pe. Jayave uiporuca ico ñru vae reta pe, jae reta uyandareco vaerã jese. Jayave co iya oo mbiri ambie ivi pe upita vaerã ima pegua —jei—. ¹⁰ Jare uva yagüiye ma yave, co iya ombou penti jembiocui co iporúa reta pe, jae reta umbiyao vaerã tẽi uva chupe reta, iya güinoi vaerã imbaerã. Ërei co iporúa reta uinupa co iya jembiocui, jare omondo ye. Umee'ã etei chupe güiraa vaerã —jei—. ¹¹ Jayave co iya ombou ye tẽi ñru jembiocui. Ërei co iporúa reta uinupa jare uyapo icavi mbae vae chupe, jare omondo ye. Umee'ã etei chupe güiraa vaerã —jei—. ¹² Jayave co iya ombou ye tẽi ñru jembiocui. Ërei co iporúa reta umbipere, jare omondo ye —jei—. ¹³ Jayave co iya jei iyupe: '¿Mbae ra ayapota? Amondota cherai aau ete vae. Aramoi jae reta uipiuta cherai' —jei, jei—. ¹⁴ Ërei co iporúa reta uecha yave co iya tai, jei reta uyupe: 'Cua co jae iyarã vae. Yaa yayuca, jare yande yaicota co iyarã' —jei reta, jei—. ¹⁵ Jayave jae reta omombo co güi, jare uyuca.

Jáeramo ¿mbae ra uyapota co iya jocua co iporúa reta pe? —jei—. ¹⁶ Outa, opa uyuca vaerã jocua co iporúa reta, jare uiporucata ico ambie vae reta pe —jei.

Jayave cua uyandu vae reta jei:

—Tumpa mona jei agüiye uyeyapo.

¹⁷ Jayave Jesús umaie jese reta jare jei:

—¿Mbae ra uipota jei cua Tumpa iñee pe uyecuatía oĩ vae?

‘Ita tenta iyapoa reta omombo vae uyeyapo ma ita tenondegua vae.’

¹⁸ Ime yave quía jocua ita re uyepiaca vae, uñemopëta co. Jare ime yave quía jocua ita oa jese vae, opata umbiperasoraso —jei.

¹⁹ Jayave jupivoi sacerdote reta itenondegua reta jare mboroyocui re oporomboe vae reta uipota tēi uipisi Jesús. Echa'ã uicuaa cua Jesús umijaanga reve jei vae uicuaaca quirãi jae reta teco güinoi. Ërei quiyie tenta guasu pegua reta güi.

¿Jupi pa yambiepi vaerã César pe?

(Mt 22.15-22; Mr 12.13-17)

²⁰ Jare jecuaeño jae reta umae Jesús re. Jare omondo vi ñru vae reta uipiãro vaerã Jesús. Cua reta uipota tēi umbitavi Jesús, Jesús ipia pe uyemingueta vaerã tēi jae reta jupi co. Ërei jae reta uipota tēi umbijeco mbae jei vae re, uñeapo vaerã jese mburuvicha pe. ²¹ Jayave jae reta jei Jesús pe:

—Oporomboe vae, nduicuaa nde ndere vae jare ndeporomboe jese vae añete co. Nde nembutuicha'ã penti ave ñru vae güi. Nde ndeporomboe cavi quirãi Tumpa uipota yaico vaerã vae re —jei reta—. ²² César yandocui yambiepi vaerã chupe corepoti pe. ¿Jupi pa yambiepi vaerã chupe? ani ¿jupi'ã pa? —jei reta.

²³ Ërei Jesús uicuaa jae reta uipota tēi co umbitavi, jare jei chupe reta:

—¿Maera pa pipota piyavica cheve? ²⁴ Peru cheve penti corepoti taecha —jei—. ¿Quía jova íã pa cua? ¿Quía jee pa cua uyecuatía oĩ vae? —jei.

—Cua César imbae co —jei reta.

²⁵ Jayave Jesús jei chupe reta:

—Pemeé César pe César pegua, jare pemeé Tumpa pe Tumpa pegua —jei.

²⁶ Jare jae reta ipuere'ã umbijeco Jesús mbae jei vae re tenta guasu pegua reta jovaque. Ipiacañi cua jei vae re, jare jei'ã ye mbae ave chupe.

¿Icove yeta pa umanocue vae reta?

(Mt 22.23-33; Mr 12.18-27)

²⁷ Jayave yugüeru Jesús oĩ vae pe amocue saduceo reta. Opaete saduceo reta jei umanocue vae reta icove ye'ã co. Saduceo yugüeru vae reta jei Jesús pe:

²⁸ —Oporomboe vae, Moisés uicuatía ueya yandeve cuarã: ‘Penti tiquei vae umano yave, jembirecocue mbaeti imembi chupe yave, cuimbae amiri tivi tumenda jocua cuña ndive. Jayave cuña imembi yave, cuimbae tumbijee sambiai tiquei amiri jee pe.’ Jucuarãi uicuatía Moisés —jei reta—. ²⁹ Ico penti cuimbae seis tivi reta güinoi vae. Cua cuimbae umenda, jare umano umimembi mbae reve. ³⁰ Cuimbae amiri jaicue rupigua umenda jembirecocue ndive, ãrei umano vi umimembi mbae reve. ³¹ Jayave jaicue rupigua ye umenda cuña ndive, jare umano vi umimembi mbae reve. Opaete siete reve umenda jocua cuña ndive, jare opaete siete reve umano umimembi mbae reve —jei reta—. ³² Taicue rupi cuña umano vi. ³³ Jayave umanocue vae reta icove ye yave, ¿quía nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

³⁴ Jayave Jesús jei chupe reta:

—Cua ivi pe yugüireco rambueveño cuimbae reta umenda cuña reta ndive jare cuña reta umenda cuimbae reta ndive. ³⁵ ãrei icavita co Tumpa pe umbijecove ye vaerã amocue vae güeru umanocue vae reta ipite güi. Jae reta yugüireco yeta co, ãrei cuimbae reta ndarau umenda cuña reta ndive jare cuña reta ndarau umenda

cuimbae reta ndive icove reta ye yave —jei—. ³⁶Jae ramiño vi ndarau umano ye. Echa'ã yugüirecota ángel reta yugüireco rami. Yugüirecota Tumpa tai retará. Echa'ã Tumpa umbijecove yeta güeru umanocue vae reta ipite güi —jei—. ³⁷Tamimbeu peve umanocue vae reta regua. Icove yeta co. Moisés uicuaaca cua uicuatía yave jocua yai jendi vae regua. Echa'ã Moisés umimbeu quirái yandeYa Tumpa jei: 'Che co jae Abraham, Isaac jare Jacob iTumpa.' Cua umimbeu Moisés —jei—. ³⁸Echa'ã Tumpa mbaeti co umanocue vae reta iTumpa. Jae co tecove güinoi vae reta iTumpa. Yepe tēi ñamano, yanderecove imeño oĩ —jei.

³⁹Jayave amocue mboroyocui re oporomboe vae reta jei Jesús pe:

—Oporomboe vae, icavi ndere.

⁴⁰Jare jocua güive uquiye reta upirandu vaerã chupe mbae re.

¿Quía inemoñaa reta pegua pa co Cristo?

(Mt 22.41-46; Mr 12.35-37)

⁴¹Jayave Jesús upirandu joco pe ñugüinoi vae reta pe:

—¿Maera pa jei mboroyocui re oporomboe vae reta Cristo co jae David inemonaa reta pegua? ⁴²Echa'ã David etei jei Salmo reta pe cuarái:

'YandeYa Tumpa jei cheYa pe:

Eguapi cheyipí pe cheacata coti,

⁴³nderovaicho reta opa amiamiri regua' —jei Tumpa.

Jucuarái jei David —jei—. ⁴⁴¿Maera pa jei reta Cristo co jae David inemoñaa reta pegua? Echa'ã David etei jei chupe: 'CheYa' —jei.

Jesús umbijeco mboroyocui re oporomboe vae reta

(Mt 23.1-36; Mr 12.38-40; Lc 11.37-54)

⁴⁵Jayave Jesús jei jemimboe reta pe opaete joco pe ñugüinoi vae reta jovaque:

⁴⁶—Piñemoa ngatu mboroyocui re oporomboe vae reta güi. Jae reta jecuaeño uipota uguata jemimonde pucu vae reve, jare uipota ñru vae reta pe uyembisaludaca vaerã calle reta rupi. Jare yugüiraa yave tupao pe jare para pe, jecuaeño uipota uguapí tenda tenondegua vae reta pe — jei—. ⁴⁷Jae reta upíro cuña ime umano vae reta güi opaete imbaembae, jare pucu uyerure Tumpa pe upurumbitavi vaerã. Jae reta uiporara eteta co —jei.

21

Cuña ime umano vae umee corepoti Tumpa pe
(Mr 12.41-44)

¹Jare Jesús Tumpa jo pe oĩ yave, uecha icocatu vae reta oñono icorepoti corepoti jiru pe. ²Jare uecha vi penti cuña ime umano vae iparavete vae oñono mocui riare corepoti jiru pe. ³Jayave Jesús jei:

—Añete che jae peve, cua cuña ime umano vae iparavete vae uyapo jeta ete opaete ñru oñono vae reta güi.

⁴Echa'ã opaete ñru reta güeru oñono mbovi jeta güinoi vae güi. Ërei cua cuña, yepe tẽi iparavete, oñono opaete güinoi vae. Jocua co jembú jepirã tẽi vae —jei chupe reta.

Tumpa jo uyeitita
(Mt 24.1-2; Mr 13.1-2)

⁵Jare amocue vae uyemingueta ñugüinoi Tumpa jo re. Jei reta icavi ete co ita reta jare mbaembae tenta guasu pegua reta güeru omopõra vaerã vae. Jayave Jesús jei:

⁶—Outa co uvãe ara cua o reta añave peeche vae uyeiti vaerã. Ndarau upita penti ave ita ñru ita iárambo —jei.

Mbaesusere reta uyeyapota vae
(Mt 24.3-28; Mr 13.3-23)

⁷Jayave Jesús jemimboe reta upirandu chupe:

—Oporomboe vae, ¿quirãï yave pa cua uyeyapota? Jare opaete cua uyeyapota ma yave, ¿quirãïta pa nduicuaa? — jei reta.

⁸ Jayave Jesús jei chupe reta:

—Piñemoa ngatu agüïye vaerã petavi. Echa'ã yugüeruta jeta cheree pe uyembijeeta vae reta. Jae reta jeita: 'Che co jae Cristo. Outa co uvãe jocua ara reta' —jeita, jei—. Ërei agüïye piñemiïru jae reta ndive —jei—. ⁹ Imeta co ñerãro reta jare tecorai reta. Ërei piyandu yave cua reta regua, agüïye pequïye. Cua susere reta uyeyapoñotai co. Ërei cua susere reta ndei ave co opa vaerã —jei—.

¹⁰ Penti ivi pegua reta uñerãrota ambie ivi pegua reta ndive, jare mburuvicha reta uñerãrota ïru mburuvicha reta ndive. ¹¹ Jare ivi tanta ucãtata jeta que rupi. Jare imeta caruai reta jare mbaerasi reta jeta vae uyucata vae. Jare mbaembae ara re uyecuaata vae upurumingüiyeta co —jei—. ¹² Ërei ndei cua uyeyapo mbove, ïru vae reta pepisita jare uyapota icavi mbae vae peve. Jae reta pereraata itupao reta pe jare peñonota peresoriru pe, jare pereraata mburuvicha guasu reta jovai chereco pegua — jei—. ¹³ Ërei jucuarãï uyapo reta peve yave, pepuereta pemimbeu cheregua —jei—. ¹⁴ Agüïye piyemipia'ã cua re jare agüïye pepia pe piyemingueta mbae ra pereta vae — jei—. ¹⁵ Echa'ã che aicuaacata peve mbae pere vaerã, jare che pumbiaracuaata agüïye vaerã perovaicho reta uicuaa mbae ra ipuere jei peve —jei—. ¹⁶ Jare peru jare pesi, jare periquei reta jare perivi reta, jare perentarã reta jare peamigo reta pemeeta perovaicho reta pe, jare amocue pe reta piyeyucacata co —jei—. ¹⁷ Jare piñemitarëicata opaete vae pe chereco pegua. ¹⁸ Ërei ndarau penti ave pea ucañi —jei—. ¹⁹ Jare perõsa peo pevãe iyapi pe yave, piyembiasacata co —jei—.

²⁰ Jare peecha jeta sundaro reta Jerusalén oñova yave, picuaata ou ma co uvãe Jerusalén uyembai vaerã —jei—. ²¹ Jayave Judea pe ñugüinoi vae reta tosi ivitu guasu coti. Jare Jerusalén pe ñugüinoi vae reta toẽ tosi joco güi. Jare jocua coiño Jerusalén güi ñugüinoi vae reta agüiye tuyugüiraa Jerusalén pe —jei—. ²² Echa'ã jocua ara reta pe ivi pegua reta uiporara eteta, jare opaete Tumpa iñee pe uyecuatía oĩ vae uyeyapota co —jei chupe reta—. ²³ Jare ipurúa vae reta jare umicambu vae reta uiporara eteta jocua ara reta pe. Echa'ã cua ivi pegua reta uiporara eteta. Echa'ã Tumpa uiporacata co chupe reta —jei—. ²⁴ Jare jeta cua ivi pegua reta uyeyucacata quisepecu pe. Jare jovaicho reta güiraata jeta cua ivi pegua reta ambie ivi reta pe. Jare judío mbae vae reta yugüirecota Jerusalén pe judío mbae vae reta iara reta opa regua —jei Jesús chupe reta—.

Cuimbaerã uyeyapo vae ou yeta

(Mt 24.29-44; Mr 13.24-37)

²⁵ Jayave ivi pegua reta uechata mbae uyecuaa oĩ guarasí jare yasi jare yasitata reta re. Jare opaete ivi pegua reta uiporarata jare ndarau uicuaa mbae uyapo vaerã. Jare i guasu reta jiapu eteta —jei—. ²⁶ Jare ivi pegua reta uquiye eteta. Uquiye eteta mbae ivi pe uyeyapo oĩ vae güi. Jare ara re mbaepuere güinoi vae reta ucátata —jei—. ²⁷ Jayave ivi pegua reta cherechata ayu amapĩtu reve. Che cuimbaerã ayeyapo vae anoita mbaepuere tuicha vae, jare ayembioracata opaete vae pe —jei—. ²⁸ Jare opaete cua mbaembae umbipi uyeyapo yave, piñemiatangãtu. Echa'ã imambae Tumpa perepita —jei chupe reta.

²⁹ Jayave Jesús jei chupe reta umijaanga reve:

—Tamijaanga iva jare opaete ivira reta. ³⁰ Uyembipi joqui yave, picuaa uyaro ma co ama oqui vaerã —jei—. ³¹ Jae ramiño vi pe reta peeche yave cua mbaembae

uyeyapo ñugüinoi vae, picuaata coiño ma co ou Tumpa iporoyocuia —jei Jesús chupe reta—.

³² Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei—. ³³ Ara jare ivi opata, ãrei chiñee ndarau opa —jei—.

³⁴ Piñemoa ngatu, agüiye vaerã pecau jare pesavipo, jare agüiye vaerã piyemipia'ã mbaembae ivi pegua re. Echa'ã jucuarã piyapo yave, outa uvãe jocua ara peãro mbae peĩ reve —jei chupe reta—. ³⁵ Echa'ã jocua ara uipocouta opaete ivi pegua reta ñuai oporomboa rami —jei—. ³⁶ Jáeramo piñemoa ngatu, jare jecuaeño piyerure Tumpa pe icavi vaerã chupe perepi vaerã opaete cua uyeyapota vae güi jare piyemboi vaerã cherovai. Che co jae cuimbaerã uyeyapo vae —jei.

³⁷ Jare opa ara rupi Jesús oporomboe oĩ Tumpa jo pe. Ñrei caaru ma yave oo joco güi upita ivitu guasu Olivos re.

³⁸ Jare opaete tenta guasu pegua reta yugüeru neimbove asi Tumpa jo pe uyapísaca vaerã Jesús re.

22

Uipota reta uyucaca Jesús

(Mt 26.1-5, 14-16; Mr 14.1-2, 10-11; Jn 11.45-53)

¹ Jare pascua uyaro ma oĩ. Jocua ara pe judío reta jou mbiyape ovu mbae vae. ² Jayave sacerdote reta itenondegua reta jare mboroyocui re oporomboe vae reta ueca ñugüinoi quirã ipuere uyucaca Jesús. Ñrei uquiye tenta guasu pegua reta güi.

³ Jayave Satanás etei oya Judas Iscariote re - Judas co jae jocua doce vae güi penti. ⁴ Jayave Judas oo sacerdote reta itenondegua reta jare Tumpa jo re uyandareco vae reta ñugüinoi vae pe uyemingueta vaerã jae reta ndive quirã ra ipuere umee Jesús chupe reta. ⁵ Jayave jae reta

uyerovia, jare jei Judas pe umeeta co chupe corepoti.
⁶ Jayave Judas jei chupe reta umeeta co Jesús chupe reta.
 Jayave umbipì ueca quirãì ipuere umee Jesús chupe reta
 tenta guasu pegua reta mbaeti Jesús ndive ñugüinoi yave.

Jesús ucaru jemimboe reta ndive

(Mt 26.17-29; Mr 14.12-25; Jn 13.21-30; 1 Cor 11.23-26)

⁷ Jare ou uvãe pascua. Jocua ara judío reta jecuaeño
 uyuca ovecha jare umbipì jou mbiyape ovu mbae vae.

⁸ Jayave Jesús jei Pedro jare Juan pe:

—Pecua piyapícatu yau vaerã tembú pascua pegua.

⁹ Jayave jei reta chupe:

—¿Quiape pa ndipota nduyapícatu vaerã?

¹⁰ —Mase, peo pevãe yave tenta guasu pe, peovãitita
 penti cuimbae i güiraa iru pe vae —jei—. Pecua jaicue.
 Jae uiqueta penti tenta pe. Pique vi pe reta —jei—.

¹¹ Jayave pere tenta iya pe: ‘Oporomboe vae jei: ¿Quiape
 pa ime oĩ o, joco pe jau vaerã tembú pascua pegua
 cheremimboe reta ndive’ —jei, pere chupe, jei Jesús—.

¹² Jayave tenta iya uechacata peve penti o tuicha vae jo
 ivate pe, opaete mbaembae yaiporuta vae reve. Joco pe
 piyapícatu yandevê —jei.

¹³ Jayave Pedro jare Juan yugüiraa jare uvãe Jesús jei
 chupe reta rami. Jare uyapo reta tembiu pascua pegua
 Jesús jare jemimboe reta jou vaerã. ¹⁴ Jare ora ou ma uvãe
 yave, Jesús uguapì mesa pe jocua doce jemimondo reta
 ndive. ¹⁵ Jayave jei chupe reta:

—Chequirẽi ete jau cua tembú pascua pegua pe reta
 ndive, ndei amano mbove. ¹⁶ Che jae peve, ndarau ye jau,
 opaete cua uyemijaanga jese vae Tumpa iporoyocuiã pe
 uyeyapo regua —jei.

¹⁷ Jayave Jesús uipìsi copa, jare umee yasurupai Tumpa
 pe. Jayave jei:

—Opaete pe reta peu cua vino. ¹⁸ Che jae peve, ndarau ye jau vino, Tumpa iporoyocua ou regua —jei.

¹⁹ Jayave Jesús uipisi mbiyape, jare umee yasurupai Tumpa pe. Jayave upisãa mbiyape jare umee chupe reta.

—Cua co jae cherete —jei—. Añemeeta amano vaerã peré. Peu cua cheré pemandúa vaerã —jei.

²⁰ Jae ramiño vi uipisi copa, opa ma ucaru reta yave, jare jei:

—Cua vino co jae Tumpa jei piãu ye vae cherugüi pe ayapota vae. Cherugüi uyepiyereta peré —jei—.

²¹ Ërei yandepite pe uguapi oĩ cherovaicho reta pe chemeeta vae —jei—. ²² Añete co, che cuimbaerã ayeyapo vae amanota. Cua Tumpa jei vae co. Ërei jocua cuimbae chemeeta vae uiporarata co —jei.

²³ Jayave jemimboe reta umbipi upirandu uyupe quía ra uyapota chupe jucuarãi.

¿Quía pa icota tenondeguarã vae?

²⁴ Jare Jesús jemimboe reta umbipi uyemingueta uyupe quía ra icota tenondeguarã vae. ²⁵ Jayave Jesús jei chupe reta:

—Ivi pegua reta juvicha guasu reta oyocui reta. Jare jae reta uipota ñru vae reta jei icavi vae jesegua —jei—. ²⁶ Ërei pepite pe icavi'ã jucuarãi piyapo vaerã. Ime yave quía pepite pe uipota ico vaerã tenondeguarã vae, tuyeyapo penti tairusu vae ñru vae reta pe uyeyocui vae rami —jei—. ²⁷ Mesa pe uguapi ucaru vaerã vae co tenondegua tembú güeru vae güi. Ërei che aico pepite pe ayeyocui peve vaerã —jei—.

²⁸ Pe reta jecuaeño pepita che ndive opaete cua aiporara rambueve —jei—. ²⁹ Jare che puparavo ma pico vaerã Tumpa iporoyocua pe, cheRu cheparavo rami —jei chupe reta—. ³⁰ Jáeramo pecaruta chemesa pe cheporoyocua

pe. Jae ramiño vi penoita mbaepuere peña vaerã jocua doce ati Israel pegua reta —jei—.

Pedro uicuacuta Jesús

(Mt 26.31-35; Mr 14.27-31; Jn 13.36-38)

³¹ Simón, Simón, mase, Satanás uipota tēi güinoi mbaepuere peré, trigo yambiveve vae rami —jei—. ³² Ërei che ayerure Tumpa pe nderé jecuaeño neni vaerã mburugüirovia. Jare ndiyerova ye yave Tumpa coti, embori nderivi reta ipirãta vaerã ipurugüirovia re —jei.

³³ Jayave Pedro jei Jesús pe:

—CheYa, apitata co nde ndive, peresoriru pe neñono reta yave. Ndarau ndueya, yepe tēi aramoi ñru vae reta cheyuca —jei.

³⁴ —Che jae ndeve, Pedro —jei Jesús—, ndei uru cuimbae uñee mbove, mbapi vese ma checuacuta —jei.

Añave peraa mbaembae

³⁵ Jayave Jesús jei jemimboe reta pe:

—Che pomondo yave chiñee peraa vaerã, amimbeu peve agüiye vaerã peraa corepoti, jare peurupucu, jare pepipasa. ¿Uata pa mbae peve? —jei.

—Uata'ã —jei reta.

³⁶ Jayave jei chupe reta:

—Ërei añave tamimbeu peve cua: Corepoti penoi yave, peraa. Jae ramiño vi peurupucu penoi yave, peraa. Jare mbaeti yave penoi quisepecu, pemee peremimonde pegua vaerã quisepecu —jei—. ³⁷ Echa'ã che jae peve, uyeyapota co cheve Tumpa iñee pe uyecuatía oĩ vae. Echa'ã uyecuatía oĩ cuarãi: 'Ñru vae reta jei tēi jae vi co penti icavi mbae vae.' Jucuarãi uyecuatía oĩ. Jare opaete cheré uyecuatía oĩ vae uyeyapota co cheve —jei.

³⁸ Jayave jae reta jei chupe:

—Mase, oreYa, ime nonoi mocui quisepecu.

—Icaviño ma co —jei chupe reta.

Jesús uyerure Getsemaní pe
(Mt 26.36-46; Mr 14.32-42)

³⁹Jayave Jesús oẽ o güi ou vaerã ivitu guasu Olivos pe jae jecoño mai rami. Jare jemimboe reta vi yugüiraa jae ndive.

⁴⁰Jare oo uvãe yave upita vae pe, Jesús jei jemimboe reta pe:

—Piyerure Tumpa pe agüiye vaerã peyoa.

⁴¹Jayave Jesús usiri catu chugüi reta, jare uyeatica uyerure Tumpa pe.

⁴²—CheRu —jei—, nde ndipota yave, embiasa chegüi cua aiporarata vae. Ërei tuyeyapo cheve nde ndere vae. Agüiye tuyeyapo che jae vae —jei.

⁴³Jayave uyecuaa Jesús pe penti ángel ara güi ou vae umimirãta vaerã. ⁴⁴Jesús uiporara ete oĩ, jare jeiete uyerure Tumpa pe. Jeta ipireipo oĩ. Tugüi rami utiqui ivi pe.

⁴⁵Jare Tumpa pe uyerure ma yave, upña ye jare ou ye jemimboe reta ñugüinoi vae pe. Uecha oque ñugüinoi ipiatiti güi. ⁴⁶Jayave Jesús jei chupe reta:

—¿Maera pa peque peĩ? Pepña piyerure Tumpa pe, agüiye vaerã peyoa —jei.

Uipisi reta Jesús
(Mt 26.47-56; Mr 14.43-50; Jn 18.2-11)

⁴⁷Jare uyemingüeta oĩ rambueve, uyecuaa jeta vae. Jare Judas - jae co jocua doce vae güi penti - ou jocua jeta vae jenonde. Jayave ou uvãe Jesús oĩ vae pe, jare uyurupite.

⁴⁸Jayave Jesús jei chupe:

—Judas, ¿penti yurupite rupi pa chemee cua reta pe?

⁴⁹Jare Jesús jemimboe reta uyemboi ñugüinoi Jesús iyipi pe. Jare uicuaa mbae uyeyapota vae ramo, jei Jesús pe:

—OreYa, ¿nduiporuta pa quisepecu jese reta? ⁵⁰ Jayave penti Jesús jemimboe uiporu iquisepecu sacerdote tenondegua jembiocui inambi re, jare uyasia inambi chugüi. ⁵¹ Jayave Jesús jei:

—Pemaño cheré ayapo vaerã cua.

Jayave uyaviqui cuimbae inambi jendacue, jare cuimbae ucuera.

⁵² Yugüeru vi joco pe sacerdote reta itenondegua reta jare Tumpa jo re uyandareco vae reta jare tenta guasu pegua reta itenondegua reta. Jare Jesús jei chupe reta:

—¿Maera pa peru quisepecu reta jare ivira reta chepisi vaerã, imonda vae pipisi vae rami? ⁵³ Opa ara aico pe reta ndive Tumpa jo pe, ãrei chepisi'ã. Ërei ora uvãe ma chepisi vaerã. Cuarãi piyapo peĩ Satanás imbaepuere pe —jei.

Pedro uicuacu Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jayave uipisi reta Jesús jare güiraa sacerdote tenondegua jenta pe. Jare Pedro oo jae reta jaicue, ãrei mbiriño oo chugüi. ⁵⁵ Jayave joco pe ñugüinoi vae reta uyapo tata sacerdote tenondegua joca pe jare uguapi joco pe. Jare Pedro vi uguapi joco pe jae reta ipite pe. ⁵⁶ Ërei penti cuñatai uecha Pedro uguapi oĩ tataipi pe. Umae ngatu jese. Jayave jei:

—Cua cuimbae vi icose jocua ñru cuimbae ndive.

⁵⁷ Jayave Pedro uicuacu Jesús.

—Aicuaa'ã jocua cuimbae —jei Pedro cuñatai pe.

⁵⁸ Ndei ima mbove penti cuimbae vi uecha Pedro jare jei chupe:

—Nde co jae ñru vi.

—Che'ã co —jei Pedro cuimbae pe.

⁵⁹ Jare penti ora rupi ma uasa yave, ñru cuimbae jeiete jei:

SAN LUCAS 22:60 105 SAN LUCAS 22:71

—Añete co, cua cuimbae icose jocua ñru cuimbae ndive. Echa'ã Galilea pegua co —jei. ⁶⁰—Aicuaa'ã mbae ndere vae —jei Pedro cuimbae pe.

Jare uyemingueta rupive, uru cuimbae uñee. ⁶¹Jayave yandeYa uyerova jare umaë Pedro re. Jayave Pedro imandúa yandeYa jei chupe vae re: 'Ndei uru cuimbae uñee mbove, mbapi vese ma checuacuta.' ⁶²Jayave Pedro oë joco güi, jare tanta ipiatiti reve uyao.

Uyapo reta icavi mbae vae Jesús pe

(Mt 26.67-68; Mr 14.65)

⁶³Jare cuimbae uyandareco ñugüinoi Jesús re vae reta oyoyai jare uinupa. ⁶⁴Jayave jae reta uesaño ma Jesús jare ocua jova re. Jayave jei reta chupe:

—Emimbeu oreve quía ra ocua nderé.

⁶⁵Jare jeta icavi mbae vae jei reta chupe.

Jesús mburuvicha reta jovai

(Mt 26.59-66; Mr 14.55-64; Jn 18.19-24)

⁶⁶Jare cõe ma yave, tenta guasu pegua reta itenondegua reta jare sacerdote reta itenondegua reta jare mboroyocui re oporomböe vae reta uyembati. Jayave güeruruca reta Jesús. Jayave jei reta chupe:

⁶⁷—¿Nde pa co jae Cristo, Tumpa ombou vae? Emimbeu oreve.

—Che amimbeu yave peve, ndarau chererovia —jei Jesús—. ⁶⁸Jare che apirandu yave peve mbae re, ndarau pemimbeu cheve, jare ndarau cheyora —jei—. ⁶⁹Ërei che cuimberã ayeyapo vae aguapita curi Tumpa mbaepuere güinoi vae iyipi pe iyacata coti —jei.

⁷⁰Jayave opaete jae reta upirandu chupe:

—¿Nde pa co jae Tumpa Tai?

—Pe reta pere rami jae co che —jei Jesús chupe reta.

⁷¹Jayave jae reta jei:

—¿Maera pa yaeca ye ñru vae reta uñeapo vaerã jese?
Echa'ã yande etei yayandu mbae jei vae —jei reta.

23

Jesús Pilato jovai

(Mt 27.1-2, 11-14; Mr 15.1-5; Jn 18.28-38)

¹ Jayave opaete jae reta upña jare güiraa Jesús Pilato pe.

² Jare umbipi reta uñeapo Jesús re. Jei reta:

—Cua cuimbae umimbeu tenta guasu pegua reta pe uyapo vaerã icavi mbae vae. Echa'ã jei chupe reta agüiye vaerã umbiepi corepoti César peguarã. Jare jei jae co mburuvicha guasu Cristo jee vae —jei reta.

³ Jayave Pilato upirandu Jesús pe:

—¿Nde pa co jae judío reta juvicha guasu?

—Nde ndere rami jae co che —jei Jesús chupe.

⁴ Jayave Pilato jei sacerdote reta itenondegua reta jare tenta guasu pegua reta pe:

—Avãe'ã teco cua cuimbae re. ⁵ Jayave jae reta jeiete jei:

—Omboepochi tenta guasu pegua reta. Oporomboe opaete Judea rupi. Umbipi Galilea pe jare añave ou uvãe cua pe oporomboe oĩ —jei reta.

Jesús Herodes jovai

⁶ Pilato uyandu yave jei reta vae, upirandu penti Galilea pegua ra jocua cuimbae. ⁷ Jayave umimbeu reta Pilato pe Galilea pegua co Jesús. Jayave Pilato güiraaca Jesús Herodes pe. Echa'ã Herodes co jae Galilea pegua reta juvicha guasu. Jare jocua ara reta pe Herodes opou oĩ Jerusalén pe. ⁸ Jare Herodes uecha Jesús yave, uyerovia ete, ima ma uipota uecha ramo. Echa'ã uyandu ma jeta Jesús regua, jare uipota uecha Jesús uyapo penti miacañi.

⁹ Jayave Herodes upirandu Jesús pe jeta mbaembae re, ãrei Jesús jei'ã mbae ave chupe. ¹⁰ Jare sacerdote reta

itenondegua reta jare mboroyocui re oporomboe vae reta uyemboi Herodes jovai jare iñeeãta reve uñeapo Jesús re. ¹¹ Jare Herodes jare isundaro reta güirĩro jare oyoyai Jesús. Jayave omondeca chupe temimonde ipõra vae. Jayave Herodes güiraaca ye Pilato pe. ¹² Jare jocua ara etei Pilato jare Herodes uyeyapicatu ye. Echa'ã tenonde yave uñemitarẽi.

Pilato jei Jesús umanota co

(Mt 27.15-26; Mr 15.6-15; Jn 18.39-19.6)

¹³ Jayave Pilato umbatica sacerdote reta itenondegua reta jare tenta guasu pegua reta itenondegua reta ndive.

¹⁴ Jare jei chupe reta:

—Pe reta peru cua cuimbae cheve jare pere cheve omboepochi co tenta guasu pegua reta. Mase, che apirandu chupe jocua re perovaque, jare avãe'ã etei teco jocua pe reta piñeapo cheve jese vae re —jei—. ¹⁵ Jae ramiño vi Herodes uvãe'ã teco cua cuimbae re. Echa'ã che pomondo Herodes pe. Mase, mbaeti mbae teco uyapo umano vaerã —jei Pilato chupe reta—. ¹⁶ Jáeramo ainupacañota jare ayoraca yeta —jei.

¹⁷ Echa'ã opa año tenta guasu pegua reta uyerure chupe oyoraca vaerã penti pereso pascua ara rupi, jare Pilato oyoracañoi penti pereso. ¹⁸ Jayave opaete vae iñeeãta reve jei:

—Iyucaca cua cuimbae. Iyoraca oreve Barrabás —jei reta.

¹⁹ (Tenonde yave Barrabás upuruyuca Jerusalén pe, mburuvicha reta ndive uñerãro yave. Jáeramo umiingue peresoriru pe.)

²⁰ Ërei Pilato uipota tẽi oyoraca Jesús. Jáeramo jei ye chupe reta. ²¹ Ërei iñeeãta reve jei reta:

—Icutuca curusu re. Icutuca curusu re.

²² Jayave Pilato upirandu ye chupe reta:

—¿Mbae pa uyapo? Avãe'ã mbae icavi mbae vae jese umano vaerã. Jáeramo ainupacañota jare ayoraca yeta — jei.

²³ Ërei jeiete iñeeãta reve jei reta uicutuca vaerã Jesús curusu re. Jare sacerdote reta itenondegua reta jare ñru joco pe ñugüinoi vae reta iñee umiquirëi Pilato. ²⁴ Jayave Pilato jei uyeyapo vaerã Jesús pe jae reta uipota vae. ²⁵ Jayave oyoraca chupe reta tenonde yave mburuvicha reta ndive uñerãro yave upuruyuca ramo peresoriru pe umiingue vae, jae reta uipota rami. Ërei umee Jesús chupe reta uyeyapo vaerã chupe jae reta uipota vae.

Jesús uyecutuca curusu re

(Mt 27.32-44; Mr 15.21-32; Jn 19.17-27)

²⁶ Jayave güiraa reta Jesús joco güi. Jare penti cuimbae Simón jee vae tenta guasu Cirene pegua, ou uvãe tenta guasu coti. Jacoropi uasa oï yave, sundaro reta uipisi Simón jare güiraaca chupe Jesús icurusu. Jayave Simón güiraa curusu Jesús jaicue. ²⁷ Jare yugüiraa vi Jesús jaicue jeta vae. Jare jae reta ipite pe yugüiraa cuña reta. Jae reta uapïro yugüiraa Jesús. ²⁸ Ërei Jesús uyerova umae jese reta jare jei chupe reta:

—Jerusalén pegua cuña reta, agüiye piyao cheré. Piyao piyee jare pemembi reta re —jei—. ²⁹ Mase, outa uvãe ara reta jei reta vaerã: ‘Uyerovia co imembi mbae vae. Uyerovia co umicambu mbae etei vae’ —jeita, jei—. ³⁰ Jayave umbipita tēi jei ivitu guasu pe: ‘Piyapara oreárambo. Oreasoï’ —jeita, jei—. ³¹ Uyapo reta icavi mbae vae cheve yave, ¿mbae ra uyapota peve? —jei.

³² Jare sundaro reta güiraa vi Jesús ndive mocui cuim-bae icavi mbae vae uyapo vae uyuca vaerã. ³³ Jare yugüiraa uvãe Ñcacüerenda jee vae pe. Jayave joco pe sundaro reta uicutu curusu re Jesús jare cuimbae reta

icavi mbae vae uyapo vae. Oñono reta penti Jesús iyacata coti jare ñru iyaso coti. ³⁴ Jayave Jesús jei:

—CheRu, embiasa chupe reta. Uicuaa'ã mbae uyapo ñugüinoi vae —jei.

Jayave sundaro reta uyuguari Jesús jemimonde re, uicuaa vaerã mbae nunga penti penti güiraa iyupe vaerã. ³⁵ Jare tenta guasu pegua reta uyemboi ñugüinoi jocoropi umae Jesús re. Jare tenta guasu pegua reta itenondegua joco pe ñugüinoi vae reta oyoyai Jesús. Jei reta:

—Jae uepi ñru vae reta. Añave tuyerepi, jae co Cristo yave, jae co Tumpa uiparavo vae yave —jei reta.

³⁶ Jare sundaro reta vi oyoyai Jesús. Oya reta jese jare umee vinagre chupe. ³⁷ Jare jei reta:

—Nde co jae judío reta juvicha guasu yave, iyerepi.

³⁸ Jare oñono reta curusu re Jesús iñãca iárambo uye-cuatía jesegua vae: “Cua co jae judío reta juvicha guasu.” Uyecuatía oĩ griego iñee pe jare latín pe jare hebreo iñee pe.

³⁹ Jare penti cuimbae icavi mbae vae uyapo vae uyecu-tuca vae uñeengata Jesús pe.

—Nde co jae Cristo, Tumpa ombou vae yave, iyerepi jare orerepi vi —jei.

⁴⁰ Ërei ñru cuimbae uñeengata chupe.

—¿Ndequiye'ã pa Tumpa güi? Echa'ã nde vi nemano neĩ cua ñru vae rami —jei—. ⁴¹ Jare jupi co yande ñamano vaerã. Echa'ã yande ñamanota ñaĩ icavi mbae vae yayapo vae jeco pegua. Ërei cua cuimbae uyapo'ã mbae icavi mbae vae —jei.

⁴² Jayave jei Jesús pe:

—Jesús, nemandúa cheré ndeporoyocua pe neĩ yave.

⁴³ Jayave Jesús jei chupe:

—Añete che jae ndeve, cua ara neĩta che ndive ara pe —jei.

*Jesús umano**(Mt 27.45-56; Mr 15.33-41; Jn 19.18-30)*

⁴⁴ Jare guarasi ara mbite güive mbapi ora rupi uñemipĩtumimbi opaete ivi pe. ⁴⁵ Guarasi jembipe'ã etei. Jayave Tumpa jo umbiyao vae osoro mbite rupi. ⁴⁶ Jayave Jesús tanta usapicai. Jayave jei:

—CheRu, amee ndeve cherecove.

Jare cua jei ma yave, umano.

⁴⁷ Jare cien sundaro vae juvicha joco pe oĩ vae uecha mbae uyeyapo vae. Jayave umbiadora Tumpa jare jei:

—Añetete co, cua cuimbae co jae jupi vae.

⁴⁸ Jare opaete joco pe yati vae reta vi uecha mbae uyeyapo vae jare ocua iyee ipitía re. Jayave opaete vae yugüiraa ye jenta jenta pe. ⁴⁹ Jare opaete Jesús uicuaa vae reta jare cuña Jesús ndive Galilea güi yugüeru vae reta uyemboi ñugüinoi mbiri curusu güi. Umae ñugüinoi mbae uyeyapo vae re.

*José oñono Jesús jetecue teögüeriru pe**(Mt 27.57-61; Mr 15.42-47; Jn 19.38-42)*

⁵⁰ Jare joco pe oĩ vi penti cuimbae José jee vae. Jae co penti mburuvicha. Ipiacavi jare jupi. ⁵¹ (Jae uipota'ã tēi ĩru mburuvicha reta uyapo vaerã icavi mbae vae Jesús pe.) Jae co tenta guasu Arimatea pegua. (Arimatea Judea pegua co.) José vi uãro ico Tumpa iporoyocua. ⁵² Cua cuimbae oo Pilato pe, jare uyerure chupe Jesús jetecue re. ⁵³ Jayave umbigüeyi Jesús jetecue, jare oñoma nieso pe. Jayave oñono penti teögüeriru itape uyeyoo vae pe, ndei quía uñeñono pipe vae pe. ⁵⁴ Jocua ara opaete judío reta uyeyapicatu ñugüinoi piareve peguarã. Echa'ã piareve pe co mbutuu ara.

⁵⁵ Jare cuña Jesús ndive Galilea güi yugüeru vae reta, yugüiraa José jaicue jare uecha teögüeriru jare quirãi José oñono pipe Jesús jetecue vae. ⁵⁶ Jayave yugüiraa ye jenta

jenta pe jare uyapıcatu mbaembae ipiche cavi vae. Jayave uputuu reta mbutuu ara pe. Echa'a jucuarāi uyecuatía oĩ mboroyocui pe.

24

Jesús icove ye

(Mt 28.1-10; Mr 16.1-8; Jn 20.1-10)

¹ Jare neimbove asi domingo ara pe cuña reta yugüiraa ye teögüeriru coti. Güiraa reta mbaembae ipiche cavi vae uyapıcatu ma vae. ² Jare uecha ita tuicha vae uyembisiri ma teögüeriru jonque güi. ³ Jayave uique reta teögüeriru pe, ěrei uvāe'a yandeYa Jesús jetecue joco pe. ⁴ Ipiacañi ete reta cua re, ěrei aramoioño uyecuaa uyemboi ñugüinoi iyipi pe mocui cuimbae. Jocua mocui cuimbae jemimonde uvera oĩ. ⁵ Jáeramo cuña reta uquiye jare ipe cuimbae reta jovai. Jayave cuimbae reta jei chupe reta:

—¿Maera pa peeca peĩ icove ye vae umanocue vae reta ipite pe? ⁶ Mbaeti ma cua pe oĩ. Jae icove ye ou umanocue vae reta ipite güi. Pemandúa jae icose pe ndive Galilea pe yave jei peve vae re —jei reta—. ⁷ Echa'a jae jei peve: 'Chemeeta cuimbae icavi mbae vae uyapo vae reta pe. Jae reta checututa curusu re. ěrei che cuimbaerā ayeyapo vae aicove yeta ayu umanocue vae reta ipite güi mbapi ara rupi' —jei, jei reta.

⁸ Jayave jae reta imandúa Jesús jei chupe reta vae re. ⁹ Jayave yugüeru ye teögüeriru güi jare umimbeu opaete uyeyapo vae jocua once vae jare opaete ĩru vae reta pe. ¹⁰ Jocua cuña reta co jae María Magdalena, jare Juana, jare Jacobo ichi María jee vae, jare ĩru cuña jae reta jupie yugüiraa vae reta. Cua reta umimbeu Jesús jemimondo reta pe mbae uyeyapo vae. ¹¹ ěrei iyapu echa reta Jesús jemimondo reta pe. Güirovia'a reta. ¹² Jayave Pedro osi oo teögüeriru coti. Jare joco pe oo uvāe yave, ipe umae

vaerã teõgüeriru japipe pe, jare uecha nieso reta joco pe oĩ. Jayave ou ye joco güi. Ipiacañi uyeyapo vae re.

Jesús jare mocui jemimboe reta
(Mr 16.12-13)

¹³ Jare jocua ara etei mocui Jesús jemimboe reta yugüiraa tape rupi Jerusalén güi tenta guasu-rai Emaús coti. Emaús oĩ mocui legua Jerusalén güi. ¹⁴ Jare tape rupi yugüiraa rambueve, imiari uyupe opaete uyeyapo vae re. ¹⁵ Jare aramoño uyemingueta ñugüinoi rambueve, Jesús uyecuaa chupe reta jare oo jae reta jupíe. ¹⁶ Ërei jae reta uicuaa'ã Jesús. Echa'ã Jesús ndei uipota uyecuaaca chupe reta. ¹⁷ Jayave Jesús upirandu chupe reta:

—¿Mbae re pa pemiari piyupe peguata rambueve?
¿Maera pa pepiatiti? —jei.

¹⁸ Jare penti Cleofas jee vae upirandu Jesús pe:

—¿Ndico'ã pa Jerusalén pe? ¿Ndicuaa'ã pa cua ara reta pe opaete uyeyapo vae? —jei.

¹⁹ —¿Mbae pa? —jei chupe reta.

—Jesús Nazaret pegua pe uyeyapo vae —jei reta chupe —. Jae co penti Tumpa iñee umimbeu vae. Uyapo jeta mbae icavi vae mbaepuere reve, jare icavi oporomboe. Uyeyocui cavi Tumpa pe jare opaete tenta guasu pegua reta umbiadora —jei reta Jesús pe—. ²⁰ Ërei sacerdote reta itenondegua reta jare oretenondegua reta umee mburuvicha guasu pe, jae uyucaca vaerã. Jare uicutuca reta curusu re —jei reta—. ²¹ Ërei ore ndugüirovia tẽi jae uepita Israel pegua reta. Jare cua ara mbapi ara ma opaete cua uyeyapo vae güi —jei reta—. ²² Ërei amocue cuña ore ndive uyeyocuisse Jesús pe vae reta iyeyi neimbove yugüiraa teõgüeriru pe, jare yugüeru ye yave, oremipiacañi ete. ²³ Echa'ã jae reta uvã'e'ã Jesús jetecue, jare yugüeru ye yave, jei oreve quirãi uecha ángel reta joco pe jare quirãi

ángel reta jei Jesús icove ye ma oĩ —jei reta—. ²⁴ Jayave amocue ore ndive ñugüinoi vae yugüiraa vi teõgüeriru pe, jare yugüeru ye yave, umimbeu oreve mbaeti joco pe oĩ Jesús jetecue cuña reta jei oreve rami —jei reta.

²⁵ Jayave Jesús jei chupe reta:

—Pe reta co jae iyaracuaa mbae vae reta rami. Yavai co oĩ peve perovia vaerã opaete Tumpa iñee aracae umimbeu vae reta uicuatiaque vae —jei—. ²⁶ Picuaata tẽi ma jae reta uicuatía co quirãi Cristo, Tumpa ombou vae, uiporaraño-tai rani co jare quirãi jocua jaicue rupi uyembiaadoracata co —jei.

²⁷ Jayave Jesús umimbeu chupe reta jeta Moisés jare Tumpa iñee aracae umimbeu vae reta uicuatiaque vae güi, jare umimbeu cavi chupe reta quirãi opaete jocua uyecuatía oĩ vae imiari Cristo re.

²⁸ Jare yugüiraa ma uvãe coiño Emaús güi. Echa'ã jocua mocui vae upitata joco pe. Jare Jesús uasata tẽi oo cuti. ²⁹ Ërei jae reta jei chupe:

—Epita ore ndive. Echa'ã caaru ma. Pĩtuta co ndeve —jei reta.

Jayave Jesús upita jae reta jenta pe. ³⁰ Jare uguapi rambueve mesa pe ucaru vaerã, Jesús uipisi mbiyape jare umee yasurupai Tumpa pe. Jayave upisãa umee chupe reta. ³¹ Jayave ramo uicuaa reta Jesús. Echa'ã Jesús umaño ma jese reta uicuaa vaerã. Jayave jupivoiño Jesús ucañi chugüi reta. ³² Jayave jei reta uyupe:

—Añete co, jae yanembiyerovia ete, tape rupi imiari yandevê rambueve. Echa'ã uicuaaca yandevê Tumpa iñee uyecuatía oĩ vae —jei reta. ³³ Jayave jocua ora pe etei jae reta upüa mesa güi jare yugüiraa ye Jerusalén pe. Joco pe uvãe jocua once vae yatĩ ñru vae reta ndive.

³⁴ —Añete co, yandeYa icove ye ma ou umanocue vae reta ipite güi —jei yati vae reta—. Echa'ã uyecuaa co Simón pe.

³⁵ Jayave jocua mocui vae vi umimbeu yati vae reta pe mbae tape rupi uyeyapo vae jare quirãi Jesús uyecuaaca chupe reta mbiyape upisãa yave.

*Jesús uyecuaa jemimboe reta pe
(Mt 28.16-20; Mr 16.14-18; Jn 20.19-23)*

³⁶ Jare uyemingueta ñugüinoi rambueve, Jesús etei uyecuaa uyemboi oĩ ipite pe, jare jei chupe reta:

—Mbiacatu toĩ pe ndive.

³⁷ Ërei jae reta uquiye ete. Ipia pe uyemingueta tẽi jocua co Jesús iãcúe. ³⁸ Ërei Jesús jei chupe reta:

—¿Maera pa pequiye? ¿Maera pa pepia pe piyemingueta jucuarãi? —jei—. ³⁹ Pemae chepo jare chepi re. Che co jae. Pepuere cheaviqui picuaa vaerã jae co che. Echa'ã penti vae iãcúe güinoi'ã soo jare maecãgüe. Ërei pepuere peecha che ime co anoi soo jare maecãgüe —jei.

⁴⁰ Jare cua jei ma yave, uechaca chupe reta ipo jare ipi.

⁴¹ Jae reta ipiacañi, jare uyerovia ete ramo ndei ipuere güirovia ete. Jayave Jesús upirandu chupe reta:

—¿Ime pa penoi cua pe mbae jau vaerã?

⁴² Jayave umee reta chupe pira oyicue iperaso jare mbovi ei. ⁴³ Jare Jesús uipisi jou jae reta jovaque. ⁴⁴ Jayave jei chupe reta:

—¿Pemandua'ã pa pe reta ndive aico rambueve che jae peve vae re? Echa'ã Moisés iporoyocui jare Tumpa iñee aracae umimbeu vae reta uicuatiacue vae jare Salmo reta chemimbeu. Jare amimbeu peve quirãi opaete cua chemimbeu vae uyeyapota co —jei.

⁴⁵ Jayave umee chupe reta uicuaa cavi vaerã Tumpa iñee uyecuatía oĩ vae. ⁴⁶ Jayave jei chupe reta:

—Cuarãi uyecuatía oĩ quirãi Cristo, Tumpa ombou vae, uiporarañotai co jare icove yeta co ou umanocue vae reta ipite güi mbapi ara rupi, ⁴⁷ jare quirãi jerãcuata ñru vae reta pe Cristo jee re ueya vaerã iyemingueta icavi mbae vae ipia pe oĩ vae Tumpa umbiasa vaerã chupe reta imbaeyoa reta. Jerãcuata rani Jerusalén pe. Jayave joco güi jerãcuata opaete ivi pegua reta pe —jei—. ⁴⁸ Jare pe reta pemimbeuta opaete cua regua —jei—. ⁴⁹ Mase, abouta peve cheRu jei umeeta co peve vae. Ërei pepita tenta guasu Jerusalén pe mbaepuere güinoi vae ara güi ou peve regua —jei.

Jesús oo ara pe

(Mr 16.19-20)

⁵⁰ Jayave Jesús güiraa reta Betania pe. Jayave uupi ipo ara coti jare umivendise reta. ⁵¹ Jare umivendise oĩ rambueve, oo chugüi reta ara coti. ⁵² Jayave jae reta umbiadora. Jayave yugüiraa ye Jerusalén pe uyerovia reve. ⁵³ Jare jecuaeño yugüiraa Tumpa jo pe umbiadora reve Tumpa. Amén.

Nuevo Testamento Guaraní Pe
New Testament in Guaraní, Western Bolivian (BL:gnw:Guaraní,
Western Bolivian)

copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 29 Jan 2022 from source files dated 29 Jan 2022

09a8356f-416c-5877-91cf-40f681db481e